

Matiu

Sepinien xa Diamu te Matiu

Visi iaxa tetis sepinien ak?

Melele xa Iesu tepol kokot ni pispisien nan xil e di tetal rerat meseien ra moletin xil hao, moletin xil holu di latehusili. E melele nen ak, Iesu di tekakao e taon tahal Kapaniam, e tepus Siu tei xa di teleh takis ra Siu sav xil tangan vasa ni vahe kavmen tahal Rom, hisen Matiu Livae (Mat 9:9). Tumulen xa xi tetisi di biteni xa melele xa Iesu tepusi e tekesi, vatei takes, xi testokovein polien nan e tehusil xati. Di, e melele xa Iesu tehe ut nesao, Ninin Eo mei tepolu e Matiu e eloheoh sav xil mun. Ma lateha latehithiten longeongen hos usil Iesu Kristo mi moletin xil (Polien 2:4,43). Matiu tetis vanuvei ak usil meulien na Iesu e huram 63 AD (huras 63 xa dutou ni poten na Iesu).

Visi iaxa tevuli sepinien ak tetiamu?

Matiu tetis vanuvei ak teha mi mol-Isrel xil vengang holu e xil latake reitin ti xa Iesu iaxa be xi xa Hi tehiti xati tetiamu tangan isa ni imei. Misak ni, Matiu en tehei tangan vapisen ni xa holesok xil xa provet xil te oltestamen latehit usili e rin te meien, meulien, e mea rilomunen na Iesu mei tehe reitin.

Matiu tetis sepinien xil ak veneh?

Matiu en tehei vapisen ni xa meien na Iesu tehusil xat naha xa Hi tehiti xati usil meien na suv toto xa isa ni imei tangan vatutou ni mol-Isrel xil - Matiu tetis kuh holesok xil xa testal e meulien na Iesu e tepisen ni xa di nggusil naha xa provet xil tetiamu latehit usili e oltestamen:

Iesu texo vatimol na Ebrahim (Mat 1:1) e tehusil hitxatien xa Hi tepol ni tetela (Sen 22:18) tangan ‘vatimol nan xil lihe suse te tuxolxatien na Hi iha mi vanut moletin xil vus te ut etan.’

Iesu texo vatimol na suv toto Deved (Mat 1:1) xa tehusil hitxatien xa Hi tepol ni tetel Deved (2 Sam 7:13) tangan ‘laxatien na ngan xil xa listal e vatimol nan iloh sal ha vuma ... hoxalite teni ihe tovuol.’

Iesu, ninen tehe atul maxoe tei xa takil ti mu tiramue (Mat 1:18) texoni ngan taxa Hi tehiti xati texo provet Aesea (Aes 7:14).

Iesu, latpesi e metimal tahal Betlehem (Mat 2:1) texoni ngan taxa Hi tehiti xati texo provet Maeka (Maek 5:2).

Eilep tatei xil xa latehur kilakilen texo suse na hitu xil latexo ist e latemei e Isrel tangan langang ves ‘tuvava xa latpesi be suv toto na Siu xil’ (Mat 2:2) vengang xa xil latepus hitu nan mei testal texoni ngan taxa Hi tehit xati texo provet Balam (Nam 24:17).

Tuvava Iesu teha tete kantri tahal Isip vuteili (Mat 2:14-15) texoni ngan taxa Hi tehit xati texo provet Hosea (Hos 11:1).

Sion Baptaes mei misak mesen suse na Iesu (Mat 3:1-3) texoni ngan taxa Hi tehit xati texo provet Aesea (Aes 40:3).

Iesu tepisen ni xa xi pipin tangan vahur polien na Hi texo sexien xa temaen Sion vabaptaes ni (Mat 3:16-17). Hi tepisen ni xa temaal pupu ven, e tetutou ni ngan ak, Iesu teha tepol kokot ni polien nan xil.

Melele xa Iesu tehur saksipisien xil texo he Temat (Mat 4:1-11), tepisen ni xa Iesu tenamot ti e tesaen, e tesoh kil tetel sepinien na Hi.

Matiu en tehei vapisen ni xa Iesu bemei tangan vapispisi mi moletin xil usil naha istal e meulien nae melele xa Hi mei ihe Suv Toto nae - Matiu teling pispisien xil na Iesu lateti e vanut pispisien lim (5):

E hu tei, Iesu tepispisi mi moletin xil usil sexien xil xa momal tangan moletin xil lihuri melele xa Hi mei ihe Suv Toto e meulien nae (Mat 5:1-7:29).

esu tepispisi ni xa saksipisien xil e melengien xil te xeih ti imei e meulien na ngan xil xa Hi mei be Suv Toto nae (Mat 10:1-42).

Iesu tepispisi ni mi moletin xil usil sexien xa Hi mei ihe Suv Toto na moletin xil (Mat 13:1-52).

Iesu tepispisi usil visi iaxa be eilep mak mu e ngan xil xa Hi be Suv Toto nae (Mat 18:1-35).

Iesu tepispisi usil saksipisien e melengien xil te xeih xa ti imei mi ngan xil xa Hi be Suv Toto nae (Mat 24:1-25:46).

Matiu en tehei vapisen ni xa Iesu tehur xeihen texo Hi xa mili xeihen savsav xil e ut etan - Matiu tetisi xa Iesu ‘tetel rerat meseien xil vus ra moletin xil’ (Mat 4:23). Xi tetisi mun xa Iesu tepol ni temak tangan vasak ni naha xa Hi tehiteni texo provet Aesea mei vahe reitin (Mat 8:17).

Iesu tehur xeihen teli meseien leporsi (Mat 8:3); meseien xa ri moletin mat (Mat 8:13; 9:6); meseien xa moletin ven mitin (Mat 8:15); e teli meseien savsav xil mun (Mat 8:16; 9:22,35; 12:13,15; 14:36; 16:30).

Iesu tehur xeihen tangan vahol rerat ninin tesa xil vahe reling moletin xil (Mat 8:16,33; 9:33; 12:22; 15:28; 17:18).

Iesu tehur xeihen tangan vasak ni votiang e oei lalilong xat raen (Mat 8:27).

Iesu tehur xeihen tangan vasak ni ngan xil xa lamat, mei lameul rilomun (Mat 9:25).

Iesu tehur xeihen tangan vasak ni ngan xil xa vurange bon, mei lalongeong rilomun, e ngan xil xa labe vut, mei lasepin (Mat 9:29,33; 12:22).

Iesu tehur xeihen tangan vasak ni ngan xil xa metexil bar mei laketeh rilomun (Mat 21:34).

Iesu tehur xeihen tangan vahangan moletin xil holu vatel anien xa hokorong tang (Mat 14:25; 15:36).

Iesu tehur xeihen tangan vasa halesil vaha ni neta ngan (Mat 21:19).

Matiu en tehei vapisen ni xa vat xil na mol-Isrel xil latesin pispisien xil na Iesu e iexil ti tenavei laling neketen nae en e lavusil xati - Melele xa Iesu tepol kokot ni polien nan xil, mol-Isrel xil lamaal ven. E melele xa di tepol teha vuma, vat xil na mol-Isrel xil latesin ni e latepol ni texeih mini.

Vat xil na mol-Isrel xil latehit tamal ti melele xa Iesu tesepin e rin na Hi tehiti Hi naketeh ti mun nasa mi moletin xil ve tesaen nae xil (Mat 9:3).

Vat xil na mol-Isrel xil latehit tamal ti xa Iesu di teanien tetel moletin tesa xil (Mat 9:11).

Vat xil na mol-Isrel xil latehit tamal ti xa moletin xil holu latemaal pupu ve holesok xil xa Iesu di tepol ni (Mat 9:34).

Vat xil na mol-Isrel xil latehit tamal ti xa Iesu tenahusil xat sexien matu nae xil ti (Mat 9:14; 12:2,14; 15:2).

Vat xil na mol-Isrel xil latehit xeihen na Iesu texo Temat (Mat 12:24; 16:1).

Vat xil na mol-Isrel xil latehit tamal ti xa Iesu di tesel xat xil ve sexien nae xil (Mat 19:3; 21:23,46; 22:15,23,35; 23:1-39).

Matiu en tehei tangan vapisen ni xa sakpisien xil e maten na Iesu tehusil xat naha xa Hi tehiti xati tehiti istal - Matiu tetis kuh holesok xil xa testal e sakpisien e maten xa Iesu tehuri. Xi tepisen ni xa holesok xil ak tehusil xat naha xa Hi tehiti usili texo provet xil tetiamu e oltestamen.

Hi tehiti xati (Sam 118:22-23) xa vat xil na mol-Isrel xil lisen Iesu (Mat 21:42).

Hi tehiti xati (Aes 6:9-10; Sam 78:2) xa moletin xil linalong kil ti pispisien nan xil (Mat 13:13,34).

Hi tehiti xati (Sak 9:9; Sam 118:26) xa Iesu iloh ixo dongki tei ixoni suv toto tei melele xa mei istal e taon tahal Serusalem (Mat 21:4-11).

Hi tehiti xati (Sam 41:9) xa timue hos tei na Iesu xa di lateanien vituei, xi vari isa rati ihe he elu nan xil (Mat 26:23-24).

Hi tehiti xati (Sak 11:12-13; Ser 19:1-13; 32:6-9) xa lixal rat meulien na Iesu ni silva mani ihe hanutap tei e he xalu mun (30) (Mat 26:15; 27:3).

Hi tehiti xati (Sak 13:7) xa moletin xil na Iesu lilesae relingi (Mat 26:31).

Hi tehit xati (Aes 53:8) xa melele xa lilepis Iesu e kot, linapol ni ti namal mini e litela tangan ha imat (Mat 27:1-2).

Hi tehit xati (Aes 53:7) xa Iesu itat votei melele xa liso sepinien eah iha xati (Mat 27:12).

Hi tehit xati (Aes 50:6) xa moletin xil liti e likus valnaon (Mat 26:67; 27:30).

Hi tehit xati (Sam 22:14-18) xa liti xat Iesu ite eivave e liso daes tangan liseti eising nan xil (Mat 27:35).

Hi tehit xati (Sam 69:21) xa melele xa maruru iat Iesu, xil lisa uae na xa mikon mini (Mat 27:34).

Hi tehit xati (Sam 22:7-8) xa moletin xil lingue xat Iesu e lisisi tangan itutou ni xi tasen (Mat 27:40).

Hi tehit xati (Aes 53:12) xa Iesu ihur longpangasien itel moletin tesa xil e isis ve ngan xil xa di lapurun ni (Mat 27:38).

Hi tehit xati (Sam 22:11) xa istokovein Iesu melele xa xi ti ilong pangas xi (Mat 27:46).

Hi tehit xati (Aes 53:9) xa liling tiei na Iesu ite rute xa di ladihin ngan xil xa holesok nae holu en (Mat 27:60).

Hi tehit xati (Sam 16:10) xa namaen ni ti Iesu nate von maten, e tiei nan navolel ti e vul (Mat 28:6).

Vatit nenemien tei te vanuvei ak de Matiu 5:17

Iesu pispisi mi moletin xil bit, "Munanemi ti munahit inou namei tangan naso rerat Rae xil na Mosis e pispisien xil na provet xil vaha. !E-e, tamak ti! Natamei ti tangan naso rerat xil. E namei tangan nisak ni naha xa rae xil ak di lasep usili mei ihe reitin."

Naha iaxa de sepinien ak?

1. Meien na Iesu nggusil xat naha xa Hi tehit xati (Mat 1:1 - 4:11)

E provins tahal Kaleli

2. Iesu pol kokot ni polien nan e bit usil sexien xa Hi mei ihe Suv Toto na moletin xil (Mat 4:12 - 7:29)
3. Iesu pisen xeihen na Hi xa mei ihe Suv Toto na moletin xil (Mat 8:1 - 11:1)
4. Moletin xil lasin ni tangan Hi mei vahe Suv Toto nae (Mat 11:2 - 16:12)

E suse vahe Serusalem

5. Iesu bue xat moletin nan xil ve sapisien xil xa ti imei e xil (Mat 16:13 - 20:34)

E Serusalem

6. Moletin xil lasin Iesu e iexil ti tavei tangan lavusili (Mat 21:1 - 23:39)
7. Iesu pispisi mi moletin nan xil usil mea rilomunen nan e sapisien xil xa ti imei e xil (Mat 24:1 - 25:46)

8. Vat na mol-Isrel xil lapol ni suse tangan Iesu vamat vaxo en (Mat 26:1-75)
 9. Maten na Iesu (Mat 27:1-66)
 10. Iesu mea rilomun ra maten e be ut nesao (Mat 28:1-20)

Vatimol na Iesu Kristo^a

1 ¹Ngan ak be vatimol xil na Iesu Kristo, xa tehe tei e vatimol na suv toto Deved tetiamu, xa tehe tei e vatimol na Ebrahim tetiamu.

- ² Ebrahim, xi tehe tame Aesak,
 xa tehe tame Siekob,
 xa tehe tame Sudah tetel tuneli xil.
³ Sudah, xi tehe tame Peres xal Siera, xa ninexalu Tamar,
 E Peres, xi tehe tame Hesron,
 xa tehe tame Ram.
⁴ Ram, xi tehe tame Aminatap,
 xa tehe tame Nashon,
 xa tehe tame Salmon.
⁵ Salmon, xi tehe tame Boas, e ninen Rehab,
 E Boas tehe tame Obed, e ninen Rut.
 E Obed tehe tame Tiese,
⁶ xa tehe tame suv toto Deved.

Suv toto Deved, xi tehe tame Solomon, e ninen tehe tunau na Uraea.

- ⁷ Solomon, xi tehe tame Rehoboam,
 xa tehe tame Abitsa,
 xa tehe tame Asa.
⁸ Asa, xi tehe tame Sehosevat,
 xa tehe tame Sehoram,
 xa tehe tame Usaea.
⁹ Usaea, xi tehe tame Siotam,
 xa tehe tame Ehas,
 xa tehe tame Hesekaea.
¹⁰ Hesekaea, xi tehe tame Manase,
 xa tehe tame Amon
 xa tehe tame Sosaea.
¹¹ E Sosaea, xi tehe tame Sekonaea e tuneli xil.
 E melele nen ak, mol-Babilon xil mei latehas tan ni mol-Isrel xil e lateleh rerat xil latehe Babilon.

^a 1:0 Tumulen ak de Luk 3:23-38 mun

- 12 Ngan xil sung ak, xil labe avu xil xa latetutou ni melele xa mol-Isrel xil latehe Babilon:
 Sekonaea, xi tehe tame Selti,
 xa tehe tame Serubabel.
- 13 Serubabel, xi tehe tame Apiut,
 xa tehe tame Eliakim,
 xa tehe tame Asor.
- 14 Asor, xi tehe tame Sadok,
 xa tehe tame Akim,
 xa tehe tame Eliud.
- 15 Eliud, xi tehe tame Eliesar,
 xa tehe tame Matan,
 xa tehe tame Siekop.
- 16 Siekop, xi tehe tame Siosep,
 xa tehe tiramue na Meri,
 xa tehe nine Iesu,
 xa latekesi ni Kristo xa Hi tehit xati tehit isa ni imei.

17 Mak ma, melele xa labuli vatit avu xil ladi vatimol na Iesu, Ebrahim tetuxoh suv toto Deved, lakameti xa latehe hat e le tei (14). E lakameti xa Deved tetuxoh melele xa mol-Isrel xil latehe Babilon, vatit avu xil ak latehe hat e le tei (14). E melele xa mol-Isrel latehe Babilon tetuxoh melele xa Kristo tepot e ut etan, vatit avu xil ak mun latehe hat e le tei (14).

Iesu Kristo Tepot e Ut Etan^b

18 Ngan ak be tumulen usil naha xa testal tetiamu ni melele xa Iesu Kristo latepesi. Meri, nine Iesu, xi latesikoe xole ngamu tangan mei ihe atou na Siosep. E melele xa lutnati vituei ti mu, latekameti xa Meri teti tuei ni tuvava texo xeihe na Ninin Eo. 19 Vengan xa Siosep, tiramue na Meri, sexien nan xil momal pe met Hi, xi tenemi tehit isil rati. E xi en titavei vapol ni Meri vahe unoun pe met moletin xil. Ma xi bit xalu lalitalisil e suse xa moletin xil linakil ti.

20 E melele xa Siosep di tamu minem usil rin ak, masxaxa tei na Hi Suv mei mistal mini e metuveen tei e biteni mini bit, “Siosep, tei e vatimol na suv toto Deved tetiamu, ulum nakan ti tangan ovur Meri vahe atou nam, vengan xa tuvava xa di ni nggo xeihe na Ninin Eo. 21 Meri iling horamue ak, e xoux uling hisen ihe ‘Iesu’ xa koute teni be ‘Iahova di miteh meulien’, vengan xa xi iteh meulien e moletin nan xil ra tesaen nae.”

22 Holesok xil ak mei mistal tangan vapol ni sepinien xa Hi Suv tehiteni texo provet nan mei vahe reitin xa bit,

^b 1:17 Tumulen ak de Luk 2:1-7 mun

23 *“!Muteong kuhi! Ate-maxoe tei xa takil ti mu tiramue,
xi iti ni tuvava tei.
Ti, ilingi ihe malohos e liling hisen ihe ‘Immanuel’,
xa koute teni be ‘Hi di mi xir’.” (Aes 7:14)*

24 Melele xa Siosep milale, xi pol nggusil naha xa masxaxa na Hi Suv tesemae ni mini. Xi nggur Meri be atou nan e ludi vituei. 25 E xi tapat ti vatela ba duxoh melele xa Meri miling horamue nan. E melele xa miling horamue ak, Siosep miling hisen be Iesu.

**Eilep Xil Lamei Tengan Lamerere ni Iesu
Kristo Nggoni Suv Toto na Siu Xil**

2 1 Iesu, latepesi e metimal tahal Betlehem xa de provins tahal Sudea, e melele xa Herod xa Mahulong tehe suv toto te provins ak. E dutou ni melele xa latepes Iesu en, rut eilep xil langgo ist e lamei e taon tahal Serusalem. Eilep xil ak langgur kilakilen tengan lipus kil naha xa istal e ut etan nggo suse na hitu xil. 2 E melele xa lastal e hal Serusalem, lasis moletin xil labit, “?Tuvava xa latpesi be suv toto na Siu xil da xave? Vengan xa melele mateti tamu e ut samem e ist, matepus kila xa hitu nan testal rohon. Ve rin ak, mamei taxeak tengan masa merereen mini.”

3 Melele xa suv toto Herod xa Mahulong milongeong ni, xi minexo pupu del moletin xil vus tahal Serusalem.^c 4 Ma Herod mikes viton vat xil na pris xil del tisa xil te Rae xil na Mosis e misis xil bit, “?Kristo xa Hi tehit xati mi Siu xil, lipesi e ut xave?”

5 Xil labit rilomun ni mini labitene, “Lipesi e metimal tahal Betlehem e provins tahal Sudea, vengan xa Hi tesepepin texo tisen na provet tei nan bit,

6 *“Tave ti neta xa metimal tahal Betlehem be hokorong mak mu e metimal
savsav xil vus na mol-Sudah xil,
e ixo metimal ak, nisak ni suv toto tei mei istal ixo en.*

Xi ilaxat kuh mol-Isrel xil vus

ixoni moletin tei xa di milaxat kuh sipsip san xil.’” (Maeka 5:2)

7 Melele xa milonge mak, suv toto Herod xa Muholong mikes xuxus ni eilep xil ak tengan lamei visali. Di, misis pilei xil tengan lihiteni mini melengien xati vari xa xil latepus hitu ak testal rohon en. 8 Di, Herod misil xil labe Betlehem e biteni mi xil bitene, “Muha mulang kuhi ni horamue ak. E melele xa mukameti, mutilomun mei muhiteni minou tengan xa inou mun niha nimot mini.”

^c 2:3 Herod xa mahulong minexo vengan ien ti tavei tengan moletin ti namei naxolesi, e di mu vin ngan xil xa di lanem usili. Xosxa Herod minemi xa mol-Isrel xil labit lixolesi e liling suv toto tova nae, ma xi mikila ihu lelen mol-Isrel xil vus.

9-10 Melele xa eilep xil ak lalong sepinien na suv toto, laba tangan lakamet horamue ak. E melele xa di langgusil suse nae laba, hitu xa latpusi tetiamu melele xa lateti tamu e ist mistal rilomun. E melele xa lapus hitu ak, labesi xil pupu. Hitu ak diamu ni xil ba da kat e rute vari xa horamue da en. 11 Ma melele xa labe nim, lapus horamue del ninen Meri. E melele xa lapusi, latingeiril e lasa merereen mini. Di, laleh rat sanien hos nae xil e lasa ni mini. Xil lasa gol, forangkansen, e mir.^d 12 E vongien, Hi misep xol xil nggo metuveen tei xa linatilomun ti mun linave visal Herod. Ma xil langgusil suse sav ladilomun labe tim sae.

Hi Pol ni Suse tangan Iesu Ilesae Ihe Isip tangan Ngan Xil xa Labit Lavasi Linatal Xati Ti

13 Melele xa eilep xil ak ladilomun laba, masxaxa tei na Hi Suv mei mistal mi Siosep nggo metuveen tei e biteni mini bitene, “!Tamea! !Temanon, hur horamue xal ninen, e mutlesae muthe Isip! Mutiti rute ak ituxol melele xa inou nihit mutilomun en. Upol ni imak vengang xa, navehi ti, Herod ilang ves horamue ak tangan vahas vini.”

14 Misak ni, e vongien nen tak, Siosep mea po horamue, e del ninen, latlesae latbe kantri tahal Isip. 15 Latodi rute ak ba duxoh melele xa suv toto Herod xa Mahulong mat. Ngan ak mistal tangan vapol ni sepinien na Hi Suv xa tehiteni texo provet Hosea mei mistal be reitin xa bitene, “*Nakes natuxoli imea ra hal Isip.*” (Hos 11:1)

16 Melele xa Herod minem kila xa eilep xil tahal ist lateluvosi, ien mikat pupu. Ma, misemae ni moletin xil te vaeen nan tangan lihe metimal tahal Betlehem e ut xil mun xa di sangas tangan ha lihas malohos xil ngasen xa huram nae lu e be tan. Herod pol ni mak nggusil melele xati xa eilep xil tahal ist latehiteni mini xa hitu ak testal kokot en. 17 Ngan ak mistal tangan vapol ni sepinien xa Hi Suv tehiteni texo provet Seremiah mei mistal be reitin xa bitene,

18 “*Moletin xil tahal Rama^e lalong neta tei,
lalong isien tei xa nggeih di mistal.*

*Resel di midang pupu
ve horamue nan xil xa amat.*

*Ien ti tave tangan moletin ti napet rat nenemien nan,
vengang xa horamue nan xil latovuol mun.”* (Ser 31:15)

Hi Pol ni Suse tangan Iesu Itilomun ra Hal Isip

19 Melele xa xatel latdi tamu e kantri tahal Isip, Herod xa Mahulong mat. Ma masxaxa tei mei mistal mi Siosep nggo metuveen tei 20 e biteni

^d 2:11 Gol be hat tei xa minehin pupu xa, tetiamu, latepol ni mei tehe mane. Forangkansen e mir lube tut vatie ni lapol ni vokon ni. Mani te xatel vus be nesao e latehe sanien xa momal tangan lasa ni mi suv toto tei. ^e 2:18 Rama be rute tei xa be sangas ni metimal tahal Betlehem, e lanemi labit latetihin Resel, atou na Siekob, en.

mini bitene, “!Tamea! !Utel horamue xal ninen mutdilomun mutihe tan na mol-Isrel xil, vengon xa ngan xil xa latehit lihas vin horamue ak, lalel tuei.” ²¹Ma, Siosep mitamea, del horamue xal ninen latdilomun latbe Isrel.

²²E melele xa Siosep milongeong ni xa Arkelaos nggur vonine tamen, Herod xa Mahulong, mei be suv toto te provins tahal Sudea, xi ulin mikan tangan lathe rute ak. E Hi mun misel xati nggo metuveen tei tangan latnava ti Sudea. Ma latbe provins tahal Kaleli ²³e latdi rute ak e taon tahal Nasaret. Ngan ak misak ni naha xa Hi Suv tehiteni texo provet xil mei mistal be reitin xa bitene, “*Likesi ni ngan Nasaret tei.*”^f

Sion Baptaes Misak Mesen Suse na Iesu^g

3 ¹Huram holu mei mitavi, e moletin tei ba di uruvuol e provins tahal Sudea, hisen Sion. Xi di baptaes ni moletin xil e di bithiteni bit, ²“!Muhiles ra tesaen namim xil, vengon xa Hi Suv dat sangas vis xamim e bit mei vahe Suv Toto e meulien namim! ³Xi vari be ngan xa Hi tesep usili texo provet Aesea melele xa bit,

“Lalong rae tei mistal e uruvuol xa bit,

!Musak mesen suse na Suv!

!Mupol ni suse nan imal!” (Aes 40:3)

⁴Sion, eising nan lapol ni ni hil kamel e mituatu ni mavulut hilbe buluk. Anien an be kelmenamen e hani.^h ⁵Moletin xil hao di lateha tangan lateong ni. Rute langgo taon tahal Serusalem e rute sav xil mun langgo ut sav xil e provins tahal Sudea. E ngan teisav xil mun, langgo rute xil sangas ni Oeisal Sodan. ⁶E melele xa lapusi, labit rat tesaen nae mini, e Sion baptaes ni xil e Oeisal Sodan.

⁷Farasi e Sadusi xil holu mun lamei visal Sion tangan vabaptaes ni xil. E melele xa Sion pus xil, misepin nggeih mi xil bitene, “!Xamim munggoni vanut tetal sasa xil xa di langas vin moletin xil ni vulonge! ?Visi misel xat xamim tangan mulesae ra longpangasien xa Hi isa ni mi moletin xil te ut etan? ⁸Bos mak mu xa itiamu, mupol ni sexien xil xa ipisen ni xa mubiles ra tesaen namim xil ngamu. ⁹E munanenemi ti munahit mutit ihos vengon xa Ebrahim be vatit avu namim. !E-e! Nabiteni reitin mi xamim, Hi ikila isak ni hat xil ak mei lihe moletin xil xa labe vatimol na avu Ebrahim. ¹⁰Taxeak, akis mese tuai e vatit vatiee xil vus. E ngan xil xa latahur huit hosien ti, lite rat xil e liso ni ihe upang.

¹¹“Inou nabaptaes ni xamim ni oei tang tangan vapisen ni xa mubiles ra tesaen namim, e ngan xa itutou ni nou, xi ibaptaes ni xamim itel xat

^f 2:23 Latakil ti xa sepinien ak texo provet xave. ^g 3:0 Tumulen ak de Mak 1:1-8; Luk 3:1-18; e Sion 1:19-28 mun ^h 3:4 Kelmenamen be hisit grashopa tei xa eilep xa lakila lava ni, e hani be oei tei xa mikas xa sukabug xil di lapol ni.

Ninin Eo e upang. Xeihen nan mili navan, e natapin ti tangan name slev nan e naleh sandal nan. ¹²Xi bue xat xi ngamu tangan vaseti moletin xil vus. Xi ipol ni ixoni moletin tei xa po savel nan e di miso rerat utut uit ra valite. Utut uit xil xa labos, ileh viton ni ha ilingi e nim nen, e valite xa misa, itin ni ni upang tei xa mahulong xa misakras vamat.”

Sion Baptaes ni Iesu

¹³E melele nen ak, Iesu nggo provins tahal Kaleli e xi mun bemei e Oeisal Sodan tangan Sion vabaptaes ni. ¹⁴E melele xa Sion pusi, misak pisi tangan vahiles nenemien na Iesu bit, “!E-e! ?Xouk di omei visal nou veneh? Momal tangan xouk ubaptaes ni nou vengang xouk obe eilep mili nou.”

¹⁵E Iesu bit rilomun ni mini bit, “Bos xa ubaptaes ni nou taxeak. Vengang xa, imak, ti ralipol ni holesok xil vus xa imal pe met Hi.” Misak ni, Sion maen ni, e baptaes ni Iesu.

¹⁶E melele xa Sion baptaes ni Iesu bus, Iesu mea ra oei. Vatei takes, tilang hat misaha, e xi pus Ninin na Hi mingga merau nggoni mae e mei dotan en. ¹⁷E rae tei mistal nggo ut nesao bit, “Ngan ak be Natuxoli reitin xa eheien navan di en. Inou nabesi nou pupu ven.”

Temat Misak Pis Iesu

4 ¹Melele xa Iesu baptaes bus, Ninin Eo dela be uruvuol tangan vahur sakpisien vaxo he Temat. ²Di e uruvuol e di bal ni anien. Melengien hanutap lu (40) mei mitavi, e mae nggati tova tang. ³Di, Temat xa di misak pis moletin xil bemei visali. Xi biteni mi Iesu bit, “Xosxa reitin xa obe Nat Hi, ma usemae ni hat xil ak tangan lihiles mei lihe beret am.”

⁴E Iesu bit rilomun ni mini bitene, “!E-e! Ninapol ni ti, vengang xa Vanuvei Eo biteni bit,

‘Moletin misakras vameul e anien kestang.

Xi di meul e sepinien xil vus xa mistal nggo vulonge Hi.’ ” (Dut 8:3)

⁵Di, Temat nggur Iesu lube Serusalem, taon eo na Hi. Xi miling Iesu misoh e ut tei xa be nesao pupu e taep te Nim Eo. ⁶E melele xa ludi nesao, Temat biteni mini bit, “Xosxa reitin xa obe nat Hi, hut ihe tan. Vengang xa Vanuvei Eo na Hi biteni bit,

*‘Iahova misemae ni masxaxa nan xil
tangan lilaxat kuh xouk.*

Xil lipo xatuk ni hexil,

tangan xouk unatun lem ti e hat.’ ” (Sam 91:11-12)

⁷E Iesu bit rilomun ni mini bitene, “!E-e, ninapol ni ti! Vengang xa Vanuvei Eo biteni mun bitene,

ⁱ 3:13 Tumulen ak de Mak 1:9-11; e Luk 3:21-22 mun ^j 4:1 Tumulen ak de Mak 1:12-13; e Luk 4:1-13 mun

*‘Munasak pis Iahova ti xa be Hi namim
tengan mukameti xa xi di mi xamim.’ ” (Dut 6:16)*

⁸Di, Temat nggur Iesu lube vathu tei xa be nesao xa be nesao. E rute ak, pisen kantri xil vus te ut etan mini e neta xil xa bos di en. ⁹Xi biteni mini bit, “Holesok xil vus ak, nisa ni minuk xosxa utingeiril tang e umot minou.”

¹⁰E Iesu bit rilomun ni mini bitene, “!Setan, he reling nou! Ninapol ni ti vengan xa Vanuvei Eo biteni bit,

*‘!Umot mi Iahova xa be Hi nam
e uteong xat xi kestang!’ ” (Dut 6:13)*

¹¹Di, Temat be relingi, e masxaxa xil mei ladutou ni.

Iesu Pol Kokot ni Polien Nan e Provins tahal Kaleli

¹²^kMelele xa Iesu di tamu e uruvuol, milongeong ni xa Herod Antipas, xa be suv toto te provins tahal Kaleli, xi tetal xat Sion Baptaes e teso ni tehe nim te xeih. Ma, Iesu dilomun be provins tahal Kaleli. ¹³E xi tave ti mun metimal tahal Nasaret, xi ba sung di taon tahal Kapaniam xa be sangas ni Oei Kaleli. Taon ak de tan na vatimol na Sebulon xal Navtali tetiamu. ¹⁴Ngan ak mistal tengang vapol ni naha xa Hi tesepepin ni texo provet Aesea mei mistal be reitin xa bit,

¹⁵*“Nanggur longeongen tei ba mi moletin xil
xa ladi e tan na vatimol xil na Sebulon e tan na vatimol xil na
Navtali.*

*Longeongen ak iha mi ngan xil xa ladi sangas ni Oei Kaleli xa de ist ni
Oeisal Sodan.*

*Reitin, iha mi moletin xil tahal Kaleli, e rute xa ngan xil xa latave
Siu ti lapolu en.*

¹⁶*Ngan xil xa ladi e maluxoluken te tesaen,
xil lipus miehen na Hi xa mahulong.*

*Reitin, moletin xil xa lalonge, tetiamu lateti pe mamal te maten,
e taxeak, xil lipusi xa ut milan sung xiak.” (Aes 9:1-2)*

¹⁷E melele nen ak ba, Iesu ba di bithiteni mi moletin xil bit, “!Muhiles ra tesaen namim xil, vengan xa Hi Suv dat sangas vis xamim e bit mei vahe Suv Toto e meulien namim!”

Iesu Mikes Moletin Hat te Sar Meseoen tengang Lathusili

¹⁸^lVatei, Iesu mikakao nggusil seri Oei Kaleli. E melele xa mikakao ba, pus timue lu xa di luso net nalu be oei. Hisealu Saemon (xa laling hisen tei mun be Pita) e Andriu (xa be tunali), e lube moletin tesar meseo en.

^k 4:12 Tumulen ak de Mak 1:14-15; e Luk 4:14-15 mun ^l 4:18 Tumulen ak de Mak 1:16-20; e Luk 5:1-11 mun

¹⁹E Iesu biteni mi xalu bit, “Lumei luhusil nou. Xosali di mulihi meseo xil tang, e inou nisak ni xamil mulihi moletin xil.” ²⁰Vatei takes, lustokovein net xil nalu e lunggusili.

²¹E melele xa latkakao latoba, Iesu pus timue lu mun, hisealu Tiemes xal Sion, xa lube nat Sepeti. Ludi bot del tamealu e di latdil pilei ni net natel xil. E melele xa Iesu mikes xalu, ²²vatei takes, lube reling bot e tamealu, e lunggusil Iesu.

Iesu Pol ni Polien na Hi e Provins tahal Kaleli

²³^mMelele xa Iesu mikes moletin hat ak bus, latnggusili e labe rute xil holu e Kaleli. E rute xil vus xa laba en, Iesu pispisi ni moletin xil e nim te pispisien na Siu xil. Xi di bithiten longeongen hos xa Hi di bemei tangan vahe suv toto na moletin nan xil, e di dal rerat meseien xil vus ra moletin xil. ²⁴E longeongen usili mikapis e provins tahal Siria mun. Misak ni, moletin xil te rute ak laleh ngenexil xa lamesei ni meseien savsav xil: ngan xil xa tenbexil pangas, ngan xil xa ninin tesa xil ladi e xil, ngan xil xa lamermesil, e ngan xil mun xa rut tenbexil mat. Laleh xil lamei visal Iesu e xi midal rat xil vus ra meseien nae. ²⁵E melele xa Iesu mikakao, vanut moletin xil holu langgusili. Xil langgo provins tahal Kaleli e provins tahal Sudea. Langgo taon tahal Serusalem, e provins tahal Dekapolis. E langgo ut xil mun xa lade ist te Oeisal Sodan.

E Hu Tei, Iesu Pispisi usil Sexien Xil xa Momal Pe Met Hi

5 ¹⁻²Melele xa Iesu pus tatit moletin xil xa eilep xiak, xi be nesao e hu tei del moletin nan xil e dotan tangan vapispisi mi xil.

Pispisien usil Hisit Moletin Eah iaxa Hi Ituxol Xati

- ³Iesu biteni mi xil bit,
 “Tuxolxatien iti mi ngan xil xa lamei vis Hi del he hon tang,
 vengon xosxa imak, ma xi mei ihe suv toto nae e ilaxat kuh xil.
⁴Tuxolxatien iti mi ngan xil xa di ladang,
 vengon xa xosxa imak, ma Hi ipet rat nenemien nae.
⁵Tuxolxatien iti mi ngan xil xa labe hanmerou e nenemien nae be tan,
 vengon xa xosxa imak, ma Hi isa rute xil vus e ut etan ihe nae.
⁶Tuxolxatien iti mi ngan xil xa iexil bei pupu ni tangan limal pe met Hi,
 vengon xa xosxa imak, ma xi ipol ni mei ihe reitin e meulien nae.
⁷Tuxolxatien iti mi ngan xil xa esaeen nae di e mosav xil,
 vengon xa xosxa imak, ma Hi ipisen sexien te esaeen mi xil mun.
⁸Tuxolxatien iti mi ngan xil xa langgusil xat Hi del nenemien xa memese,

^m 4:23 Tumulen ak de Luk 6:17-19 mun ⁿ 5:3 Tumulen ak de Luk 6:20-23 mun

vengan xa xosxa imak, ma xil lipus xat Hi ni mete.

⁹ Tuxolxatien iti mi ngan xil xa di laling tomat di mi moletin xil, vengana xa xosxa imak, ma likes xil ni horamue xil na Hi.

¹⁰ Tuxolxatien iti mi ngan xil xa di langgur longpangasien vengana xa di lapol ni naha xa momal pe met Hi, vengana xa xosxa imak, ma Hi mei ihe suv toto nae e ilaxat kuh xil.

¹¹ “Tuxolxatien iti mi xamim melele xa moletin xil di lasep xar ba ni xamim, di lasa longpangasien mi xamim, e di lasep usil xamim ni luvoson xil hao xa misa pupu vengana xa di munggusil xat nou. ¹² Reitin, texot sexien nen xil ak, latesa longpangasien teha mi provet xil xa latetiamu ni xamim. E muhesi xamim tang vengana muhur huite teni sung xa ihe eilep e ut nesao.”

Pispisien Usil Rin xa Moletin Xil na Hi Langgoni Sol e Laet e Ut Etan

¹³ ^o Iesu misepin rilomun bit, “Xamim munggoni sol xa lalingi del xat moletin xil te ut etan. ?E xosxa neta xa misak ni sol ak bos be relingi, ma lipol ni mei ihos rilomun itep?^p !Lasakras lapol ni vamak! Sol xa tavos ti, lasakras lapol ni ti neta ni. Bos tengan liso ni iha e moletin xil ti lihe tan en.

¹⁴ “Xamim munggoni laet tei xa di mileluv ba mi moletin xil e ut etan. E nggoni ngan taxa taon tei xa de nesao e hu tei misakras vaxus, neketen namim mun, moletin xil lipus kila. ¹⁵ Moletin tovuol xa vasahan laet, ti, vaha vaso xati ni pesin tova. !E-e! Xi di misoxolen ni de nesao tengan ti ileluv kuhi e vangit nim ve moletin xil xa ladi en. ¹⁶ Nggusil sexien nen tak, laet te neketen namim ileluv kuhi iha mi moletin xil. Imak, ma melele xa moletin xil lapus sexien hos xil namim, xil ti lipet rat his Hi Tamemim xa de ut nesao.”

Pispisien usil Rae Xil na Hi

¹⁷ Iesu pispisi mi moletin xil bit, “Munanemi ti munahit inou namei tengan naso rerat Rae xil na Mosis e pispisien xil na provet xil vaha. !E-e, tamak ti! Natamei ti tengan naso rerat xil. E namei tengan nisak ni naha xa rae xil ak di lasep usili mei ihe reitin. ¹⁸ Reitin mak nabiteni mi xamim xa holesok xil vus xa di e rae xil na Hi, reitin, mavulut sepinien xil vus xa latetisi misakras vakesae. Vatova, ut nesao e ut etan lalikesae, e sepinien xil na Hi misakras vakesae ituxoh melele vari xa ipol vuol ni polien xil teni. ¹⁹ Mak ma, ngan xil xa langgur xoteh rae tei takes na Hi

^o **5:13** Tumulen ak de Mak 9:50; e Luk 14:34-35 mun **P 5:13** Sol xa tetiamu tenaxoni ngan xil ti te xosali, tenamese ti. Tesak ni melele xa temer vuteili, ma neta xa tesak ni sol ak tehos tehe reling.

xa hokorong tang e lapispisi mi moletin sav xil tangan lipol ihusili, ma, e melele xa Hi te ut nesao mei ihe Suv Toto na moletin xil, xil mei lihe neta sav tang. E ngan xil xa di lalong xat rae xil na Hi e di lapispisi mi moletin sav xil tangan lipol ihusili, xil mei lihe moletin xil xa latellep e melele nen ak. ²⁰Vengan nabiteni mi xamim, xosxa momalen namim pe met Hi nali ti momalen na tisa xil te Rae xil na Mosis e momalen na Farasi xil mun, ma musakras mupus ti rute xa Hi be Suv Toto en.”

Pispisien usil Tesaen te Ekaten

²¹Iesu biteni mun mi xil bit, “Xamim mutelonge xa Mosis tesa rae ak mi avu namim xil tetiamu tehit, *‘Munahas vin ti moletin,’* (Eks 20:13) e moletin xa ipol ni imak ha lilepisi e lisa longpangasien mini. ²²E inou nabiteni mi xamim xa moletin xil vus xa iexil iat tua nae xil, Hi ilepisi xil e isa longpangasien mi xil. Reitin, xosxa moletin tei biteni mi tuneli bit, ‘vatum tovuol’, lihur moletin ak ha lilepisi e koten na Siu xil e lisa longpangasien mini. E xosxa moletin tei biteni mi tuneli bit, ‘otalang’, xi di nggusil suse tangan ha ihe Upang xa misakras vamat.

²³“Mak, ma xosxa xoux uha tangan osa sanien nam mi Hi e hor te sanien, e e rute ak, onem rilomun ni neta tei xa moletin sav bit otepol ni mini xa tenamal ti, ²⁴ustokovein sanien nam iti nga rute ak sangas ni hor te sanien. Ti, uha mu userep rin nam itela. E melele xa userep xamil ivus, utilomun uha e usa sanien nam sung mi Hi.

²⁵“E xosxa moletin tei bit vahuruk ove kot ve neta ngan xa xi bit otepol ni mini, ma utemanon ha userep rin nam itela melele xa di tamu munggusil suse tangan mulehe von koten. Maxani, xosxa onapol ni ti, melele xa multuxoh kot, xi ilinguk e he moletin te lepisien. Ma moletin ak mikila ilinguk e he polis, e polis mikila ilinguk e nim te xeih. ²⁶Reitin li nabiteni minuk, xoux utat rute ak e osakras ova ha vem vamase ha vuma ... uxal rat vuol ni faen xa lalingi di xatuk.”

Pispisien usil Sexien te Kanen ni Atou mu Tiramue na Mosav Xil

²⁷E Iesu pispisi mun mi xil bitene, “Xamim mutelonge xa Mosis tesa rae ak mi avu namim xil tetiamu tehit, *‘Munakan ni atou mu tiramue na mosav ti.’* (Eks 20:14) ²⁸E inou nabiteni mi xamim xa melele xa moletin tei xa miteli ngamu pus atou tei e ngguri e nenemien nan tang, e pe met Hi, nggoni ngan xa mikan ni ngamu vengan pol misa tuei dela e nenemien nan.

²⁹Xosxa metom metu isak ni xoux umot e tesaen, ukis rati e uso ni iha. Ihos mak mu xa rut tenbom tang ikesae, ili ngan xa liso sen tenbom xil vus ha ikesae e Upang xa misakras vamat. ³⁰E xosxa hem metu isak ni xoux umot e tesaen, uta xotehi e uso ni iha. Ihos mak mu xa rut tenbom tang ikesae, ili ngan xa liso sen tenbom xil vus ha ikesae e Upang xa misakras vamat.”

Pispisien usil Sexien xa Moletin Miteli, Di, Mistokovein Atou Nan

³¹ Iesu pispisi mun mi moletin xil bitene, “Xamim mutelonge xa Mosis tesa rae tei mi avu nar xil tetiamu tehit, *‘Moletin xa bit vastokovein atou nan, isa Setifiket te Silaen mini. Ti, mikila istokovein ni sung.’* (Dut 24:1) ³² E inou nabiteni mi xamim xa melele xa tiramue tei mistokovein atou nan, xa tamaen xi ti mi tiramue sav, tiramue ak di pol ni tesaen pe met Hi. Vengan naha xa tiramue ak di pol ni isak ni atou ak ha ihur moletin sav xa be tesaen pe met Hi. E moletin xa nggur atou ak, pe met Hi nggoni ngan taxa di mikan ni atou na tiramue ak.”

Pispisien usil Sexien xa Moletin Di Pol ni Hitxatien Tei

³³ Iesu pispisi mun mi moletin xil bitene, “Xamim mutelonge xa Mosis tesa rae tei mi avu nar xil tetiamu tehit, *‘Munaluvos ni his Hi ti e sepinien xil namim, e mupol vuol ni naha xa mutehit xati pe met Hi tengen mupol ni.’* (Nam 30:2) ³⁴ E inou nabiteni mi xamim xa munasuv xat hitxatien namim xil ti natel his ut nesao, vengan xa rute ak be vontoen na Hi.^r ³⁵ E munasuv xati ti mun natel his ut etan vengan xa be von kaele Hi.^s E munasuv xati ti mun ni his Serusalem, vengan be taon na Hi xa be Suv Toto.^t ³⁶ E munasuv xati ti mun ni vatummim vengan musakras muviles hilimim tei takes mei vamieh mu vamaluxoluk. ³⁷ Mak ma melele xa mubit neta tei, muhiteni tang muhit, ‘Io, be reitin,’ mu, ‘E-e, tave reitin ti.’ Vengan xosxa musuv xat sepinien namim ni neta tei, ma sexien ak nggo Temat vari tang.”

Pispisien usil Sexien xa Moletin Di Misa Rilomun ni

Pangasien mi Mosav Tei xa Pol Misa Mini

³⁸ Iesu pispisi mun mi moletin xil bitene, “Xamim mutelonge xa Mosis tesa rae tei mi avu nar xil tetiamu tehit, *‘Xosxa moletin tei purun met moletin sav, ma ngan xil te lepisien lipurun meten. E xosxa moletin tei diroh luh moletin sav, ma xi mun, litiroh luhon.’* (Eks 21:24) ³⁹ E inou nabiteni mi xamim xa munasa rilomun ni ti sexien tesa mi moletin tei xa pol misa mi xamim. Mak ma, xosxa moletin tei mei mileves vim metu, umaen ni mun ileves vim meil. ⁴⁰ E xosxa moletin tei mingguruk mube kot ve kaon nam, e nggeih xatuk tangan usa eising nam mini ixo kaon nam, ma umaen ni ihur kot nam te masoh mun. ⁴¹ Xosxa moletin tei te vaeen nggeih xatuk tangan upo ateli nan ha ituxoh kilomita tei, xouk upoe sung ha ituxoh kilomita ihe lu. ⁴² E xosxa moletin tei dak kesuk ve neta ngan, usa ni mini. E melele xa moletin tei ien bei vahur neta tei nam vahe vuteili tang, onakenin ni ti, e umaen ni tang mini.”

[¶] 5:31 Tumulen ak de Mat 19:9; Mak 10:11-12; e Luk 16:18 mun [†] 5:34 Aes 66:1; Tiem 5:12 [§] 5:35 Aes 66:1 [‡] 5:35 Sam 48:2 [¶] 5:38 Tumulen ak de Luk 6:29-30 mun

Pispisien usil Sexien te Eheien xa Moletin Ipiſen ni mi Elu Nan Xil

⁴³ Iesu pispisi mun mi xil bitene, “Xamim mutelonge xa Mosis tesa rae ak mi avu namim xil tetiamu tehit, *‘Iemim ihei tuemim xil.’* (Lev 19:18) E, *‘Musa ni elu namim xil.’*”⁴⁴ E inou nabiteni mi xamim xa iemim ihei elu namim xil e ti musis ve ngan xil di lapurun xamim. ⁴⁵ Ixo sexien ak, mupisen ni xa mube horamue xil na Tamemim xa de ut nesao. Vengan xa xi iaxa di pol ni eai misinasin xat moletin tesa xil del ngan xil mun xa labos. E misak ni us mus tengan vakas naho sa ngan xil xa lamal pe meten e ngan xil mun xa latamal ti. ⁴⁶ Xosxa eheien nam di mi ngan xil kestang xa eheien nae di e xouk, onemi obit Hi isa sanien tova minuk ven? !E-e, tamak ti! !Vengan ngan xil mun xa di laleh takis xil di lapisen eheien mi tua nae xil! ⁴⁷ E xosxa di onggur pilei tumali xil kestang, sexien ak ihos ili sexien na mosav xil itep? Vengan ngan xil mun xa latakil ti Hi di lapol ni sexien ak.

⁴⁸ “E xamim, bos xa mumal tevi ixoni ngan taxa Tamemim xa de ut nesao momal tevi.”

Pispisien usil Sexien xa Lasa Tutouen mi Hooe Xil

6 ¹ Iesu pispisi mi moletin xil bit, “Melele xa mupol ni sexien xil xa Hi di biteni bit lamal pe meten, mulaxat kuh xamim tengan munapol ni ti pe met moletin xil tengan limerere ni xamim ven. Vengan xa xosxa mupol ni imak, ma Tamemim xa de ut nesao nasa ti huite teni mi xamim.

² “Mak ma, melele xa musa neta ngan mi hooe tei, munapol ni ti naxoni ngan xil xa lamese nggo hilibexil tang. Vengan melele xa di lasak mesen xil tengan lasa neta tei, xil labe nim te pispispian mu labe suse xil xa mahulong, e di lapol ni moletin te polien nae labui amaru tengan ikes viton moletin xil limei e mei lipus naha xa xil lipol ni e lisa merereen mi xil. Nabiteni reitin mi xamim, xil di tuei langgur huite ve naha xa lapol ni xiak, e linahur ti mun huite teni e ut nesao. ³ E melele xa mututou ni hooe xil, mupol xusus ni tang e suse xa tua hos namim xil linakil ti vari. ⁴ Imak, ma moletin xil linakil ti tutouen xa di musa ni mi mosav xil. E Tamemim xa pus naha xa moletin xil di lapol xusus ni, xi vari iaxa isa huite teni mi xamim.”

Pispisien usil Sexien te Sisen

⁵ Iesu pispisi mi moletin xil mun bitene, “Melele xa musis, munapol ni ti naxoni ngan xil xa di lapol ni nggo hilibexil tang. Vengan iexil bei tang

† 5:43 Tumulen ak de Luk 6:27-28,32-36 mun † 5:43 Latakil ti xa sepinien xati ak texo xave, e Sam 139:21-22 di biteni bit, *‘Usa ni ngan xil xa labe elu mi Hi.’* † 6:5 Tumulen ak de Luk 11:2-4 mun

tengan lasoh e lasis e nim te pispisien xil mu e seri suse xil xa mahulong tangan moletin xil holu lipus naha xa di lapol ni. Nabiteni reitin mi xamim, xil di tuei langgur huite ve naha xa lapol ni xiak. ⁶E melele xa musis mi Hi, ihos mak mu tangan muhe nim, mukoe xol puiteh, e musis mi Hi Tamemim xa moletin xil lasakras lapusi. E Tamemim xa di pus naha xa moletin xil di lapol xuxus ni, xi vari isa huite teni mi xamim.

⁷E melele xa di musis, munasepin ti natel sepinien xil holu xa be neta sav tang naxoni ngan xil xa latakil ti Hi reitin. Vengan ngan xil ak di lanemi labit hi nae xil liteong ni sisen nae xil melele xa limangang ihe eilep ni sepinien holu. ⁸Reitin, munapol ni ti naxoni xil, vengan melele xa mutasis ti mu, e Tamemim mikil vuol ni ngamu naha xa mube tamure ni.

⁹“Mak ma, melele xa musis, muhiteni imak,

‘Hi Tamemem xa ode ut nesao,

hisom be eo e momal tangan musa merereen minuk.

¹⁰ Masis tangan mei uhe Suv Toto namem e ulaxat kuh xamem.

E nenemien xil vus nam istal ihe reitin e ut etan ixoni ngan xa testal ngamu e ut nesao.

¹¹ Usa anien li mi xamem

ipin te melengien xil vus.

¹² Onaketeh ti nasa mun mi xamem ve holesok xil xa mapol ni tamal ti.

Upol ni ixoni ngan xa xamem mun di maketeh bos rilomun ni ngan xil xa di lapol misa mi xamem.

¹³ Onamaen sakkpisien xil te xeih ti namei e xamem, e usikoe xol xamem ra he Temat.^y

¹⁴“Xosxa mosav tei pol misa mi xamim e muketeh bos rilomun mini, ma Hi Tamemim mun xa de ut nesao iketeh ihos ni xamim ve naha xa mupol ni. ¹⁵E xosxa munaketeh ti navos mi mosav xil, ma Hi Tamemim mun naketeh ti navos mi xamim.”

Pispisien usil Sexien Halen ra Anien ve Sisen

¹⁶Iesu pispisi mi moletin xil mun bitene, “Melele xa mubal ra anien ve sisen, munapol ni ti naxoni ngan xil xa di lapol ni nggo hilibexil tang. Vengan xa melele xa labal ra anien, xil di lapol ni valnaoxil mikenu tangan moletin xil lipus kila xa mae nggat pangas xil. Inou nabiteni reitin mi xamim xa xil langgur huite teni ngamu. ¹⁷E melele xa mubal ra anien

^y 6:13 Tetiamu, melele xa moletin xil latetis rilomun ni vanuvei na Matiu, lateso rin ni sepinien ak xa bit, “Ve lelaxatien, xeihen e miehien de xouk vehakut e misakras vavus. Reitin.”

ve sisen, bos mak mu tangan mukas valnaomim e musak kuh hilemim ixoni ngan taxa di mupol vehakut ni. ¹⁸Imak, ma mosav xil linapus kil ti xa di mubal ra anien. E Hi Tamemim xa moletin xil lasakras lapusi, xi kestang ipus kila. Reitin, Hi Tamemim xa di pus kil naha xa moletin xil di lapol xuxus ni, xi vari iaxa isa huite teni mi xamim.”

Pispisien usil Nenexoen ve Holesok Xil te Ut Etan

¹⁹ⁱJesu pispisi mi moletn xil mun bitene, “Munaserep holesok namim xil ti nahe holu e ut etan. Vengan holesok xil te ut etan ak, pepepi xil e turara likila lipangei, e moletin te kanen mun mikila ihe nim e ha ikan ni. ²⁰E ihos mak mu tangan muserep holesok namim ihe holu e ut nesao. Vengan e rute ak, pipepi xil e turara lasakras lapangei, e moletin te kanen mun misakras vahe nim e ha vakan ni. ²¹Vengan nenemien namim iti e rute xa di muserep holesok namim xil iti en.

²²“Metemim nggoni laet te tenbemim. Xosxa metemim bos, ma muti e miehen e tenbemim mikila ipol ni sexien xil xa bos. ²³E xosxa metemim isa, ma muti e maluxoluken e ti mupol ni sexien tesa xil. E xosxa miehen xa vate xouk be tovuol, ma maluxoluken xa ite meulien nam ihe eilep pupu.^a

²⁴E Iesu biteni bit, “Moletin tei misakras vapol mi masta vahe lu (2). Maxani, ien iat tei e ien ihei ngan tesav; mu nenemien nan iti tei ixeih, e isin ni ngan tesav. Ve rin ak, musakras muhusil xat Hi vatel holesok xil te ut etan.

²⁵“Ma vengon rin ak be reitin, bos tangan munanexo ti ve naha xa mua ni mu naha xa mumu ni, mu naha xa musing xol tenbemim ni. ?Midep, meulien nar be te anien en tang? ?Mu tenbexir be tangan taxa ti rasing xole? !E-e, tamak ti! Meulien xa di e xamim bos mili anien e naha xa di musing ni. ²⁶Mupus pis tuman xil xa di langga xolol. Xil latalih ti neta, e lataserep ti anien ae vati e povah mae xil. E tave ti neta xa latapol ni ti, e Tamemim xa de ut nesao iaxa di bangan xil. E pe met Hi, xamim mubos mak mu muli tuman xil ak. Ma mukil kuhi xa xi ilaxat kuh xamim. ²⁷Nenexoen ve neta ngan misakras vaso rin ni haoa tei mun vate meulien namim.

²⁸“?Mak ma, veneh iaxa di munexo e rin te eising? Munem pis hungovae xil xa di lameul. Xil latapol ti e latatili ti eising nae. ²⁹E nabiteni mi xamim xa suv toto Solomon tetiamu, eising nan xil tehos xa tehos, e hungovae xil ak, lasing xol xil bos mak mu lali. ³⁰Hi mising xol

^z 6:19 Tumulen ak de Luk 12:33-34; 16:13; e 12:22-31 mun ^a 6:23 Miehen e maluxoluken lube vole usil sexien nar xil. Melele xa rapol ni sexien xil xa bos, ngan ak di pisen ni xa radi e miehen na Hi. E melele xa rapol ni sexien xil xa misa, ngan ak di pisen ni xa radi e maluxoluken.

hungovae xil ak bos xa bos, tave ti neta xa di lameul usil suse melengien tei takes, di, e melengien sav nen, lameles e lakiri. Di, ladaveas viton ni e laso ni be upang. ?E xosxa Hi di mising xol xil mak, munemi mubit misakras vasing xol xamim vamaq? !Ei, neketen namim hokorong tova tang!

³¹Ma munanexo ti ve naha xa muan ni, ve naha xa mumu ni, mu ve naha xa musing ni. ³²Vengan hisit nenexoen xil xa mak be na ngan xil xa latakil ti Hi reitin. Vengan Hi Tamemim mikil vuol ni holesok xil vus xa mube tamure ni e meulien namim. ³³E ngan xa eilep mak mu iaxa mumaen Hi mei ihe suv toto e meulien namim e mupol ni naha xa momal pe meten. Melele xa mupol ni imak, holesok xil mun te meulien, Hi isa ni mi xamim. ³⁴Ma munanexo ti mun ve neta xil xa mulehi visuvong, vengan mukila munem usili visuvong sung. Vengan sakpisien xil xa muhisu mini xosali, pipin te xosali. Munaleh nenexoen xil te visuvong ti namei nahe te xosali.

Pispisien usil Rin xa Linalepis Mosav Xil Ti

7 ¹Iesu pispisi mun mi moletin xil bitene, “Onalepis moletin sav ti tangan opisen tesaen nan xil. Vengan xosxa upol ni imak, ma Hi mun ilepis xouk tangan ipisen tesaen nam xil. ²Vengan Hi ilepis xouk ixo hisit sexien taxa xouk di opol ni mi moletin sav. E sexien xa di osikel ni mosav xil, Hi isikel ni xouk ixoni.

³“?Veneh ma di opus kil saxut liei tei xa hokorong tang xa de met tumeli, e otapus kil ti vari merut liei xa mahulong xa de metom?^c

⁴?Veneh ma di osis tumali obit, ‘Tua li, maen nou namur rat saxut liei xai ra metom,’ melele xa merut liei tei xa mahulong dat e metom? ⁵Xouk di opol ni sexien hos xil nggo hilibom tang. Bos mak mu tangan upo rat merut liei xa da xat metom, ti, uketeh kuhi sung tangan ukila uhur rat saxut liei ra met tumali.

⁶“Holesok eo na Hi, munasa ni ti mi kuli xil, maxani, lihiles e linggas rilomun ni xamim. Reitin, munaso holesok xil ti xa bos mi vueili xil vengani lihe tan tang en.”^d

Pispisien usil Sexien xa Rasis Hi ve Neta Ngan

⁷Iesu pispisi mi moletin xil mun bitene, “Xosxa iem ihei neta ra Hi, usisi, ma isa ni minuk. Reitin, xosxa ulang vesi, ma ukameti. Sisen nam ixoni ngan taxa ti urei puiteh na Hi, ma xi isaha minuk. ⁸Vengan moletin

^b 7:1 Tumulen ak de Luk 6:37-42 mun ^c 7:3 Koute te liei xalu ak be tesaen. ^d 7:6 Nggo vole ak, Iesu di mipispisi xa melele xa di osa nenemien eo xil na Hi xa bos pupu mi ngan xil xa latamese ti pe met Hi, vengani xa linem male ni tang e lihiles lipurun xamim mun tang. ^e 7:7 Tumulen ak de Luk 11:9-13 mun

xil vus xa di lasisi ve neta ngan, xil di langguri; ngan xil xa di lalang ves neta ngan, lakameti; e puiteh di misaha mi ngan xil xa di laresi.

⁹“?Visi e xamim tata xil mikila vasa meralihat tei mi horamue nan melele xa misisi ve anien? ¹⁰?Mu misa tetal sasa tei mini melele xa misisi ve meseo? ¹¹Ma, tave ti neta xa mube moletin tesa xil, e mukil kuh sexien mak xa ti musa sanien xa bos mi horamue namim xil. ?E midep ni sexien na Hi Tamemim xa bos pupu xa de ut nesao? Sexien nan bos mili sexien namim, e isa holesok xil xa bos mi ngan xil xa ti lisisi.”

Pispisien usil Suse xa Moletin Ihusili tangan Ihe Ut Nesao

¹²^fE Iesu biteni mun mi moletin xil bit, “E holesok xil vus xa di mupol ni, mupol ni mi moletin sav xil ixoni ngan taxa iemim bei tangan xil lipol rilomun ni mi xamim. Vengan xa nenemien ak be vatite te Rae xil na Mosis e Tisen na provet xil tetiamu.”

¹³Di, Iesu biteni bit, “Xamim, suse tangan muve ut nesao tave temale ti. Bos tangan muxo puiteh te suse ak xa hokorong. Vengan puiteh tei mun xalu xa eilep da, e moletin xil holu iaxa di langgo en e di langgusil suse nen xa be temale tang. E e hoxalit suse ak, xil likamet longpangasien xa mahulong pupu. ¹⁴E puiteh xa be te suse xa nggeih xa hoxalite teni be meulien sal, puiteh ak hokorong tang. Moletin xil di lalang vesi, e vahis tang likameti e lixo en.”

Pispisien usil Rin xa Itep iaxa Lipus Kil Provet te Luvosen Xil

¹⁵^gIesu misel xat moletin xil bit, “Mulaxat kuh xamim tangan provet xil te luvosen mei linaluvos xamim ti. Vengan xil langgoni sipsip xil xa labos e lamerou nggo hilibexil tang. E e tinexil, xil langgoni kuli reran xil xa lasa xa di langas purun moletin xil. ¹⁶Xamim mupus kil xil ixo huite te meulien nae. Moletin misakras valeh huit tavu ra vatit ai, mu huit mango ra vatit vilu.^h ¹⁷Usil rin ak, vatiei xil vus xa bos di laso huite xil xa bos, e vatiei xil xa misa di laso huite xil xa misa. ¹⁸Vatiei xil xa bos, lasakras laso huite xil xa misa, e vatiei xa misa lasakras laso huite xil xa bos. ¹⁹E vatiei xil vus xa lataso huite ti vahos, lita rati e ha liso ni ihe upang. ²⁰Usil sexien ak vari, mupus kil provet te luvosen xil ak ixo huite te meulien nae.

²¹“Moletin xil hao xa, taxeak, di lakes nou ni ‘suv’, xil linava ti rute xa Hi te ut nesao be Suv Toto en. Ngan xil kestang xa di lapol ni naha xa Tata navan e ut nesao ien bei tangan xil ti lipol ni, xil iaxa ha liti visali. ²²E Melengien te Lepsien,ⁱ moletin xil hao limei visal nou e ti lisepin

^f 7:12 Tumulen ak de Luk 13:24 mun ^g 7:15 Tumulen ak de Luk 6:43-44; e 13:25-27 mun

^h 7:16 Sepinien xati teni bit, “moletin misakras valeh huit grep ra vatiei xa sanute di en, mu huit fik ra vatiei mun xa misa.” ⁱ 7:22 Tumulen ak de Rev 20:11-15 mun

e rin nae lihit, ‘!Suv, Suv! ?Midep? E hisom matehit rat sepinien na Hi, matehol rerat ninin tesa xil, e matepol ni merekel xil holu.’ ²³Ti, inou nihiteni mi xil kekes nihit, ‘!Muhe reling nou xamim xa di mupol misa! !Natakil ti vari xamim!’ ”

Pispisien usil Rin xa Meulien Nar Ihusil Sepinien na Hi Itep

²⁴JDi, Iesu misepin kor mi moletin xil nggo vole tei bit, “Xosxa xamim mulong sepinien navan xil ak e ha mupol ihusili, ma xamim munggoni moletin tei xa be metisou xa mikili ni nim man de tan tei xa nggeih.

²⁵Us mus, oei mileh be eilep, e votiang bas nim ak, e tameru ti vengan misoh e tan xa nggeih. ²⁶E xamim xa di mulong sepinien navan xil ak e mutahusili ti, munggoni unu tei xa mikili ni nim man dat suhon tang.

²⁷Us mus, oei mileh be eilep, e votiang bas nim ak. !Ma nim man meru e mikiri lel vari tang!”

²⁸Melele xa Iesu pispisi mi tatit moletin xil ak bus, xil lamesep pupu ve pispisien nan xil. ²⁹Vengan xa xi pispisi mi xil nggoni ngan xa pispisien nan xil nggo vulonge Hi vari tang. Pispisien nan xil taxoni na tisa xil te Rae xil na Mosis ti xa dit labit rilomun ni sepinien na tisa sav xil tang.

Iesu Dal Rat Moletin Tei ra Meseien Leporsi

8 ¹^kMelele xa Iesu mipispisi mi moletin xil bus, xi bemei etan ra hu ak, e tatit moletin xil langgusili. ²Di, latemanin, moletin tei xa meseien lepori da en bemei e hilaep te xil, mitingeiril pe met Iesu, e biteni mini bitene, “Suv, xosxa iem bei li, xouk ukila upol pilei ni hilbeok mei vamese rilomun.”

³Ma, Iesu mite hen duxoli e biteni mini bit, “Bos, ieok bei nipol ni. !Omese rilomun!” Vatei takes, moletin ak, meseien nan be relingi e hilben mei memese rilomun. ⁴Di, Iesu biteni mini bitene, “!Uteong ni nou! Onahiteni ti mi moletin tova naha xa mistal ni xouk. Uha upisen xouk mi pris tei e Nim Eo, e usa ni mi Hi sanien xa Mosis tesemaen ni moletin xil tengang lisa ni. ^l Sexien nam xil ak ipisen ni mi xil xa tenbom bos ngamu e omese rilomun.”

Iesu Nggur Rat Meseien ra Slev Tei na Vat na Moletin Xil te Vaeen tahal Rom

⁵^mIesu mikakao be taon tahal Kapaniam. E melele xa mistal en, vat na moletin xil te vaeen tahal Rom bemei visali e misis tutouen mini bit, ⁶“Suv li, slev tei navan de tim e di longpangasi xi holu. Rin tei mat e da nga voninen.”

J ^{7:24} Tumulen ak de Luk 6:47-49 mun ^k **8:1** Tumulen ak de Mak 1:40-45; e Luk 5:12-16 mun ^l **8:4** Lev 14:1-32 ^m **8:5** Tumulen xa de Luk 7:1-10 mun

⁷Ma Iesu biteni mini bit, “Niha nihur rat meseien nan ihe relingi.”

⁸E vat ak bit rilomun ni mini bit, “O suv, onanexo pupu ti venou vengan xa natapin ti tangan mei ove tim savan. E nakila xa xosxa usepin tang, ma slev navan ilonge ihos rilomun. ⁹Vengan xa eilep navan da, e inou mun nabe vat na moletin xil te vaeen. Misak ni, melele xa nabiteni mi tei e xil nabit, ‘He inggaxor,’ ma xi ba. E melele xa nabit, ‘Amei,’ xi bemei. E melele nabiteni mi slev navan nabit, ‘Upol ni netak,’ ma mipol ni.”

¹⁰Melele xa Iesu milong sepinien nan, mitemanin ni e biteni mi ngan xil xa di langgusili bit, “Reitin mak, nabiteni mi xamim xa, e rin na mol-Isrel xil, natakameti mu moletin tova xa neketen nan nggeih vaxoni ngan Rom ak. ¹¹E melele xa Hi mei ihe suv toto, xi ipol ni anien tei xa mahulong itel moletin nan xil. E melele nen ak, moletin xil holu xa latave Siu ti mei lianien vituei itel Ebrahim, Aesak e Siekob, avu nar xatel tetiamu. ¹²E holu e mol-Isrel xil xati, Hi iso rerat xil lihe hale e rute tei xa maluxoluk, e xil ti limuis, e ti lingas luhe ve longpangasien nae xil.”

¹³Di, Iesu biles e biteni mi vat ak bit, “Utilomun uhe tim. Holesok xil istal ixoni ngan xa di oneket en.” E melele nen ak vari, slev na vat ak, tenben bemei bos rilomun.

Iesu Mileh Rerat Meseien ra Moletin xil Holu

¹⁴ⁿMelele xa Iesu duxoh tim sa Pita, be nim e pusi xa avu kokon nan di pat de voninen, ven mitin. ¹⁵Melele xa pusi mak, Iesu mite hen duxol he tovoli ak. E melele xa duxoli, meseien nan be relingi e mitamea. Di, tovoli ak nggur rut anien tei e misa ni mi Iesu.

¹⁶Melele xa meteneai be tan, moletin xil laleh ngan xil xa ninin tesa di e xil, e Iesu nggol rerat ninin tesa xil ak labe reling xil nggo sepinien nan kestang. E ngan xil xa lamesei, xi dal rat xil vus ra meseien nae. ¹⁷Iesu pol ni mak tangan vasak ni naha xa Hi tehiteni texo provet Aesea mei ihe reitin xa biteni,

*“Xi mileh rerat meseien nar xil
e po rat pangasien nar xil mun.” (Aes 53:4)*

Iesu Misel Xat Ngan Xil xa Labit Lavusil Xati tangan Linem Kuhi Mu

¹⁸^oE melele xa Iesu pusi xa tatit moletin xa mahulong ladi xorelisi, xi misemae ni moletin nan xil tangan livue xat bot tei tangan lihe ri Oei Kaleli. ¹⁹E melele xa Iesu e moletin nan xil di laba, tisa tei te Rae xil na Mosis bemei visali e bitene, “Tisa, ut xave xa uha en, inou nihusiluk.”

ⁿ 8:14 Tumulen ak de Mak 1:29-34; e Luk 4:38-41 mun ^o 8:18 Tumulen ak de Luk 9:57-62 mun

²⁰E Iesu bit rilomun ni mini bit, “Asu xil,^p valexil mae di, e tuman xil mun, nu mae di. E Nat Moletin, tim san xati te pat en tovuol.”

²¹E moletin tei mun xa di nggusil Iesu biteni mini bit, “Suv, ieok bei tangan namusiluk. E itiamu, umaen nou nitilomun nihe tim savan e nilaxat tata navan ituxoh melele xa imat e nitihin ni.”

²²E Iesu biteni mini bit, “Xouk uhusil xat nou xosali, e uling ngan xil xa lamat tangan ti lithin ngenexil xa lamat.”

Iesu Misemae ni Votiang e Oei, e Lulong Xat Raen

²³Melele xa Iesu misepin bus, xi be bot e moletin nan xil langgusil xati tangan lave ri Oei Kaleli. ²⁴E melele xa di lalis laba, Iesu porsae. E tavehi ti, latemanin ni votiang tei mea e mu nggeih. Ngan ak misak ni oei nggialial holu, e tahe bemei e bot, sangas vamerir. E Iesu, xi por vovong. ²⁵E moletin nan xil laba lasiasi ni labit, “!Suv, ututou ni xamem li! !Ramat xi tak!”

²⁶Iesu bit rilomun ni mi xil bitene, “?Ulimim di mikan veneh? !Neketen namim hokorong tova tang!” Di, mitamea e misemae ni votiang e oei bit, “!Ta kat!” E vatei takes, xalu lube tan e an mei bos rilomun.

²⁷Melele xa moletin nan xil lapusi mak, latemanin e lasis pilei xil mun tang labit, “?Moletin ak be hisit moletin eah? !Neta sav xa votiang e oei, xalu mun di lulong xat raen!”

Iesu Nggol Rerat Ninin Tesa Xil Labe Reling Moletin Lu

²⁸Melele xa lamei ut e ri oei, Iesu del moletin nan xil laduxoh tan tahal Kadara. Vatei takes, moletin lu lunggo vangihat xil xa be von tahinen e lumei visal Iesu. Moletin xalu ak, ninin tesa xil ladi e xalu e lasak ni xalu di lubas purun moletin xil vus xa lamei sangas e rute ak. Misak ni moletin xil lasakras laka pas rute xa ludi en. ²⁹Melele xa lamei sangas, lukei nggeih ba ni Iesu lubit, “!Nat Hi! ?!Upol ni naha mi xamem!? ?Umei inggak tangan usa longpangsien mi xamem? ?Onatatil ti melengien xati teni xa ti imei?”

³⁰Tave sotin ti, tatit vueili xil holu di lasu. ³¹Ma ninin tesa xil ak ladak kes Iesu labit, “Xosxa obit uhol rerat xamem, uma e ni xamem muhe vueili xil xor.”

³²Ma Iesu biteni mi xil bit, “!Muha!” Ma ninin tesa xil ak labe xat vueili xil. E vatei takes, tatit vueili xil ak laloh labe velite etan e ba lamerir e Oei Kaleli, e xil vus lalel. ³³Ngan xil xa di lalaxat vueili xil ak, ulixil mikan, ma laloh labe taon. E taon, latumul usil naha xil xa latepusi

p 8:20 Sepinien xati teni bit, ‘fokis xil’ xa langgoni kuli reran xil xa di lapol ni valexil mae e tan nggoni asu xil di lapol ni. **¶ 8:23** Tumulen ak de Mak 4:35-41; e Luk 8:22-25 mun **r 8:28** Tumulen ak de Mak 5:1-20; e Luk 8:26-39 mun

e naha xa testal mi moletin xalu xa ninin tesa tete xat xalu. ³⁴Misak ni moletin xil vus te taon ak laba tangan lapusi ti Iesu. E melele xa lapusi, ladak kesi tangan vahe reling tan nae.

Iesu Misak ni Moletin Tei xa Rin Tei Mat Mei Bos Rilomun

9 ¹Iesu e moletin nan xil labe bot e langgur xoteh Oei Kaleli ladilomun labe Kapaniam, taon xati nan. ²Melele xa laduxoh taon, rut moletin xil lapo moletin tei del vet man tang e lamei ve Iesu vengan xa ri moletin ak mat. E melele xa Iesu pus kila xa neketen nae di, xi biteni mi moletin xa rin tei mat bit, “Natuxoli, umaal. Ninaketeh ti mun nasa minuk ve tesaen nam xil.”

³Rut tisa xil te Rae xil na Mosis ladi sangas e lalonge. Ma labiteni mi xil mun tang labit, “!Ei, moletin ak di misep xar ni Hi, vengan xa di misepin nggoni ngan taxa lehit xi be Hi vari!”

⁴E Iesu mikil naha xa di lanem usili. Ma biteni mi xil bit, “?Veneh ma munggur xat nenemien tesa xil ak de tinemi? ⁵?Midep, sepinien eah be temale mu tangan namiteni: namit, ‘Ninaketeh ti mun nasa minuk ve tesaen nam xil,’ mu namit, ‘Utamea e ukakao’? ⁶E tangan xamim mupus kila xa Nat Moletin nggur xeihen e ut etan tangan vaketeh vahos rilomun mi moletin xil, mupus ngan ak...” E Iesu biles, pus moletin xa rin tei mat e biteni mini bit, “!Utamea, uvulun vet mam, e upoe utilomun uhe tim sam!” ⁷Vatei takes, moletin ak mea e mikakao rilomun be tim san. ⁸Melele xa moletin xil lapusi mak, latemanin ni e ulixil mikan. Xil lapet rat his Hi xa misa hisit xeihen ak mi moletin tei tangan vapol ni sexien xil ak.

Iesu Mikes Matiu Tangan Ihusili

⁹E melele xa Iesu be reling rute ak e mikakao ba, xi pus moletin tei di dotan de nim te polien nan xa hokorong, hisen Matiu. Xi di mileh takis ra Siu xil tangan vasa ni sung mi kavmen tahal Rom. E melele xa Iesu pusi, mikesi bit, “!Amei! !Uhusil xat nou e mei uhe moletin tei navan!” Ma Matiu mea, mistokovein polien nan xil, e nggusil xat Iesu.

¹⁰Ma Matiu diamu ni Iesu e moletin nan xil labe tim san. Xi pol ni anien tei e melele xa ladotan e di langganien, moletin hau te takis e moletin sav xil mun xa lasa pe met Siu xil lamei e langganien vituei del Iesu e moletin nan xil. ¹¹Melele xa Farasi xil lapusi mak, lasis moletin xil na Iesu labit, “?Veneh ma tisa namim di ngganien vituei del moletin xil te takis e moletin tesa xil mun?”

¹²E melele xa Iesu milonge, biteni mi xil bitene, “Moletin xil xa latamesei ti labit linakil ti dokta. Ngan xil kestang xa lamesei iexil bei

^s **9:1** Tumulen ak de Mak 2:1-12; e Luk 5:17-26 mun ^t **9:9** Tumulen ak de Mak 2:13-17; e Luk 5:27-32 mun

tengan lapus dokta. ¹³E xamim, muha mulang ves koute te sepinien ak xa de Vanuvei Eo na Hi xa bit,

Teok ti tavei sanien eo xil kestang namim,

e ieok bei mak mu tangan iemim isae e moletin sav xil. (Hos 6:6)

Vengan xa natamei ti tangan nakes moletin xil xa lamal ngamu pe met Hi tangan lihiles lihusil nou. E-e, namei tangan nakes ngan xil xa lapol ni tesaen tangan mei lihiles ra tesaen nae xil e lihusil nou.”

Iesu Biteni xa Pispisien Hu Nan Xil Misakras Vahusil Xat Sexien Matu Xil na Siu Xil

¹⁴“Di, moletin xil na Sion Baptaes lamei visal Iesu e lasisi labit, “Melengien holu, xamem e Farasi xil mun mabal ra anien tangan masis e mapisen ni xa malonge vasa ve tesaen namem. E mapusi xa moletin nam xil latapol ni ti sexien ak. ?Veneh vari?”

¹⁵E Iesu dei vole ak mi xil bitene, “Melele xa moletin tei miteli, ngan xil xa lamei ve anien nen ak, labesi xil. ?Xamim munemi xa lilonge isa e lipol ni sexien xil te tangen melele xa moletin ak di tamu visal xil? !E-e, lasakras! E melengien tei di bemei xa moletin xil mei lihur rat moletin nen ak ra xil. E melengien ak vari, xil lilonge isa e lihal ra anien.”

¹⁶Di, Iesu dei vole tei mun mi xil bit, “Moletin tovuol xa vatil xol eising matu tei vatel saxut kaliko tei xa be neta hu. Vengan xa melele xa ikasi, kaliko xa be neta hu mei ileten pupu, ma ital papas eising matu ak e mei imeseh mak mu.

¹⁷“E suse nen ak, moletin tovuol vateh uaen hu vahe valite matu tei xa lapol ni ni hilbe sipsip vengan nggeih ngamu. Vengan xa xosxa ipol ni, ma uaen hu ak ikaio e valite teni imeseh. Maxani, valite ak isa e uaen imie ihe tan. Misak ni, moletin xil ti liteh uaen hu ihe valite xa be neta hu vengan memerou tamu, mikila ikaio. Imak, ma valite teni ihos e uaen mun xa di en ihos.”

Iesu Misak ni Atuli Tei xa Mat del Atou Tei xa Mesei Lubos Rilomun

¹⁸“Melele xa Iesu di tamu misepin usil holesok xil ak, vat tei na Siu xil bemei visali, mitingeiril mini e biteni mini bit, “Natuxahin mat taxeak tang. Amei li, e uling hem iti en, ma imeul rilomun.” ¹⁹Ma Iesu mea e nggusil vat ak del moletin nan xil.

²⁰Melele xa di lakakao laba, atou tei bemei pe tou Iesu e duxol seri eising nan. Atou ak, meseien na atou xil basi hram lu e le tei (12) e misakras vavus. ²¹Xi duxoli vengan minemi bit, “Xosxa nituxol seri eising nan tang, ma nilonge ihos rilomun.”

^u **9:14** Tumulen ak de Mak 2:18-22; e Luk 5:33-39 mun ^v **9:17** E vole xalu ak, Iesu di biteni xa pispisien hu xil nan di nggusil sexien hu xil tang, misakras vahusil xat sexien matu xil na Siu xil. ^w **9:18** Tumulen ak de Mak 5:21-43; e Luk 8:40-56 mun

²²Melele xa atou ak duxol eising nan, Iesu biles, pusi e biteni mini bitene, “Atou li, umaal. Nggo neketen nam, meseien nam be relinguk ngamu.” E melele nen tak vari, meseien be relingi.

²³Di, lakakao laba e laduxoh tim sa vat ak. E melele xa labe nim, Iesu pus rut moletin xil di lapol ni kikeien tei te maten, e vanut moletin tei xa mahulong lase vangit nim e di ladang ve atuli ak. ²⁴E Iesu biteni mi xil bit, “!Mustal! Atuli ak tamat ti, xi di pat tang.” E moletin xil lamem pepamen ni. ²⁵E melele xa lasil rerat moletin xil labe hale, Iesu be vangit nim. Xi ba pus atuli, e dal xat hen. Melele xa dal xati, atuli ak meul rilomun, milale e mitamea. ²⁶Longeongen usil naha xa Iesu tepol ni mikapis e ut xil vus e rute ak.

Iesu Misak Pilei Metevar Lu del Moletin Tei xa be Vut

²⁷E melele xa Iesu be reling tim sa vat ak e di nggusil suse ba, metevar lu lumei visali e lunggusili. Xalu lukei nggeih ba ni lubit, “!Ei, xoux xa ostal onngo vatimol na suv toto Deved!^x !Iem isae li e xamel!”

²⁸Lunggusili duxoh melele xa Iesu be nim tei. Metevar xalu ak mun lunggusili lube vangit nim ak e Iesu misis xalu bitene, “?Midep? ?Xamil muke reitin xa inou nakila nisak ni xamil mulketeh rilomun?”

E lubit rilomun ni mini lubit, “O suv, make reitin xa ukila upol ni.”

²⁹Di, Iesu mite hen duxoh metealu e biteni bit, “Holesok xil istal ixoni ngan xa di muneket en.” ³⁰E metealu mei bos e luketeh rilomun. E Iesu misep xol xalu nggeih bit, “!Munahit naha ti xa napol ni mi xamil ni moletin ti!” ³¹E melele xa lube relingi, ba lubit papas naha xa Iesu tepol ni mi xalu, ma longeongen teni mikapis e ut xil vus e rute ak.

³²Melele xa moletin xalu ak lube hale, rut moletin xil lamei visal Iesu e ladel moletin tei xa be vut. Moletin ak misakras vasepin vengan xa ninin tesa tei da en. ³³E melele xa Iesu nggol rerat ninin tesa ak be relingi, moletin ak mikila vasepin. Melele xa rut moletin xil ak lapusi mak, latemanin ni e labiteni mi xil mun tang labit, “!Ei termali, xir mol-Isrel xil ratapus ti mu neta tova vamak!”

³⁴E Farasi xil labit, “Moletin ak nggur xeihe nan nggo Temat tangan vaxol rerat ninin tesa xil vengan Temat be suv nae.”

Iesu Ien Misae e Moletin Xil e Misis tangan Hi Isa Moletin Lihe Holu Mu Mei Lipol Ite Xil

³⁵Dutou ni ngan ak, Iesu mikakao mikapis e taon e metimal xil vus mun e rute ak. Melele xa be ut tei, xi mipispisi mi moletin xil e nim te pispisien na Siu xil, di bithiten longeongen hos xa Hi mei ihe suv toto na

^x 9:27 Siu xil lake reitin xa Kristo istal ixo vatimol na suv toto Deved, sakini lakes Kristo ni ‘nat Deved.’

moletin xil, e di midal rat meseien ra moletin xil vus xa lamesei. ³⁶Melele xa xi pus tatit moletin xil ak xa labe holu pupu, xi polu ni esaeen vengán xa pusi xa nenemien nae milangalu e latakil ti xa likamet tutouen ixo xave. Iesu pus xil langgoni sipsip xil xa moletin te relaxatien nae tovuol. ³⁷Misak ni, xi biteni mi moletin nan xil bitene, “Anien holu xa tematu di tuei e naho, e moletin xil te polien latapin ti tangan ha lalehi vamei. ³⁸Ma musis Suv te naho tangan isil moletin xil te polien lihe holu mu mei lileh anien xa di naho nan.”

**Iesu Misil Lelen Moletin Nan Xil xa Labe
Lu e Le Tei (12) tangan Ha Lipol**

10 ¹Iesu mikes viton moletin nan xil xa labe lu e le tei (12). Melele xa lamei visali, misa xeihen mi xil tangan likila lixol rerat ninin tesa xil e lital rerat meseien ihe reling ngan xil xa lamesei ni meseien savsav xil.

²E ngan ak be his na eloheoh xil xa labe lu e le tei (12) na Iesu:

Ngan xa diamu, Saemon (xa hisen tei mun be Pita)
e Andriu (xa tuneli Pita).
Tiemes (nat Sepeti)
e Sion (xa tuneli Tiemes).

³Pilip,

Batalomiu,
Tomas,
Matiu (xa teleh takis),
Tiemes (nat Alveas),
e Tatios.

⁴Saemon (xa temos e vanut moletin tei xa iexil bei pupu tangan lameluv ra he mol-Rom xil),
e Sudas Eskariot (xa tesa rat Iesu tehe he moletin tesa xil).

⁵Moletin lu e le tei (12) nen ak, Iesu misil lelen xil ha lipol del xat sepinien ak bit, “Xamim munava ti visal ngan xil xa latave Siu ti, mu ngan xil xa ladi taon xil na mol-Sameria xil. ⁶Muha vis mol-Isrel xil kestang xa langgoni sipsip xil xa lakesae. ⁷E melele xa di muba, muhithiten longeongen hos ak mi xil muhit, ‘!Hi di bemei tangan mei vahe suv toto na moletin xil!’ ⁸Muleh rerat meseien xil ihe reling moletin xil xa lamesei, e ngan xil xa lamat, mutal rerat xil ra maten. Ngan xil xa langgur meseien leporsi, musak pilei hilibexil imese rilomun, e muxol rerat ninin tesa ihe reling moletin xil. E melele xa ti mututou ni moletin xil, xil linaxal xamim ti, vengán xa holesok xil vus xa xamim mungguri,

† **10:1** Tumulen ak de Mak 3:13-19; 6:7-13; Luk 6:12-16; e 9:1-6 mun

mutaxale ti ra Hi. ⁹E kakaoen namim, munahur xat ti mani ¹⁰mu ateli. Munahur ti mun eising, sandel mu eitingil. Nabiteni mak vengan xa momal tangan moletin te polien xil lianien ixo he ngan xil xa lapol mi xil.

¹¹“Melele xa mumei e taon mu metimal tei, mukamet moletin tova xa ipin pe met Hi tangan vahur pilei xamim. Mutit tim san ituxoh melele xa muhe reling rute ak. ¹²E melele muha tangan muti e tim tei, itiamu, musa tuxolxatien tei mi ngan xil xa ladi en muhit, ‘Tomat na Hi iti mi xamim.’ ¹³Xosxa moletin xil te tim ak lapin pe met Hi, ma mupus kila xa tomat namim iti mi xil. E xosxa xil mupus kila xa latapin ti pe met Hi, ma tomat namim itilomun mi xamim, e muhe reling xil. ¹⁴E xosxa moletin tovuol xa en vahei vahur pilei xamim mu valong sepinien namim, muhe reling xil. E melele xa mumea ra tim sae mu taon nae, muhas rerat meas te rute ak ra lemim pe met xil. Ngan ak ipisen ni mi xil xa lapol misa pe met Hi. ¹⁵Reitin mak nabiteni mi xamim, e Melengien te Lepisien, pangasien xa Hi isa ni mi moletin xil xa ladi e taon ak ixeh mak mu ili ngan xa isa ni mi ngan xil xa lateti e taon tahal Sodom e Komorah tetiamu.”

Iesu Misel Xat Moletin Nan Xil Bit Melengien Xil te Xeih Di Bemei

¹⁶^zTesu misel xat moletin nan xil bit, “!Muteong ni nou! Inou di nasil lelen xamim muha e munggoni sipsip xil xa muhe hilaep te kuli reran xil. Misak ni, xamim muxuxou kuhi tangan sexien namim imese kuhi. ¹⁷Reitin, muxuxou kuhi ve xamim vengan xa vat xil na Siu xil lital xat xamim e liling xamim musoh e von lepisien nae. E xil limeas pangas xamim ni ao te xeih xil e nim te pispisien nae xil. ¹⁸E vengan xa di munggusil xat nou, lipol ni xamim ha musoh pe met vat xil te kavmen, e pe met suv toto xil mun. Imak, ma mukila muhithiten longeongen hos mi xil e mi ngan xil mun xa latave Siu ti. ¹⁹E melele xa xil lital xat xamim, munanexo ti ve naha xa ti muvitieni mi xil mu itep ti musa sepinien mi xil. Vengan xa, e melele nen ak, Ninin Eo isa naha xa mukila muhithiteni. ²⁰Reitin, nave xamim ti xa ti musepin, e ihe Ninin Eo na Tamemim iaxa isepin ixo xamim.

²¹“Moletin xil limaen tuexil tangan ha lihas vin xil, e tata xil mun ti lipol ni imak tang mi horamue nae xil. E horamue xil mun lihiles ni tamexil e ninexil mun, e limaen xil lihe he ngan xil xa lihas vin xil. ²²Moletin xil vus iexil iat xamim vengan di munggusil xat nou. E xamim xa musoh ixeh ituxoh hoxalite te saksisien xil ak, ma Hi iteh meulien e xamim. ²³Melele xa moletin xil ti lipurun xamim e metimal tei, ha mulesae muhe metimal sav. Reitin mak nabiteni mi xamim xa munave taon xil vus ti mu tahal Isrel, e Nat Moletin itilomun imei.

²⁴“Moletin tei xa nggur pispisien nggo tisa tei, xi nanemi ti nahit xi be eilep mak mu mili tisa nan. E suse nen ak, slev tei nanemi ti nahit xi

^z 10:16 Tumulen ak de Mak 13:9-13; Luk 21:12-17; 12:2-9, 51-53; 14:26-27; e Mak 9:41 mun

be eilep mak mu mili suv nan. ²⁵Ma xamim xa di muggur pispisien xil navan, muhesi xamim tangan mumei muxoni inou, tisa namim. Reitin, xamim xa munggoni slev navan, mumaal tangan mei muxoni nou, suv namim. E xosxa lakes inou, suv namim, ni ‘Belsepul’,^a his tei xa misa, ma mukila xa likes xamim ni his xil mun xa isa mak mu vengan xa mube navan.

²⁶“Misak ni, ulimim nakan ni xil ti. Holesok xil xa moletin tei bit vakutaxole, Hi isak ni mei iti kesao. Reitin, neta ngan xa miling xuxus ni, Hi ileh rerati imei e valkesao tangan moletin xil lipus kila. ²⁷Holesok xil xa inou di nabiteni mi xamim melele xa ut maluxoluk, xamim ti muhit lelen ni mi moletin xil e miehen. E neta xa di nabit xuxus ni mi xamim, ha muhithiteni pe met moletin xil holu.

²⁸“Ulimim nakan ti ni ngan xil xa lakila lavas vin tiei namim e lasakras lavas vin ninin namim. Bos mak mu ulimim ikan ni Hi kestang xa mikila iling tiei itel ninin namim mun lalihe Upang xa misakras vamat tangan ia pangasi, vengan meulien namim di e he Hi. ²⁹Munem usil tutut tuman xil ak. Itel selen tei takes, mukila muxal lu e xil. E xosxa Hi Tamemim namaen ni ti, ma ti xil misakras vamat vamat. ³⁰E xamim, Hi buli sen hilumi xil vus xa di e vatumim. ³¹Misak ni, ulimim nakan ti vengan xa, pe met Hi, meulien namim be eilep mak mu mili meulien na tutut tuman xil ak.

³²“Moletin xa bit lelen ni xa xi be moletin navan pe met moletin sav xil, ma inou mun, nihit lelen ni xa xi be moletin navan pe met Tata navan xa de ut nesao. ³³E ngan xa bit lelen ni pe met moletin xil xa misin nou, inou mun, nihit lelen ni pe met Tata navan xa de ut nesao xa nasin moletin ak.

³⁴“Munanemi munahit inou namei tangan niling tomat e ut etan. E-e. Natamei ti tangan niling tomat, e namei tangan nisak ni moletin xil ti livae mi xil mun tang. ³⁵Ngoni ngan taxa Vanuvei na Hi biteni, inou namei tangan nisak ni ...

*‘Tiramue xil lihiles livae itel tamexil,
atuli xil lihiles livae itel ninexil,
e havnahin xil lihiles livae itel avu sasa atou nae xil.*

³⁶ *Reitin, moletin ihe elu mi ngan xil
xa ladi vituei dela e tim san xati.’ (Maek 7:6)*

³⁷“Ngan xil xa eheien nae di e tamexil mu ninexil mili nou, ma latapin ti tangan mei lave moletin navan xil. E ngan xil xa eheien nae di e horamue mu atuli nae xil mili nou, ma xil mun latapin ti tangan mei

^a **10:25** ‘Belsepul’ be his tei te xaren xa Siu xil di lakes Temat ni, xa koute teni be ‘Suv na angelu xil.’

lave moletin navan xil. ³⁸Ngan xil xa latapo eivave te longpangasien nae ti tangan lavusil xat nou, xil latapin ti tangan mei lave moletin navan xil. ³⁹Ngan xil xa lasak pisi tangan likenin meulien nae ve xil tang, ma meulien nae ikesae ra xil. E ngan xil xa lamaen meulien nae ikesae vengan di langgusil xat nou, ma, e ut nesao, xil likamet meulien sal.

⁴⁰“E kakaoen namim, ngan xil xa ti lihur pilei xamim, ixoni ngan xa ti lihur pilei nou. E ngan xil xa ti lihur pilei nou, ixoni ngan xa ti lihur pilei Tata navan xa misil nou namei. ⁴¹Reitin, moletin xa ihur pilei provet tei na Hi vengan xa mikila be provet tei, Hi isa huite teni mini ixoni ngan xa xi mun be provet tei nan. E moletin xa ihur pilei moletin xa momal vengan mikila xi be momal pe met Hi, Hi isa huite teni mini ixoni ngan xa xi mun momal pe meten. ⁴²E moletin xa misa tutouen mi moletin tei navan xa be hokorong tang pe met moletin sav xil vengan mikila xi di minggusil xat inou, tave ti neta xosxa be oei te marir tang, reitin li nabiteni mi xamim, e ut nesao, moletin ak ihur sen huite teni.”

Iesu Misep usil Sion Baptaes

11 ¹^bMelele xa Iesu misel xat moletin nan xil xa labe lu e le tei (12) bus, xi misil rerat xil laba. E xi mun be reling rute ak e ba be taon sav xil e provins tahal Kaleli. E melele xa di mikakao ba, di pispisi mi moletin xil e di bithiten longeongen hos na Hi mi xil.

²E melele nen ak, Sion Baptaes di tamu e nim te xeih.^c Xi milongeong usil holesok xil xa Iesu di pol ni. Ma misil rut moletin nan xil tangan liha vis Iesu e lisis pilei usil polien nan. ³Misak ni, xil lamei visal Iesu e lasisi labit, “?Xoux iaxa obe Kristo xa Hi tehiti xat xa isila imei, mu mutatil ngan teisav?”

⁴E Iesu bit rilomun ni mi xil bitene, “Mutilomun muha e muhiteni mi Sion naha xa di mulonge e di mupusi. ⁵Ngan xil xa mete tevar, di laketeh; ngan xil xa latesakras lakakao, di lakakao; ngan xil latehur meseien leporsi, hilbexil mei bos; ngan xil vurongexil tevon, vurongexil metal; ngan xil latemat, lameul rilomun; e ngan xil xa latehe hoeo di langgur longeongen hos na Hi.^d ⁶E Hi ituxol xat ngan xil xa tine nasoh ti ve pispisien mu sexien xil navan.”

⁷Melele xa moletin xil na Sion Baptaes di laba, Iesu misepin mi vanut moletin xil usili bit, “?Melele xa mutehe uruvuol tangan mupus Sion Baptaes, munemi mubit ti mupus hisit moletin eah? ?Muteha tangan mupus moletin tei xa taxeih ti nggoni husmunae tei xa tepiei xa misakras vasomal melele xa votiang bui? E-e. ⁸?E muteha tangan mupus naha? ?Moletin tei xa mising ni eising xil xa bos pupu? E-e. Vengan xa moletin

^b 11:1 Tumulen ak de Luk 7:18-35 mun ^c 11:2 Suv Toto Herod miso Sion be nim te xeih e Mat 4:12 ^d 11:5 Aes 35:5-6; 61:1

xil lasing mak ladi e nim xil xa mahulong ma suv toto xil. ⁹?Muhiteni minou, muteha tangan mupus naha vari? ?Provet tei? !Reitin! E nabiteni mi xamim xa moletin ak be eilep mak mu mili provet sav xil. ¹⁰Vengan Sion be xi xa Vanuvei Eo na Hi di misep usili bit,

'Upusi. Inou nisil eloheoh navan itiamu ni xouk.

Xi iaxa iha tangan isak mesen suse ve meien nam.' (Mal 3:1)

¹¹Reitin li nabiteni mi xamim, moletin sav tovuol xa latepesi e ut etan xa be eilep mak mu mili Sion. E moletin votei tei xa imaen Hi te ut nesao mei ihe suv toto nan, ma xi ihe eilep mak mu ili Sion pe met Hi. ¹²E melele xa Sion di tehithiten sepinien na Hi duxoh xosali, Hi di pol nggeih tangan vasak ni haxot te lelaxatien nan mei ihe eilep mu, e ngan xil xa nenemien nae nggeih di lamos mini. ¹³Vengan Tisen xil nan provet xil vus tetiamu tetel Rae xil na Mosis teha tetuxoh Sion latesep usil melele xa Hi mei ihe suv toto na moletin xil. ¹⁴E xosxa xamim mubesi xamim tangan muke reitin en, ma Sion be Ilaetsa xa Hi tehiti xati tehiti isila imei.^e ¹⁵Xosxa vurongemim di, muteong kuhi ni naha xa di nabiteni.

¹⁶“?Xamim, moletin xil te xosali, munggoni naha? Xamim munggoni tutut horamue xil xa di ladotan sangas ni von posen e di lake xat xil mun tang labit,

¹⁷'Melele xa xamem di mapol ni nggoni ngan xa di mabas kitar e sien, iemim ti navei muvol vatel xamem.

E melele xa di mapol ni nggoni ngan xa di madang, iemim ti navei mutang vatel xamem.'

¹⁸Xamim munggoni tutut horamue xil ak vengan xa iemim ti tavei nou mu Sion mun. Melele xa Sion Baptaes bemei, xi di bal ra anien ve sisen e tamu ti uae, e xamim iemim ti tavei mubit, '!Sion, ninin tesa da en!' ¹⁹Di, melele xa inou, Nat Moletin, namei, nangganien e namu uae. E xamim iemim ti tavei nou mubit, '!Pus ti moletin ak! Xi di ngga vin xi ni anien e di mumun tova tang. E xi di mikes moletin xil te takis e moletin tesa sav xil ni timue.' E sexien nar kekes ipisen ni xa visi e xir di nggusil metisouen na Hi.”

Iesu Misepin Nggeih Xat Moletin Xil xa Lasin Ni

^{20f}Di, Iesu misepin nggeih xat moletin xil te taon xil xa xi teha tepol ni merikel xil holu en. Vengan neta sav xa lapusi, latnaviles ti ra sexien tesa xil nae. ²¹Xi biteni bit, “!Aue li! !Isa pupu mi xamim, Siu xil tahal Korasin! !E isa pupu mun mi xamim, Siu xik tahal Betsaeta xil! Vengan xamim mutesin merikel xil xa natepol ni pe metemim,

^e 11:14 Mal 4:5 ^f 11:20 Tumulen ak de Luk 10:13-15 mun

Hi isa longpangasien ihe holu mi xamim. Ve vahit moletin xil tahal Taer e Saedon xa latave Siu ti, lapus hisit merekel xil vaxoni ngan xa mistal mi xamim, ma xil laviles ra tesaen nae xil nousav ngamu. Io, xil lapisen ni xa lalonge vasa vamak: lasing ni talit holesok xil e laxul ni vulmeas. ²²Reitin li nabiteni mi xamim xa, e Melengien te Lepisien, longpangasien xa Hi isa ni mi xamim ixeih mak mu ili ngan xa isa ni mi ngan xil xa lateti e taon xalu tahal Taer e Saedon. ²³?E xamim, Siu xil tahal Kapaniam, munemi xa Hi ipet rat xamim muhe ut nesao? !E-e! !Xi iso xamim muhe etan e Upang xa misakras vamat! Ve vahit moletin xil tahal Sodom lapus merekel xil vaxoni ngan xa natepol ni tetel xeihen pe metemim, taon ak da duxoh xosali. ²⁴Reitin li nabiteni mi xamim xa, e Melengien te Lepisien, longpangasien xa Hi isa ni mi xamim ixeih mak mu ili ngan xa isa ni mi ngan xil xa lateti e taon tahal Sodom ili xamim.”

Iesu Misa Memesien mi Hi ve Movotei Xil xa Laneket En

²⁵E melele nen ak, Iesu misis bit, “Tata, xouk obe Suv te ut nesao e ut etan. Namesuk holu vengan xa di oling xuxus ni holesok xil ak ra ngan xil labe metisou e lakilakil kuhi. E opisen koute teni mi ngan xil xa langgoni tutut horamue xil xa latasukul kuhi ti. ²⁶Tata, ngan ak be reitin vengan xa nggusil naha xa xouk iem bei tengang vastal. Reitin.”

²⁷Di, Iesu misepin mi moletin xil bit, “Tata navan miling holesok xil vus di e heok. E moletin xil latapus kil ti Nat Hi vengan xa Tamen kestang di pus kila. E moletin xil latakil ti Hi vengan xa Natneli kestang mikila del ngan xil mun xa Natneli bosei xil tengang ipisen ni mi xil.

²⁸“Mumei visal nou, xamim xa vemim buol ve holesok xil xa meas xa di mupoe e meulien namim, e inou nisa ngengelen mi xamim. ²⁹Muteong ni nou e muhusil xat nou, vengan xa inou nabe hanmerou e nenemien navan be tan. Imak, ma mukamet ngengelen e meulien namim. ³⁰Ve pispisien navan xil taxeih ti e holesok xil xa nilingi e xamim tengang mupol ni memeit tang.”

Iesu Pispisi usil Sabat

12 ¹^hVatei, e Sabat, Iesu e moletin nan xil lakakao xoteh naho tei te uit. E melele xa di lakakao laba, moletin nan xil, mae nggat xil, ma laki xoteh utut uit xil e di langga ni. ²E melele xa Farasi xil lapusi, lasepin mi Iesu labit, “Pus ti mu. Naha xa moletin nam xil di lapol ni di nggur xoteh rae xil na Mosis usil Sabat.”

³E Iesu bit rilomun ni mi xil bit, “?Midep? ?Xamim mutavuli ti naha xa suv toto Deved e moletin nan xil latepol ni melele xa mae teat xil?

§ 11:25 Tumulen ak de Luk 10:21-22 mun ^h 12:1 Tumulen ak de Mak 2:23-3:6; e Luk 6:1-11 mun

⁴Deved tehe vangit Nim Tavolin na Hi e tehur beret eo xa pris xil kestang lakila lava ni. E Deved del moletin nan xil latea beret ak, neta sav xa latehur xoteh rae tei na Mosis. ⁵?E midep? ?E ut sav, mutavuli ti xa e Sabat xil vus, pris xil xa di lapol e Nim Eo di langgur xoteh rae xil na Mosis usil Sabat, e pe met Hi, latapol ni ti tesaen?ⁱ ⁶E xosali, moletin tei mistal xa be eilep mak mu mili Nim Eo na Hi. ⁷Vanuvei Eo na Hi di biteni bit, *'teok ti tavei sanien eo namim xil kestang, e ieok bei mak mu tangan iemim isae e moletin sav xil.'* (Hos 6:6) Xosxa mukil koute te sepinien ak, ma munasa ti sepinien te xeih ak mi ngan xil xa latapol ni ti neta xa vasa. ⁸Moletin navan xil latapol ni ti neta vasa vengan xa xil di langgusil xat nou, Nat Moletin. E inou nabe eilep mak mu mili Sabat.”

⁹Di, Iesu e moletin nan xil labe reling rute ak e labe nim te pispisien na Farasi xil ak. ¹⁰E moletin tei da en xa hen mikavui. E rut moletin xil mun ladi xa iexil bei tangan liso sepinien tei iha xat Iesu ve neta ngan. Misak ni, xil lasisi labit, “Hiteni mi xamem. ?Rae xil na Mosis maen ni tangan lasak pilei moletin tei e Sabat?”

¹¹Iesu bit rilomun ni mi xil bit, “?Midep? ?Xosxa tei e xamim, sipsip tei san mot be vul e Sabat, ma ipol ni naha mini? Xi ha ipo rati ra vul ak. ¹²E moletin tei bos mak mu mili sipsip tei. Ma rae nar xil maen xir ti ripol ni sexien hos xil e Sabat.”

¹³Di, xi biteni mi moletin xa hen mikavui bit, “So hem vama.” Ma melele xa miso hen momal, mei bos rilomun nggoni hen tei mun teisav.

¹⁴E Farasi xil lastal e lasep ves suse tova tangan lavas vin Iesu vaxo en.

Iesu Pisen xa Xi iaxa Be Moletin te Polien xa Hi Tehosei

¹⁵E Iesu mikila xa Farasi xil ak iexil bei tangan lihas vini, ma xi be reling rute ak. E tatit moletin xil holu langgusil Iesu e xi midal rerat meseien ra ngan xil vus xa lamesei. ¹⁶E melele xa di pol ni, di misep xol xil tangan linavit ti mi moletin sav naha xa xi tepol ni mi xil. ¹⁷E holesok xil ak testal tangan vasak ni naha xa Hi tesep usili texo provet Aesea mei ihe reitin xa bit,

¹⁸“*Ngan ak be moletin te polien navan xa natehosei, eheien navan di en e nabesi nou ven.*

*Nise xati ni Ninin navan,
e xi ihithiteni mi moletin xil te ut etan xa latave Siu ti usil midep Hi
ipol ni naha xa momal mi xil.*

¹⁹*Xi nangor ti natel mosav xil e nameun votei ti.*

Io, moletin ti nalong raen nave nesao usil suse xil.

²⁰*Ve esaean nan di e ngan xil xa lataxeih ti,
xi napol ni ti neta naxeih mi xil.*

ⁱ 12:5 Nam 28:9-10

*E ngan xil xa lamerou tang,
xi napangei xil ti.*

Xi ipol ni imak ituxoh

*melele xa isak ni sexien xil xa momal pe meten mei ili sexien xil xa
tamal ti.*

21 E moletin xil te ut etan

mei liling nenesien nae e hisen. (Aes 42:1-4)

Farasi Xil Lakes Iesu ni Temat

²²JDi, rut moletin xil ladel moletin tei bemei visal Iesu. Moletin ak, meten bar e misakras vasepin vengan ninin tesa tei da en. Ma Iesu misak ni moletin ak mei miketeh e misepin rilomun. ²³Ngan xil xa lapusi, latemanin labit, “?Midep? ?Moletin ak be ngan xa istal ixo vatimol na suv toto Deved xa Hi tehit xati tangan isa ni imei?”

²⁴E melele xa Farasi xil lalong sepinien na moletin xil ak, labitene mi xil labitene, “!E-e! Moletin ak mikila vaxol rerat ninin tesa xil tang vengan di pol del xeihen xa Belsepul,^k suv toto na ninin tesa xil, di misa ni mini.”

²⁵E Iesu mikil nenemien nae, ma biteni mi xil bitene, “Xosxa moletin xil na suv toto tei di labae mi xil tang, ma xeihen na suv toto ak mei ihe neta sav tang. E xosxa moletin xil xa ladi vituei e metimal mu vatimol tei di labae mi xil mun tang, ma his metimal mu vatimol ak iclesae. ²⁶Ma xosxa Belsepul di minggol rerat ninin tesa nan xil, ma xi di bae mi xi mun tang. Xosxa imak, ma xeihen nan ilesae relingi. ²⁷?E xosxa Belsepul di misa xeihen minou tangan naxol rerat ninin tesa nan xil, ma midep mi moletin namim xil? ?Xil langgol rerat ninin tesa xil ra moletin xil del xeihen na visi? Xil iaxa di lapisen ni xa neta xa di musep usili tamal ti. ²⁸E xosxa inou di nanggol rerat ninin tesa xil ra moletin xil nggo xeihen xa Ninin na Hi di misa ni minou, ma ngan ak di pisen ni xa lelataxien na Hi xa be suv toto di mistal tuei mi xamim.

²⁹“Nihit kila mi xamim ixo vole tei. Moletin tei misakras vahe nim ma silixin tei tangan vakan ni holesok nan xil melele xa xi di tamu tim san. Itiamu, ha ivar xat silixin ak. Ti, ikila ihe nim man e ileh vuol ni holesok nan xil vus.^l

³⁰“Ngan xil xa latamos ti vatel nou, xil di labae del nou. E ngan xil xa latatutou ni nou ti tangan maleh viton moletin xil vaxoni sipsip xil, xil di langgol rerat xil laloh tasil. ³¹E nabitene mi xamim, Hi mikila vaketeh

j 12:22 Tumulen ak de Mak 3:20-30; Luk 11:14-23; e 6:43-45 mun ^k 12:24 ‘Belsepul’ be his tei xa Siu xil di lakes Temat ni, xa koute teni be ‘Suv na angelu xil.’ ^l 12:29 E vole ak, Iesu be moletin xa be nim ma Temat tangan vavar xat Temat. Ve rin ak, xi mikila vaxol rerat ninin tesa nan xil e di midal rat moletin xi ra meseien nae xil.

vamal rilomun mi ngan xil xa lapol ni hisit tesaen savsav xil mu lasep purun his Hi mu his moletin sav. E moletin xa misep purun his Ninin Eo, Hi misakras vaketeh vahos rilomun ni mini. ³²Reitin, ngan xil xa di lasepin misa minou, Nat Moletin, Hi mikila vaketeh vahos rilomun ni mi xil. E ngan xil xa lasepin misa mi Ninin Eo, Hi naketeh ti navos rilomun ni mi xil, xosali mu melele xa ti imei.^m

³³“Xosxa vatiei tei bos, ma huite teni mun ihos. E xosxa vatiei tei misa, ma huite teni mun isa. Huiei iaxa di pisen ni xa vatiei tei bos mu misa. ³⁴!E xamim munggoni vanut tetal sasa xil xa di langas vin moletin xil ni vulongexil! ?Itep ma xamim mukila musepin usil holesok xil xa bos? !Musakras vengan xa moletin xil di lasepin usil naha xa di iexil, e xamim mube moletin tesa xil. ³⁵Moletin hos tei, ien polu ni nenemien hos xil, ma di misepin usil holesok xil xa bos. E moletin tesa tei, ien polu ni nenemien tesa xil, ma xi di misepin usil holesok xil xa misa. ³⁶Nabiteni mi xamim, e Melengien te Lepisien, Hi ilepis sepinien talang namim xil vus xa di muso ni, e isa longpangasien mi xamim ven. ³⁷Reitin, itel sepinien namim xil tang, Hi ipus kila xa mumal mu mukavui, e isa naha xa imal mi xamim vus ihusili.”

Tisa Xil te Rae xil na Mosis del Farasi Xil Lasis Iesu tangan Vapol ni Neta Tei xa Eilep tangan Ti Like Reitin En

³⁸“Di, rut tisa xil te Rae xil na Mosis del Farasi xil mun lamei visal Iesu e labiteni mini labitene, “Tisa, iemem bei tangan upol ni neta tei xa eilep tangan mapus kila xa be reitin xa xoux onngo visal Hi.”

³⁹E Iesu bit rilomun ni mi xil bitene, “Xamim, moletin xil te xosali ak, mukavui e mustokovein Hi nggoni atou xa mistokovein tiramue xati nan tangan vahur tiramue sav tova. Ve rin ak, iemim bei tangan mupus neta tei xa eilep tangan muke reitin xa natexo vis Hi namei. E ninapol ni ti neta xa eilep ve xamim. Ti mupus neta tei takes xa ixoni ngan xa testal mi provet Siona tetiamu. ⁴⁰Vengan provet Siona tete vang meseo melengien e vongien tol (3). E sexien nen ak, inou mun, Nat Moletin, nite pe huitan te maten melengien e vongien ihe tol (3). ⁴¹E Melengien te Lepisien, mol-Nineve xil lisoh e lisepin iha xat sexien na moletin xil te xosali. Reitin, xil lisepin iha xat xamim vengan xa melele xa xil, xa latehe elu mi Siu xil, latelong sepinien na Hi xa provet Siona tehithiteni mi xil, xil latehiles ra sexien tesa nae xil. E xosali, tei xa be eilep mak mu mili Siona dak ngamu. ⁴²Reitin, e Melengien te Lepisien, suv toto tahal Seba tetiamu xa tehe atou, xi isoh e isepin iha xat moletin xil te xosali. Vengan

^m 12:32 Iesu di misepin mak vengan xi di pol nggo xeihen na Ninin Eo, e Farasi xil labilesi labit xeihen nan nggo Temat. ⁿ 12:38 Tumulen ak de Mak 8:11-12; e Luk 11:24-26,29-32 mun

xi texo sotin pupu tangan mei valong metisouen na suv toto Solomon. E xosali, tei xa be eilep mak mu mili Solomon dak tuei.

⁴³“Melele xa ninin tesa tei be reling moletin tei ba, di mikapis e uruvuol tangan vakamet ut tova xa bos te ngel en. E melele xa takameti, ⁴⁴ihiteni mi xi mun tang ihit, ‘Nitilomun nihe nim mavan xa natehe relingi natemei.’ E melele xa itilomun imei, ma ikameti xa ladaveas tuei e nim ak, laling pilei holesok xil, e ninin teisav tovuol en. ⁴⁵Misak ni, xi iha e ihur ninin lu e he sav (7) xa lasa mak mu ili xi. E xil lihe nim, ha liti en. Nim ak be moletin tei, e lisak ni meulien na moletin ak isa mak mu ili ngan xa teti en tetiamu. Ngan istal mi xamim, moletin tesa xil te xosali ak.”

Iesu Bit Lelen ni xa Visi Iaxa be Ninen e Tuneli Xil

⁴⁶°Melele xa Iesu di tamu misepin mi vanut moletin xa mahulong xiak, ninen e tuneli xil lamei. Lamei lasoh e hale tang e labit lasepin mini. ⁴⁷Ma moletin tei bemei visal Iesu e bit mese ni mini bitene, “Ninom e tumoli xil di lasoh hale iaxor, e labit lasepin minuk.”

⁴⁸E Iesu bit rilomun ni mini bit, “?Visi iaxa be nana navan? ?Visi iaxa be tua navan xil?” ⁴⁹Di, miti mikapis e moletin nan xil e biteni bit, “?Mupusi? Ngan xil ak labe nana navan xil e tua navan xil. ⁵⁰Vengan ngan xil xa di lapol ni naha xa Tata navan xa de ut nesao ien bei tangan lipol ni, xil iaxa labe nana navan xil, tua navan xil, e tuxahin xil mun.”

Iesu Pispisi usil Rin xa Hi Mei Ihe Suv Toto na Moletin Nan Xil

Iesu Dei Vole Tei usil Utiei Xil xa Di Meul e Hisit Tan Teisav Xil

13 ¹°E melengien nen tak, Iesu be reling nim ak e ba dotan e seri Oei Kaleli. ²E vengan xa vanut moletin xil holu pupu lakapis xole, Iesu be bot tei e dotan en. E moletin xil lasoh ladi nga ut. ³Di, xi dei vole xil holu mi xil bit, “!Muteong kuhi! Vatei, moletin tei be naho tangan vaso utiei en. ⁴E melele xa miso ni, rut utiei xil lamot e suse xa tan nen nggeih, e tuman xil mei lada rerati. ⁵Rut utiei xil lamot e tan xa hat xil holu di en e tan nen mahin tang. E inggak, utiei ak latemanon ve tan mahin. ⁶E melele xa eai bemei nesao, ngga vin ngan xil xa lateteh, e lameles lamat. Lamat vengan xa amulite xil tave tan pupu ti. ⁷Rut utiei xil mun lamot e tan xa munae tesa di meul en. E melele xa lateh, munae tesa xil ak mikutaxol vin xil. ⁸E rut utiei xil ak, lamot e tan xa bos. Ma xil lameul bos, e laba ni huite xil. Ngan xil, laba ni huite xil holu; ngan xil mun laba ni huite xil holu mak mu; e ngan teisav xil mun, xil iaxa

° 12:46 Tumulen ak de Mak 3:31-35; e Luk 8:19-21 mun P 13:1 Tumulen ak de Mak 4:1-20; e Luk 8:4-15 mun

ladaxao xa ladaxao ni huite xil.⁹ ⁹!Xosxa vurangemim di, muteong kuhi ni naha xa di nabiteni!”

¹⁰Melele xa Iesu misepin bus, moletin nan xil lamei visali e lasisi labit, “?Xouk di ode vole xil mi moletin xil veneh?”

¹¹E Iesu bit rilomun ni mi xil bit, “Xamim iaxa Hi tehosei xamim tangan mukil koute te sepinien xuxus usil itep xa xi mei ihe suv toto na moletin nan xil. E moletin sav xil, Hi tenahosei xil ti tangan lakila. ¹²Ngan xil xa lakil kuh koute te sepinien xil ak, ma Hi isak ni xil likilakil pilei mak mu ha vuma ... lipolu ni kilakilen nan. E ngan xil xa latakil ti koute xil teni, ma hokorong xa di langguri, Hi ihur rati ra xil. ¹³Inou di nasepin mi xil nggo vole xil tangan, tave ti neta xa di lapus neta ngan, e xil latapus kil ti. Reitin, tave ti neta xa di lalong netan ngan, e lalong kil ti. ¹⁴Sexien nae di misak ni sepinien na provet Aesea tetiamu mei ihe reitin xa bit,

‘Muteong vuma ... munalong kil ti neta.

Muketeh vuma ... munapus kil ti neta.

¹⁵*Imak vengan xa tine nggeih.*

Di laki xol vurange e di label xat mete.

Xil lapol ni mak vengan iexil ti tavei lapus kil neta ngan ni mete, mu lalong kil neta ngan ni vurange.

Reitin, xosxa linamak ti,

ma xil likil kuh koute te sepinien navan,

tinexil mei imerou, lihiles meulien nae,

e inou mei nital rat xil ra meseien nae xil.’ (Aes 6:9-10)

¹⁶“E tuxolxatien na Hi di tuei e xamim, moletin navan xil, vengan melele xa mupus neta tei ni metemim, mupus kila. E melele xa mulong neta ngan ni vurangemim, mulong kila. ¹⁷Reitin li nabiteni mi xamim, tetiamu, provet xil holu e moletin sav xil xa latemal pe met Hi, iexil tehei mak mu tangan lapus naha xa xamim di mupusi xiak, e xil latnapus ti. Io, iexil tehei tangan lalong naha xa xamim di mulonge, e xil latnalong ti.

¹⁸“Muteong kuhi ni koute te vole xa natehiteni usil moletin xa milih kon e hisit tan tesav xil. ¹⁹Utut kon ngan xil xa lamot e suse xa tan nen nggeih, xi nggoni moletin tei xa milong sepinien usil rin xa Hi mei ihe Suv Toto e meulien na moletin xil. E melele xa milonge, xi talong kil ti koute teni. E Temat mitemanon bemei, minggur rat sepinien xa mot de tinen. ²⁰Utut kon ngan xil xa lamot e tan xa hat xil holu di en, xi nggoni moletin xa milong sepinien na Hi e, vatei takes, ngguri del sien. ²¹E vengan xa amulite xil te neketen nan tameul ti mu, moletin ak misoh e neketen nan be terume tang. E melele xa sakkisien e melengien xil te xeih

⁹ 13:8 Sepinien xati teni bit, “uit xil ak ladaxao ni huite nggoni 30, 60 e 100.”

bemei ni ve sepinien ak, vatei takes, xi mot e neketen nan. ²²E utut kon ngan xil xa lamot e tan xa munae tesa di meul en, xi nggoni moletin tei xa milong sepinien na Hi e minexo pupu ve holesok xil te ut etan e eheien nan di e mani mak mu holu. Ma holesok xil ak mikutaxol sepinien na Hi xa ngguri, ma tava ni ti huite e meulien nan. ²³E utut kon xil xa lamot e tan xa bos, xi nggoni moletin xa milong sepinien na Hi e milong kila. E meulien nan, sepinien nen ak ba ni huite. E meulien na rut moletin xil, ba ni huite xil holu; e ngan tesav xil, ba ni huite xil holu mak mu; e ngan teisav xil mun, sepinien ak daxao xa daxao ni huite xil e meulien nae.”^r

Iesu Dei Vole usil Munae Tesa Xil

²⁴E Iesu dei vole tei mun mi vanut moletin xil bitene, “Suse xa Hi mei ihe Suv Toto te meulien na moletin xil ixoni moletin tei xa milih utut uit e naho san. ²⁵E melele xa moletin xil vus ba lapat, elu tei na moletin ak bemei e naho san e miso utut munae tesa xil mun ba mosos del uit. Di, milesae ba. ²⁶Misak ni, melele xa uit xil ak lateh, lameul lamei nesao e langgur vei, munae tesa xil mun lameul vituei tang del xil.

²⁷“Melele xa moletin xil te polien laba tangan lapus naho sa masta nae, lapus kil munae tesa xil en. Ma ladilomun ba labiteni mini labit, ‘!Masta! ?Midep? ?Utut uit xil xa oteso ni e naho sam, xil latehos mu latesa tang? ?Vengan xosxa latehos, ma munae tesa xil ak latexo xave latemei?’

²⁸“E masta nae bit rilomun ni mi xil bitene, ‘!E-e! Elu tei navan iaxa tepol ni.’

“Ma moletin te polien nan xil lasisi labit, ‘?Ma midep? ?Iem bei tangan mava maput rerat munae tesa xil ak?’

²⁹“E masta nae bit rilomun ni mi xil bitene, ‘E-e. Muling xil limeul liti nga, maxani mutnaput rerat uit xil xa labos melele xa di muput rerat munae tesa xil. ³⁰Muling uit e munae tesa xil ti lalimeul vituei tang ituxoh melele te leh anien en. E melele xa moletin xil ti limei tangan lileh anien, nihiteni mi xil tangan ha lileh rerat munae tesa xil ak itiamu, e livar viton xil lihe vanute xil. Ti, nimei niso munae tesa xil ak lihe upang. Ti, moletin xil ak litilomun ha lileh uit xil e ha liserep kuh xil liti e povah navan.’”

Iesu Dei Vole Lu usil Suse xa Hi mei Ihe Suv Toto e Meulien Na Moletin Xil

³¹^sE Iesu dei vole tei mun mi vanut moletin xil bitene, “Suse xa Hi mei ihe Suv Toto e meulien na moletin xil ixoni utut mastad xa moletin tei ngguri e ba milihi e naho nan. ³²Tave ti neta xa utut mastad hokorong mak mu ni utiei sav xil, e melele xa meul, di meul tepiei be nesao ba

^r 13:23 Di biteni bit, “...huite xa be 30, 60 e 100.” ^s 13:31 Tumulen ak de Mak 4:30-34; e Luk 13:18-21 mun

vuma ... mei mahulong pupu mili holesok sav xil xa di lalih xil e naho. E melele xa matu, xi mei be holiei xa mahulong xa pipin tangan tuman xil limei lipol ni nunu mae xil e halite nen xil.”^t

³³Iesu dei vole tei mun tesav mi xil bit, “Suse xa Hi mei ihe Suv Toto ixoni is vutei xa atou tei ngguri e bilesi del bak pulaoa tei xa mahulong. E tave ti neta xa miling is hokorong tang en, is ak pol ni pulaoa mikaio ba vuma ... mei be mahulong xa mahulong.”

³⁴E holesok xil xa Iesu misep usili mi vanut moletin xil, xi di misa ni mi xil nggo vole kestang. Xi tenavit kil ti koute nen mi xil. ³⁵Iesu pol ni mak tangan vasak ni sepinien xa Hi tesan ni mi provet tei mei vahe reitin xa bit,

“Inou nitei vole xil.

Reitin, nggo vole xil, nihithiten usil holesok xil xa di texus e melele xa Hi tepeas ni ut etan, e texus tetuxoh xosali.” (Sam 78:2)

Iesu Bit Kil Koute te Vole usil Munae Tesa Xil

³⁶Melele xa Iesu misepin mi vanut moletin xil bus, be reling xil e dilomun be nim xa da en. Moletin nan xil langgusili lamei visali, e lasisi labit, “?Vole usil munae tesa xil, ukila uhit kil koute teni mi xamem?”

³⁷Ma Iesu biteni mi xil bitene, “Koute teni mak. Inou, Nat Moletin, nabe moletin xa naso utut uit xa bos. ³⁸Naho ak be ut etan, e utut uit xil xa lameul bos labe moletin xil xa Hi be Suv Toto nae. E munae tesa xil labe moletin xil xa Temat be suv toto nae. ³⁹Elu na moletin ak xa teso xil be Temat. Melele te leh anien en be hoxalite te melengien xil xa radi en. E moletin xil xa mei lileh anien labe masxaxa xil.

⁴⁰“Nggoni ngan xa laput rerat munae tesa xil e laso xil labe upang, lipol ni imak e hoxalite te melengien xil xa radi en. ⁴¹Reitin, e melele nen ak, inou, Nat Moletin, nisil masxaxa navan xil tangan ha lihe ut xil vus xa di nalaxati, e liput rerat ngan xil xa di lapol misa e holesok sav xil mun xa di misak ni moletin xil di lamot e tesaen. ⁴²Ti, masxaxa xil ha liso moletin tesa xil ak lihe upang xa mahulong, e e rute ak, xil ti limuis e ti liat lohe ve longpangasien nae xil. ⁴³Ti, ngan xil xa lamal pe met Hi, liminehin ixoni eai e rute xa Tame be Suv Toto en. !Xosxa vurongemim di, muteong kuhi ni naha xa di nabiteni!”

Iesu Dei Vole usil Sien na Ngan Xil xa Lamaen Hi Mei be Suv Toto e Meulien Nae

⁴⁴Iesu misepin rilomun mi moletin nan xil bit, “?Melele xa Hi mei be Suv Toto e meulien na moletin tei, ngan ak nggoni naha? Ixoni bokis tei xa holesok holu xa bos di en xa moletin tei teling xuxus ni tete naho tei. Bokis ak da vuma ... moletin sav tei ba mikameti. E melele xa pusi,

^t 13:32 Dan 4:20-22

milonge bos xa bos ven. Ma miling xuxus rilomun ni da, di, dilomun be tim san e pos ni holesok xil vus nan. Di, nggur mani nen e ba nggal rat tan xa bokis ak da en be nan.

45 “?Reitin, melele xa Hi mei be Suv Toto e meulien na moletin tei, ngan ak nggoni naha? Ixoni moletin tei te bisnis xa di milang ves vatiei xil te tas xa bos. 46 E melele xa mikamet vatiei tei xa bos xa bos, xa mani teni mahulong, xi mitemanin. Ma dilomun be tim san, e pos ni holesok xil vus nan. Di, nggur mani nen e ba nggal vatiei te tas ak be nan.

47 “?Vatei mun, melele xa Hi mei be Suv Toto e meulien na moletin tei nggoni naha? Ixoni melele xa laso net tengah laleh meseo xil. Melele xa laso ni be tas, laleh hisit meseo sav xil holu. 48 Melele xa net polu ni meseo xil, lalihi be ut. Di, moletin xil te meseo ladotan xorelisi e laso viton kuh meseo xil xa bos labe valeat xil. E meseo xil xa lasa, laso xil laba. 49 Imak vari e hoxalite te melengien xil xa radi en. Masxaxa xil mei lilepis moletin xil te ut etan ihusil suse nen tak. Xil lileh rerat moletin xil xa lasa ra ngan xil xa lamal pe met Hi, 50 e ha liso moletin xil ak lihe upang xa mahulong. E rute ak, xil ti limuis e ti liat lohe ve longpangasien nae xil.

51 “?Midep, xamim mukil kuh koute te holesok xil ak, mu...?”

E moletin nan xil labit rilomun ni mini labit, “Io, makila.”

52 Iesu biteni mi xil bit, “Nggusil nenemien ak, tisa xil vus te Rae xil na Mosis xa lamaen Hi mei be Suv Toto e meulien nae tengah lihusil kuh pispisien nan xil, xil langgoni eilep tei xa holesok nan xil holu. Ma xi mikila ihe nim man e ileh rerat holesok xil xa bos pupu, ngan xil xa be te nousav, e ngan xil mun xa be neta hu.”^u

Iesu Ba mi Vatimol Xati Nan, e Lasin Ni

53 ^vMelele xa Iesu dei vole xil ak bus, xi be reling rute ak 54 e ba be Nasaret, metimal xati nan. E rute ak, Iesu be nim te pispispian, e dotan mipispisi mi moletin xil. E melele xa lalong pispisien nan xil, latemanin ni e labiteni mi xil mun tang labit, “?Moletin ak nggur kilakilen e xeihen ak nggo xave? 55 ?Tave nat moletin ti taxa di tepol ni nim xil tang? Nana nan be Meri. E tuneli xil labe Temes, Siosep, Saemon e Sudas tang. 56 Hineli xil vus ladi visal xir e rute ak. !Moletin ak be tei e xir tang! ?Mak, ma xi nggur holesok xil ak nggo xave?” 57 Ve rin ak, moletin xil tine misoh e lanem male ni Iesu.

E Iesu biteni mi xil bitene, “Moletin xil vus di lamerere ni provet tei na Hi. E moletin xil te metimal xati nan e vatimol xati nan mun, xil lanem male ni vari.”

^u 13:52 Sepinien nen ak di misep usil pispisien xil te nousav xa di oltestamen, e pispisien hu xil na Iesu xa di e niutestamen. ^v 13:53 Tumulen ak de Mak 6:1-6; e Luk 4:16-30 mun

⁵⁸Misak ni, e rute ak, Iesu tapol ni ti merekel xil vahe holu vengon xa neketen nae tovuol en.

Maten na Sion Baptaes

14 ¹W^e melele nen ak, suv toto Herod Antipas xa milaxat provins tahal Kaleli milongeong ni holesok xil xa Iesu di pol ni. ²Ma Herod biteni mi moletin te polien nan xil bit, “Iesu ak be Sion Baptaes vari. Tave ti neta xa xi mat, e meul rilomun ra maten. Ve rin ak iaxa nggur xeihen tangan vapol ni merekel xil.”

³⁻⁴Suv toto Herod Antipas minexo pupu mak vengon xi vari tesa raen tangan moletin te vaeen nan xil ha lital xat Sion, livar xati, e liso ni ihe nim te xeih. Xi tepol ni temak vengon xa Sion tesepin texeih teha xati tehit, “Herod, sexien nam xil tamal ti vengon di otehi mi Herodias, atou na tumali Pilip. Naha xa di opol ni nggur xoteh rae na Hi.” ⁵E tave ti neta xa Herod bit vahas Sion vamat, xi tenapol ni ti vengon ulin tekan ni ekaten na moletin xil vengon xil di latenemi latehit Sion Baptaes tehe provet tei.

⁶Di, vatei, latepol ni anien ve melengien xa latepes suv toto Herod en. E melengien ak, atuli na Herodias tehol pe met moletin xil vus e tesak ni Herod tehesi xi tehe holu ven. ⁷Misak ni, xi pol ni hitxatien tei te xeih mi atuli ak xa isa naha vari xa ien bei mini. ⁸Ma atuli ak be visal ninen e misepin mini. Di, dilomun ba pus suv toto Herod e biteni mini bit, “Taxeak, ieok bei tangan uhas vin Sion Baptaes, uta xoteh vatin, e usa ni minou e tre tova.” ⁹Melele Herod milonge mak, xi milonge misa pupu. E neta sav xa milonge mak, xi misemaen ni moletin nan xil tangan ha lipol ni, vengon ien ti tavei vahur xoteh hitxatien nan pe met moletin xil. ¹⁰Ma moletin te vaeen nan xil labe nim te xeih, e lada xoteh vat Sion ra tiei nan. ¹¹Di, laling vatin de tre tei e langguri ba lasa ni mi atuli ak. E xi sung, ngguri ba misa ni mi ninen. ¹²Melele xa moletin xil na Sion lalongeong ni xa xi mat, lamei e lapo tiei nan, ba ladihin ni. Di, ba labit mese ni mi Iesu.

Iesu Bangan Moletin Xil xa Lali Taosen Lim (5000)

¹³x¹³Melele xa Iesu milongeong ni xa Sion mat, xi be bot del moletin nan xil e labalis labe ri oei e rute xa moletin latovuol en. E melele xa moletin xil lalonge, xil langgo taon nae xil e ba langgusili. ¹⁴Ma melele xa Iesu but be reling bot, xi pus vanut moletin xil xa mahulong di ladatili tuei. E melele xa pus xil, en misae e xil e midal rat ngan xil xa lamesei ra meseien nae xil.

^w **14:1** Tumulen ak de Mak 6:14-29; e Luk 9:7-9 mun ^x **14:13** Tumulen ak de Mak 6:30-44; Luk 9:10-17; e Sion 6:1-14 mun

¹⁵E melele xa eai minu, moletin nan xil lamei visali e labitene mini labitene, “Rute ak da suei e da be vongien xiak. Bos xa usil rerat vanut moletin xil ak liha tangan ha lihe metimal xil e lixal ti anien ae.”

¹⁶E Iesu biteni mi moletin nan xil bitene, “Rinasil rerat xil ti linaha. Xamim tang musa anien mi xil tangan lia ni.”

¹⁷E labit rilomun ni mini labit, “!Ei! ?Mupol ni itep, vengon xa anien ar tapin ti? Pusi xiak, beret be lim e meseo mun be lu tang.”

¹⁸Iesu biteni mi xil bit, “Musa ni vamei minou.” ¹⁹Di, xi biteni mi vanut moletin xil tangan litotan e ut tei xa bos xa husmunae di en. Melele xa ladotan bus, nggur beret lim del meseo lu, miketeh be nesao e misa memesien ba mi Hi ven. Di, bul papas beret xil e misa ni mi moletin nan xil tangan liti beret ak itel meseo mun mi vanut moletin xil. ²⁰Moletin xil vus langganien kuhi e vange polu. E melele xa moletin xil na Iesu laba mun tangan laleh saxut anien xil, lase ni be valeat lu e le tei (12) ba vuma ... xil vus lapolu. ²¹E melele nen ak, tiramue xil xa langganien duxoh taosen lim (5000). E atou e horamue xil, latavuli xil ti.

Iesu Mikakao e Ramut Oei

²²Melele xa langganien bus, Iesu biteni mi moletin nan xil tangan litiamu ni lihe ri Oei Kaleli. E xi kestang ita tangan isil rerat vanut moletin xil lihaha. ²³Melele xa misil rerat moletin xil bus, xi mika sen tang be nesao e vathu tei tangan vasis. E Iesu da tasen ba duxoh vongien.

²⁴E melele nen ak, moletin xil na Iesu ladi e bot nae e Oei Kaleli, sotin ra ut. E xil di lakameti nggeih tangan lavalis vengon labisu ni votiang tei xa nggeih e tahe xil mun di labas bot nae.

²⁵E makoe roroh, ut taluv pilei ti mu, Iesu bemei visal xil e di mikakao e ramut oei nggoni ngan taxa di mikakao e tan tang. ²⁶E melele xa moletin nan xil lapusi xa di mikakao e ramut oei, ulixil mikan tova tang e lameun be nesao labit, “!Aue li! !Temat tei!”

²⁷E vatei takes, Iesu misepin mi xil bit, “!Ulimim nakan ti! !Inou tang! Tinemim namalulul ti.”

²⁸E Pita bit rilomun ni mini bit, “!Suv, xosxa be xouk reitin, uhiteni minou tangan nikakao e ramut oei e nihat visaluk!”

²⁹Ma Iesu biteni mini bit, “!Amei!”

Misak ni Pita but be reling bot e da mikakao e ramut oei ba ni Iesu. ³⁰E melele xa Pita pusi xa votiang di bemei nggeih, ulin mikan, ma da palrir e oei. Melele xa pusi mak, miki be nesao bit, “!O suv, ututou ni nou li!”

³¹Vatei takes, Iesu misa hen e dal xati bit, “!Neketen nam hokorong pupu! ?Veneh ma otones ti e nou?”

γ 14:22 Tumulen ak de Mak 6:45-52; e Sion 6:15-21 mun

³²E melele taxa lube bot, votiang be tan. ³³Melele xa lapusi mak, moletin xil xa ladi e bot lamot mi Iesu e labiteni mini labit, “!O reitin mak, xouk vari iaxa obe Nat Hi!”

³⁴Di, langgur xoteh Oei Kaleli ba vuma ... laduxoh ut e tan tahal Kenesaret. ³⁵E melele xa moletin xil te rute ak lapus kila xa be Iesu, lasa sepinien ba mikapis rute xil vus xa di sangas. Misak ni, moletin xil holu laleh ngan nae xil xa di lamesei lamei lapus Iesu. ³⁶E ladak kesi tengan imaien xil lituxol seri eising nan tang. E xil vus xa laduxoli, meseien nae be reling xil.

**Iesu Pispisi usil Naha xa Misak ni Moletin Xil
Lamese mu Latamese Ti Pe Met Hi**

15 ¹Vatei, Farasi xil e tisa xil te Rae xil na Mosis langgo Serusalem, lamei visal Iesu e lasisi labit, ²“?Veneh ma moletin nam xil latahusil xat ti sexien xil xa elda nar xil tetiamu latesa ni mi xir? Vengan moletin nam xil latakas he xil ti mu vamese, ti, lavaanian sung.”

³Iesu bit rilomun ni mi xil bit, “?E veneh vari xamim di munggur xoteh rae xil na Hi tengan muhusil kuh pispisien namim xil tang? ⁴Vengan Hi biteni bit, *‘Mumerere ni tamemim e ninemim xil.’* (Eks 20:12) E biteni mun bit, *‘Xosxa moletin tei isuhol tamen mu ninen, ma lihasi imat.’* (Eks 21:17) ⁵E xamim di mupispisi mi moletin xil xa likila lihiteni mi tame e nine xil lihit, ‘Holesok xil navan xa nakila nitutou ni xamil ni, ngan xil ak nasikoe xole ngamu tengan nisa ni mi Hi kestang.’ ⁶Nggo rin ak, di mupispisi mi moletin xil xa linamerere ti mun ni tame e nine xil natel holesok nae xil. Ma pispisien namim xil di pol ni sepinien xil na Hi mei be neta sav tang. ⁷!Xamim mumese nggo hilibemim kestang! Naha xa Hi tehiteni usil xamim texo provet Aesea momal xa bit,

⁸ *‘Moletin xil ak di lamerere ni nou del sepinien nae xil kestang,
e tine di sotin ra nou.*

⁹ *Tave ti neta xa di lamot minou,
ieok ti tavei nakil ti.*

*Vengan xil di lasa pispisien xil xa be na moletin xil tang,
e di labiteni xa inou iaxa ieok bei tengan lihusili.’* (Aes 29:13)

¹⁰Di, Iesu biles e mikes vanut moletin xil lamei visali e biteni mi xil bit, “!Muteong kuhi tengan mukila! ¹¹Tave holesok xil ti xa moletin tei ngguri nggo vulongen be tinen iaxa di misak ni mei tamese ti pe met Hi. !E-e, tamak ti! E sepinien xa mistal nggo vulongen iaxa mikila vasak ni moletin ak mei namese ti pe meten.”

¹²Melele xa Iesu be reling vanut moletin xil, moletin nan xil labiteni mini labit, “?Xouk okila xa Farasi xil tine tesoh melele xa latelong sepinien nam?”

^z 15:1 Tumulen ak de Mak 7:1-23 mun

¹³E Iesu bit rilomun ni mi xil bitene, “Farasi xil ak langgoni vatiei xil xa Tata navan xa de ut nesao tenalih xil ti.^a E limei liput rat xil itel lit xil. ¹⁴Mustokovein xil liti nga. Xil labe metevar, e di lasak pisi tangan ti litiamu ni metevar sav xil mun. E xosxa metevar tei di diamu ni metevar tei mun, ma xalu vus lalimot lalihe vul tei.”

¹⁵E Pita biteni mini bit, “Hit kil koute te vole ak mi xamem li.”

¹⁶Di, Iesu misis xil bit, “?!Midep, xamim mutakil ti mu!? ¹⁷?Mutakil ti xa holesok xil xa mungguri nggo vulongomim be vangemim tang. Ma di, mistal be reling tiei namim, ba be tisok tang. ¹⁸E holesok xil xa di tinemim e musepin ni nggo vulongomim, xi vari iaxa di pol ni xamim mutamese ti pe met Hi. ¹⁹Vengan melele xa tine moletin tei misa, xi di pol ni hisit sexien tesa xil ak: minem usil holesok xil xa misa, bas vin moletin xil, mikan ni atou na mosav xil, di pat vituei del mosav melele xa lutateli ti mu, di mikan ni neta na mosav xil, di miluvos ni his mosav xil e kot, e di misep purun his mosav xil mun. ²⁰Sexien xil ak di lapol ni moletin xil latamese ti pe met Hi. E xosxa moletin tei takas hen ti mu vamese, ti, vaanian sung, ngan ak misakras vapol ni moletin tei namese ti.”

Atou Tei xa Tave Siu Ti Mineket e Xeihen na Iesu

²¹^bDi, Iesu be reling rute ak e ba be rute sav tei xa be sangas ni metimal xalu tahal Taer e Saedon. ²²E ate-Kenan tei xa de rute ak bemei visal Iesu e dak kesi bit, “!O suv li, xouk xa ostal onngo vatimol na suv toto Deved! !Iem isae e nou li! Ninin tesa tei da xat atuli navan e di pangei tova tang.”

²³E Iesu tasa ti sepinien tova mini. Ma moletin nan xil lamei visal Iesu e labiteni mini labit, “Usil rat atou ak iha vengan di mikei nggeih bemei mi xir.”

²⁴Misak ni, xi biles e biteni mi atou ak bit, “Hi misil nou tangan namei ve mol-Isrel xil kestang xa langgoni sipsip xil san xa lakesae.”

²⁵E ate-Kenan ak bemei e mitingeiril pe meten e dak kesi nggeih bit, “!O suv! !Tutou ni nou li!”

²⁶E xi bit rilomun ni mini bit, “Tamal ti xa lavur anien a horamue xil e laso ni tang vaha mi kuli xil.”

²⁷E atou bit rilomun ni mini bit, “Suv, ngan ak be reitin. E kuli xil mun xa ladi xorelis von anien en lakila lava saxut anien xil xa suv nae di ngga lingi.”

²⁸Di, Iesu biteni mini bit, “!Atou li, neketen nam mahulong tova tang! Naha xa di osis nou ni mei istal ihe reitin.” E vatei takes, atuli nan mei bos rilomun.

^a 15:13 Aes 60:21 ^b 15:21 Tumulen ak de Mak 7:24-30 mun

Iesu Bangan Moletin Xil xa Lali Taosen Hat (4000)

²⁹Melele xa Iesu be reling tan tahal Keneseret, xi del moletin nan xil langgusil seri Oei Kaleli. Di, labe hu tei e ba ladotan ladi. ³⁰Di, vanut moletin xil holu lamei tangan lapus Iesu e laleh ngan nae xil xa lamesei: ngan xil xa lasakras lakakao, ngan xil xa mete bar, ngan xil xa le mikavui, ngan xil xa labe vut, e holu e ngan tesav xil mun xa langgur meseien sav xil. Laling kekes ni xil pe met Iesu, e xi pol ni xil vus mei labos rilomun. ³¹E melele xa moletin xil lapus naha xa Iesu pol ni, latemanin holu vengan xa ngan xil xa labe vut, di lasepin; ngan xil xa le xil mikavui, le mei momal; ngan xil xa lasakras lakakao, di lakakao; e ngan xil xa labe metevar, di laketeh. Melele xa lapusi mak, lapet rat his Hi na mol-Isrel xil ven.

³²Di, Iesu mikes viton moletin nan xil e biteni mi xil bit, “Ieok di misae e moletin xil ak vengan ladi visal xir melengien tol ngamu e anien ae tovuol. Ieok ti tave tangan nasil rerat xil latilomun lave tim sae xil melele xa mae dit nggat xil. Maxani, vexil namal e mete xil namaluxoluk e suse.”

³³E moletin nan xil lasisi labit, “!Inggak be uruvuol! ?Rikamet anien e rute xave tangan rakila rihengan vanut moletin xil xa mahulong xiak?”

³⁴E Iesu misi xil bit, “?Beret vahis mungguri?”

Labit rilomun ni mini labit, “Beret lu e he sav (7) tang e tutut meseo vahis.”

³⁵Ma Iesu biteni mi vanut moletin xil tangan litotan e tan. ³⁶Melele xa ladotan bus, Iesu nggur beret lu e he sav (7) e meseo vahis e misa memesien ba mi Hi ven. Di, bul papasi e misa ni mi moletin nan xil tangan ha liti mi moletin xil. ³⁷Moletin xil vus langganien e vange polu. E melele xa moletin xil na Iesu laba mun tangan laleh saxut anien xil, lase valeat lu e he sav (7) ba vuma ... xil vus polu. ³⁸Tiramue xil xa langganien e melengien ak laduxoh taosen hat (4000). E atou e horamue nae xil latavuli xil ti. ³⁹E melele xa Iesu misil rerat vanut moletin xil ak labaha, xi del moletin nan xil labe bot e ba labe rute tei xa lakesi ni Makatan.

Rut Eilep Xil na Siu Xil Lasis Iesu Tangan Vapol ni Neta

Tei xa Eilep Vapisen ni xa Xi Texo Hi Reitin

16 ¹Vatei, Farasi e Satusi xil lamei visal Iesu tangan lasak pisi. Ma lasisi tangan vapol ni neta tei xa eilep vapisen ni xa xi texo Hi reitin.

²E Iesu bit rilomun ni mi xil bit, “Melele xa eai minu, xamim mubiteni mubit, ‘?Mupusi? Tilang hat pili. Ngan ak pisen ni xa an ihos visuvong.’

^c 15:29 Tumulen ak de Mak 8:1-10 mun ^d 16:1 Tumulen ak de Mak 8:11-13; e Luk 12:54-56 mun

³E melele xa ut milan, mubiteni mubit, ‘Tilang hat pili. Ngan ak pisen ni xa an isa xosali.’ Xamim mupus kil naha xa di mistal e tilang hat, e musakras mupus kil naha xa eilep xa Hi di pol ni xosali. ⁴Xamim moletin xil te xosali ak, mubit mupus ti neta tei xa eilep vapisen ni xa natexo Hi reitin. Di mubit mupusi vengan xa meulien namim mikavui e munggoni atou tei xa be na Hi, e di maen xi mi ngan tesav xil mun. E ninapol ni ti neta tova xa eilep tangan mupusi. Ti mupus neta tei takes xa ixoni ngan xa testal mi provet Siona tetiamu.” Di, Iesu biles e be reling xil.

Iesu Misel Xat Moletin Nan Xil tangan Lilaxat Kuh Xil ve Pispisien Xil na Farasi e Satusi Xil

⁵“Di, Iesu del moletin nan xil langgur xoteh Oei Kaleli. E melele xa laduxoh rin, moletin nan xil lanem rilomun ni xa iexil bovorong ni beret ae. ⁶E melele xa laba, Iesu biteni mi xil bitene, “Mulaxat kuh xamim ve ‘is’ na Farasi e Satusi xil.”

⁷Melele xa lalong sepinien nan, lasep usili del xil mun tang labit, “Xi misepin mak mi xir vengan xa rataleh ti beret ar.”

⁸E Iesu milong kil naha xa di lasep usili. Ma ba biteni mi xil bitene, “!Neketen namim hokorong pupu! ?Veneh ma di musep usil beret xa ar tovuol? ⁹?!Mutakil ti mu!? ?Iemim bovorong ni ngamu xa natehengan tiramue xil latehe taosen lim (5000) tetel beret lim (5) tang? E valeat vahis polu ni rut anien xil xa muteleh viton ni? ¹⁰?E munem usil melele xa natehengan moletin latehe taosen hat (4000) tetel beret lu e he sav (7) tang. ?E valeat vahis polu ni rut anien xil xa muteleh viton ni? ¹¹?Ma veneh ma mutakil ti mu xa inou natasep usil beret ti? E mulaxat kuh xamim ve ‘is’ na Farasi e Satusi xil.” ¹²Ma xil lanem kila sung xa xi taviteni ti tangan lilaxat kuh xil ve is te beret, e ve pispisien xil na Farasi e Satusi xil.^f

Pita Bit Rati xa Iesu be Kristo xa Hi Tehit Xati Imei

¹³^gIesu e moletin nan xil lakakao laba, laduxoh rute tei sangas ni taon tahal Seseria-Filipae. E inggak, xi misis moletin nan xil bit, “?Moletin xil labiteni xa inou, Nat Moletin^h, nabe visi vari?”

¹⁴E labit rilomun ni mini labit, “Rut moletin xil labit obe Sion Baptaes. E rute ngan xil labit obe provet Ilaetsa. E rute sav xil mun labit xouk obe provet Seremaea tetiamu mu provet sav tei.”

¹⁵E xi misis xil bit, “?E xamim, midep? ?Mubit inou nabe visi vari?”

e **16:5** Tumulen ak de Mak 8:14-21 mun f **16:12** Pispisien xil na Farasi e Satusi xil nggoni ‘is’ e rin xa di laso rin pispisien xil holu xa tamal pupu ti del xat sepinien xil na Hi, e pispisien nae xil di duxoh mol-Isrel xil vus. g **16:13** Tumulen ak de n Mak 8:27-30; e Luk 9:18-21 mun h **16:13** Dan 7:13 di misep usil Nat Moletin.

¹⁶E Saemon Pita mitamea e bit, “Xouk obe Kristo. Reitin, obe Nat Hi xa meul da.”

¹⁷E Iesu biteni mini bit, “Saemon, nat Siona, tuxolxatien na Hi di minuk ngamu. Vengan xa tave moletin ti xa vahit rat ngan ak minuk. Tata navan xa de ut nesao, xi vari bit rati minuk. ¹⁸E nabiteni minuk xa obe ‘Pita’ xa koute teni be ‘vatihat’. E vatihat ak, nikili ni Sias navan. E xeihen xil vus na Temat e maten lasakras mei lapurun ni. ¹⁹Nisak ni xouk mei uhe vat na moletin navan xil. Ve rin ak, naha xa uhit xole e ut etan ak, Hi mun ihit xole. E naha xa umae ni e ut etan, Hi mun imae ni.” ²⁰Di, Iesu misep xol moletin nan xil tangan linahit rati ti mi moletin tova xa xi be Kristo xa Hi tehiti xati tangan imei.

Iesu Misep usil Longpangasien, Maten e Mea Rilomunen Nan

²¹E melele nen ak ba, Iesu misep kila mi moletin nan xil xa ihe Serusalem. E melele xa ituxoh Serusalem, xi ihur longpangasien holu ixo he elda xil, vat xil na pris xil, e tisa xil te Rae xil na Mosis. Xi bit mese ni xa xil lihas vini. Ti, e melengien tol nen, imea rilomun ra maten.

²²Melele xa Iesu biteni mak, Pita dela be rin, e misepin nggeih xati bit, “!Suv, onasepin ti namak! !Holesok xil ak misakras vastal minuk!”

²³E Iesu biles, pus Pita e biteni mini bit, “!Temat, he reling nou! Nenemien ak be neta tei xa di misak pisi tangan ipol ni nou nisavut e suse navan. Vengan xouk di onggusil xat nenemien na moletin xil te ut etan, e otahusil nenemien na Hi ti.”

²⁴Di, Iesu biteni mi moletin nan xil bit, “Xosxa moletin tova ien bei tangan ihusil nou, ma isin meulien nan, ipo eivave te maten nan, e ihusil xat nou. ²⁵Vengan xa ngan xil xa lasak pisi tangan likenin meulien nae ve xil tang, ma meulien nae ikesai ra xil. E ngan xil xa lamaen meulien nae ikesai vengan di langgusil xat nou, ma, e ut nesao, xil likamet meulien sal.

²⁶?Naha xa bos, xosxa moletin tei mileh holesok xil vus te ut etan ak, e di misa rat meulien nan tangan vapol ni? !Neta tovuol vari! Vengan xi misakras vasa neta ngan tangan ihur rilomun ni meulien nan.

²⁷“Tave nousav ti, inou, Nat Moletin, nitilomun itel xeihen xa tellep xa Tata navan isa ni minou e itel masxaxa nan xil. E melele nen ak, nisa kekes ni huit polien mi moletin xil vus ihusil naha xa xil latepol ni. ²⁸Reitin nabiteni mi xamim, rut xamim xa di lasoh del nou xosali, linamat ti mu e lipus melele xa inou, Nat Moletin, nimei tangan mei nihe suv toto na moletin xil vus.”

ⁱ 16:21 Tumulen ak de Mak 8:31-9:1; e Luk 9:22-27 mun

Tenbe Iesu Mei Mihinehin

17 ¹Melele xa melengien tei e he sav (6) mei mitavi, Iesu nggur Pita, Temes del Sion (xa be tua na Temes) e del xatel latobe nesao e vathu tei tengan xatel ak kestang latoti vituei en. ²Inggak, latpus tenbe Iesu biles. Valnaon mihinehin nggoni eai, e eising nan xil mei mieh pupu e mihinehin nggoni laet. ³Vatei takes, latpus Mosis e Ilaetsa lustal e ba lusepin del Iesu.

⁴Melele xa Pita pus xalu, biteni mi Iesu bit, “!Suv, bos xa ratdit ak! Xosxa iem bei, ma matkili ni horao ihe tol: tei ihe mam, tei ihe ma Mosis, e tei ihe ma Ilaetsa.”

⁵Melele xa di tamu misepin, momah tei xa mihinehin pupu mei mikutaxol xatel. E latlong rae tei mistal nggo en xa bit, “Ngan ak be Natuxoli reitin xa eheien navan di en. Inou nabesi nou pupu ven. !Muteong xati!”

⁶Melele xa Pita xatel latlong rae ak, uli xatel mikan pupu, e latomot latobe tan. ⁷Melele xa ladi tamu e tan, Iesu bemei e duxol xatel bit, “Totamea. Ulimitel nakan ti mun.” ⁸E melele xa latpet rat metexatel, lattapus ti mun moletin xalu ak, Iesu kestang de visal xatel.

⁹Melele xa di latsuvul ra vathu ak, Iesu misep xol xatel bit, “Mutnahiteni ti mi moletin tova usil naha xa mutepusi ituxoh melele xa inou, Nat Moletin, nimea rilomun ra maten.”

¹⁰E moletin nan xatel latsisi latbit, “?Veneh ma tisa xil te Rae xil na Mosis labiteni xa Ilaetsa imei itiamu ni Kristo xa Hi tehiti xati?”^k

¹¹E Iesu bit rilomun ni bit, “Reitin xa Ilaetsa imei tengan ipol ni holesok xil vus mei imal rilomun. ¹²E nabiteni mi xamitel xa Ilaetsa temei ngamu e moletin xil latnapus kil ti. Xil latepol tesa mini texoni ngan xa iexil tehei. E suse nen tak, tave nousav ti, inou mun, Nat Moletin, nihur longpangasien e he xil.” ¹³Melele xa Iesu biteni mak, ma latlong kila sung xa xi di bit usil Sion Baptaes.

Iesu Misak Pilei Horamue Tei xa Ninin Tesa Tei Da En

¹⁴Melele xa Iesu xatel latsuvul ra vathu ak, latbisu ni vanut moletin xil. E moletin tei bemei visal Iesu, mitingeiril pe meten, ¹⁵e biteni mini bit, “O suv li, iem isae e natuxoli, vangan xi mermesil e milong pangas xi pupu ven. Melengien holu, xi di mot be upang mu oei. ¹⁶Natehuri temei visal moletin nam xil, e xil lasakras lapol ni mei bos rilomun.”

¹⁷Melele xa Iesu milong mak, biteni bit, “!Iva! !Xamim moletin xil te xosali ak, mukavui e neketen namim tuvuol vari! ?Niti visal xamim ituxoh

j 17:1 Tumulen ak de Mak 9:2-13; e Luk 9:28-36 mun ^k 17:10 Mal 4:5 ^l 17:14 Tumulen ak de Mak 9:14-29; e Luk 9:37-43 mun

vilieh? Veok buol ni xamim xa neketen namim tovuol. Muhur horamue ak vamei visal nou inggak.”¹⁸ E melele xa Iesu pus horamue ak, minggol rerat ninin tesa be reling, e, vatei takes, horamue ak mei bos rilomun.

¹⁹Dutou ni melele nen ak, melele xa Iesu da sen tang, moletin nan xil lamei visali e lasisi labit, “?Veneh ma xamem matesakras mavol rerat ninin tesa ak?”

²⁰E Iesu bit rilomun ni mi xil bit, “Vengan xa neketen namim hokorong pupu. Reitin nabiteni mi xamim, xosxa munggur neketen xa hokorong nggoni utut mastad, mukila muviteni mi vathu ak muvit, ‘Umea ra rute ak, e uha xor’, ma iha xor. Xosxa neketen namim di, ma neta tovuol vaxeih tengan mupol ni.”^{21 m}

²²Di, lamea reling rute ak e lakakao labe provins tahal Kaleli. E melele xa di lakakao laba, Iesu biteni mi xil bit, “Nave nousav ti, inou, Nat Moletin, limaen ni ihe he moletin xil te ut etan. ²³Xil lihas vin nou. E, e melengien tol nen, nimea rilomun ra maten.” Melele xa moletin nan xil lalonge mak, lanexo pupu.

Iesu Nggal Takis te Nim Eo Nggo Merekel Tei

²⁴Vatei, Iesu del moletin nan xil di lakakao e lamei e taon tahal Kapaniam. Inggak, moletin xil xa laleh mani te takis te Nim Eo lamei visal Pita e lasisi labit, “?Midep? ?Tisa nam di nggal takis te Nim Eo, mu taxali ti?”ⁿ

²⁵E Pita bit rilomun ni mi xil bit, “Io, xi nggale.”

Di, Pita dilomun be tim. Xi tasepin ti mu, e Iesu misis bit, “?Saemon Pita, onemi midep? ?Suv toto xil te ut etan di laleh takis e duti ra moletin si xil?° ?Lalehi ra horamue nae xati, mu ra moletin sav xil tang?”

²⁶E Pita bit rilomun ni mini bit, “Lalehi ra molettin sav xil.”

Iesu biteni mini bit, “Imak, ma horamue nae xati xil linaxal ti takis. ²⁷E tave ti neta xa Hi xa be Suv Toto te holesok xil vus be Tata naralu, ralixal takis te Nim Eo nan vengan xa tavos ti xa ralsak ni moletin xil ak tine vasoh ve ralu. Ma ha, uhe Oei Kaleli e uso huk. Meseo xa usare itiamu, usah vulongen, e ukamet mani tei xa ipin tangan uxal rat takis naralu ni. Ti, uhuri e usa ni mi moletin xil ak.”

Iesu Pispisi usil Visi Iaxa Be Eilep Mak Mu Pe Met Hi

18 ^{1p}E melele nen ak, moletin xil na Iesu lamei visali e lasisi labit, “?Visi iaxa be eilep mak mu e ngan xil xa Hi be Suv Toto nae?”

^m 17:21 Rut uvei na Matiu lateling sepinien ak teti en xa bit, “Moletin mikila vaxol rerat hisit ninin tesa ak melele xa misis e di bal ra anien.” ⁿ 17:24 Takis te Nim Eo tehe drakma lu na tiramue xil kekes xa texoni vatu taosen lu (2000 vt). ^o 17:25 Duti nggoni vat, takis xa lalingi da xat praes te holesok xil xa langgur ra ut sav xil. ^p 18:1 Tumulen ak de Mak 9:33-37; e Luk 9:46-48 mun

²Iesu mikes tutut horamue tei e pol ni mei misoh pe met xil. ³Di, biteni mi xil bitene, “Reitin li nabiteni mi xamim, xosxa munaviles nenemien namim ti tangan mei muxoni horamue ak, ma musakras muve rute xa Hi be Suv Toto en. ⁴Misak ni, ngan xil xa lapol ni nenemien nae be tan nggoni horamue ak, xil lihe eilep mak mu e rute xa Hi be Suv Toto en. ⁵E moletin tei xa nggur pilei horamue tei nggoni ngan ak e hisok, ma nggoni ngan xa di minggur pilei nou.

⁶“E xosxa moletin tova isak ni moletin tei xa nggusil xat nou nggoni horamue ak tangan imot e tesaen, ma Hi isa longpangasien isa mak mu mini. Bos mak mu xosxa lavar xat hat tova xa mahulong pupu vate huranen, e laso ni vamarir e huinep te tas. ⁷Reitin xa holesok xil di lasak pis moletin tei tangan vamot e tesaen di bemei. !E isa mak mu mi ngan xil xa labe suse te tesaen xil ak!

⁸“!Nggusil nenemien ak, xosxa hem mu lem misak ni xouk di omot e tesaen, ma uta xotehi e uso ni iha! Ihos mak mu xa rut tenbom tang isa e uhur meulien sal, ili ngan xa hem xalu e lem xalu lubos tang ludi e liso xouk uhe Upang xa misakras vamat. ⁹!Xosxa metom tei misak ni xouk di omot e tesaen, ukis rati e uso ni iha! Ihos mak mu xa metom tei mikesae e uhur meulien sal, ili ngan xa metom xalu vus ludi tang e liso xouk uhe Upang xa misakras vamat.”

Iesu Dei Vole usil Sipsip Xa Mikesae

¹⁰“Melele xa horamue ak di tamu misomal pe mete, Iesu biteni mi moletin nan xil bit, “Muxuxou kuhi ve xamim tangan munanem male ni moletin xil xa langgusil xat nou nggoni horamue ak. Reitin li nabiteni mi xamim xa masxaxa nae xil ladit pe met Tata navan e ut nesao. E xil lihit mesen ni xosxa moletin tei di pangei xil. ¹¹”

¹²“?Xamim munemi midep? ?Xosxa moletin tei, sipsip san xil duxoh handred tei (100) e tei e xil mikesae, ma xi ipol ni neh? ?Munemi xa ihe reling sipsip sav san xil xa labe hanutap hat e hat e le tei mun (99) liti e seri hu tei tangan ha ilang ves ngan xa mikesae? !Ioi! ¹³E reitin li nabiteni mi xamim xa, xosxa ikameti, ma ihesi xi pupu ven, ili sipsip sav san xil xa latakasae ti. ¹⁴Nggusil rin ak, Tamemim xa de ut nesao ien ti tavei tangan ti moletin xa nggusil xat nou nggoni horamue ak vakesae.”

Iesu Pispisi usil Sexien tangan Moletin Imal ni Tunali xa Pol Misa Mini

¹⁵Iesu dit ni ngan taxa di misepin mi moletin nan xil usil ngan xil xa di lapol misa mi mosav xil bit, “Xosxa tumali tei pol misa minuk, xouk tasom uhe visali

¶ **18:8** Tumulen ak de Mat 5:30; e Mak 9:42 mun ¶ **18:10** Tumulen ak de Luk 15:3-7 mun
 § **18:11** Tetiamu, melele xa moletin xil di latetis rilomun ni uvei ak na Matiu, rute ngan xil laso rin ni vas 11 xa de Luk 19:10 mun xa bit, “*Inou, Nat Moletin, namei tangan nalang ves hisit moletin xil xa lakesae tangan niteh meulien e xil.*”

e upisen naha xa xi tepol ni xa tenamal ti minuk. Xosxa iteong kuhi ni xouk e mulimal ni xamil, ma uhesi xouk vengan muliti ihos rilomun. ¹⁶E xosxa xi nateong ni sepinien nam ti, utilomun uhe visali itel moletin sav tei mu lu mun. Xalu mun lalipusi e lalisepin mini e rin nam xa be reitin xa otesak pisi tangan umal ni xamil. ¹⁷E xosxa tumali ien ti tavei tangan vateong ni xamitel, ma ha mutihit mese ni pe met vanut moletin xil te Sias na Hi. E xosxa moletin ak ien ti tavei tangan vateong ni ngan xil te Sias mun, ma mupusi ixoni ngan taxa xi takil ti Hi mu be moletin tesa tei nggoni ngan xil xa di laleh takis.

¹⁸“Reitin li nabiteni mi xamim, naha xa xamim di musep xole e ut etan, ixoni ngan xa Hi mun xa de ut nesao di misep xole. E naha xa di mumaen ni e ut etan, ma ixoni ngan xa Hi mun xa de ut nesao di maen ni.

¹⁹“Reitin li nabiteni mi xamim xa xosxa xamil lu xa mudi e ut etan ak mulimei e nenemien tei usil neta ngan e mulisis ven, ma Tata navan xa de ut nesao isa huit sisen namil. ²⁰Vengan xa melele xa moletin lu mu tol latomei vituei e hisok, inou mun nite visal xil e rute ak.”

Iesu Dei Vole usil Longpangasien xa Istal mi Ngan Xil xa Iexil Ti Tavei Tangan Laketeh Vahos Rilomun mi Mosav Xil

²¹Di, Pita bemei visal Iesu e misisi bit, “?Suv, xosxa tua navan pol misa minou, niketeh ihos rilomun mini ituxoh vahis? ?Ituxoh lu e he sav (7)?

²²Iesu bit rilomun ni mini bitene, “E-e, tave lu e he sav (7) ti. Uketeh ihos rilomun mini ihe lu e he sav (7), ti, upol ni ihe lu e he sav (7) mun, ti, upol ni ihe lu e he sav mun (7) ha vuma ... osakras ovuli mun.^t

²³“Nihit kil sexien ak ni vole tei. Melele xa Hi mei ihe Suv Toto e meulien na moletin xil, ngan ak ixoni suv toto tei xa ien bei tangan imal ni kaon xa moletin te polien nan xil latepol ni tetela. ²⁴E melele xa xi di momal ni kaon xil ak, ladel moletin tei xa kaon nan mili gol mani^u milian hexalu (10,000,000). ²⁵E vengan xa suse tovuol tangan moletin ak ixal rat kaon nan, suv toto nan misemaen ni tangan lipos ni xi, atou nan, e horamue nalu xil vus mei lihe slev xil, e lipos ni holesok xil vus nan mun. E suse ak, suv toto bit mani nen mei ixal rat kaon xil vus nan.

²⁶“Melele xa moletin ak milonge mak, mitingeiril pe met suv toto e dak kesi bit, ‘!Aue li! !Usa mesal tova mun xa hokorong minou li, e nixal rat holesok xil vus xa di kaon navan!’ ²⁷Melele xa suv toto ak milonge mak, en misae en. Ma misil len kaon nan e maen ni ba ven mase.

²⁸“E melele xa moletin ak mistal, mikamet moletin te polien sav tei xa kaon nan dela be gol mani vahis tang. E melele xa pusi, miki xat huraaen e biteni mini bit, ‘!Uxal rat mani xil vus xa otehuri ranou!’

^t **18:22** Sepinien xati teni bit, “Upol ni lu e he sav, e upol ni imak hanutap tol e hexalu mun (7 x 70).” ^u **18:24** Gol mani tei takes nggoni 1000 vatu. Ngan ak be mani tei xa eilep pupu xa moletin tei misakras vaxal rati.

²⁹“E moletin te polien ak mitingeiril pe meten e dak kesi bit, ‘!Aue li! !Usa mesal tova mun xa hokorong minou li, e nixal rat holesok xil vus xa di kaon navan!’

³⁰“E moletin ak ien ti tavei vasa mesal mini. E ba sung, miso moletin ak be nim te xeih tangan iti en ituxoh melele xa ixal rat kaon nan xil vus. ³¹E melele xa moletin te polien sav xil lapus naha xa testal, xil lalonge misa pupu e ba labit mese ni mi suv toto nae.

³²“Di, suv toto mikes moletin ak bemei visali e misepin nggeih mini bit, ‘!Xouk xa obe moletin tei navan di opol misa xa misa! Melele xa otetak kes nou tangan ieok isae e xouk, ma natesil len kaon nam e natemaen xouk ba vem temase. ³³?Misak ni, veneh ma xouk iem tasae ti moletin te polien sav navan vaxoni ngan xa inou natepol ni minuk?’ ³⁴Suv toto ien mikat, ma misa rat moletin nan ak ba tangan ihur longpangasien ixo he moletin xil e nim te xeih ituxoh melele xa ixal rat kaon nan xil vus.

³⁵“E Tata navan xa de ut nesao mun ipol ni imak tang mi xamim vus xosxa munaketeh navos rilomun mi tua namim xil ti ixo tinemim tevi.”

Iesu Pispisi usil Sexien xa Moletin xa Miteli Nastokovein Atou Nan Ti

19 ¹Melele xa Iesu misepin usil rin xil ak bus, xi be reling provins tahal Kaleli del moletin nan xil. Ma xil labe rute tei xa mili Oeisal Sodan e provins tahal Sudea. ²Vanut moletin xil holu langgusili labe rute ak, e xi misak pilei xil vus.

³E melele nen ak, rut Farasi xil lamei visali tangan ti lisak pisi. Misak ni, lasisi labit, “Uhit pisi mi xamem. ?Rae nar xil di maen ni tangan moletin tei istokovein atou nan ve nenemien xil vus tang?”

⁴E Iesu bit rilomun ni mi xil bitene, “?Midep? ?Xamim mutavuli ti Vanuvei Eo na Hi? Vengan xi di biteni xa, tetiamu, e melele xa Hi tepol ni holesok xil e ut etan, *‘Hi pol ni moletin, tei be malohos, e tei mun be atou.’*” (Sen 1:27) ⁵E biteni mun bit, *‘Ve rin ak, tiramue imea reling tamen xal ninen, e ihisti itel atou nan, e tenbexalu mei ihe tei takes.’* (Sen 2:24) ⁶Misak ni xalu lutave lu ti mu, e mei lube tei takes. Ma naha xa Hi tehisten ni, moletin tovuol vaseti xalu mun.”

⁷E Farasi xil lasisi labitene, “Vahit vamak, ma veneh Mosis tesemaen xir tehiti, *‘Moletin xa bit vastokovein atou nan, isa Setifiket te Silaen mini. Ti, mikila istokovein ni sung.’* (Dut 24:1)”

⁸E Iesu bit rilomun ni bit, “Mosis temaen xamim tangan mustokovein atou namim xil vengan xa vatummim nggeih pupu. E sexien ak tovuol e melele xa Hi tepol kokot ni holesok xil. ⁹E nabiteni mi xamim xa xosxa moletin tei mistokovein atou nan e melele xa atou ak tapol ni ti vasa

v 19:1 Tumulen ak de Mak 10:1-12 mun

vatel tiramue sav, xi di pol ni neta xa misa pe met Hi. E xosxa, moletin ak mea e miteli rilomun del atou sav, pe met Hi, nggoni ngan xa xi di pol misa del atou ak.”

¹⁰Melele xa misepin mi xil bus, moletin nan xil mei labiteni mini labit, “Vahit vamak e tiramue del atou nan, ma bos mak mu tangan tiramue tei ita tasen tang e nateli ti.”

¹¹E Iesu bit rilomun ni mi xil bit, “Tave moletin xil vus ti xa lakila lavusil pispisien ak. E rut moletin ngan xil, Hi di misa xeihen mi xil tangan lihusili. ¹²Vengan rut moletin xil lasakras lateli vengan ut eo nae misa melele xa latepes xil. E ngan teisav xil lasakras lateli vengan xa moletin sav tepangei ut eo nae. E rute moletin sav xil mun lapol ni nenemien nae xa linateli ti tangan lipol mi Hi xa be Suv Toto nae. Ngan xil xa lakila lavusil sexien ak, ma bos tangan lihusili.”

Iesu Misa Tuxolxatien mi Horamue Xil

¹³“Di, moletin xil laleh tutut horamue nae xil lamei visal Iesu tangan xi valing hen e xil e vatuxol xat xil. E melele xa moletin nan xil lapus xil, labul xat xil.

¹⁴E Iesu misepin mi xil bit, “Mumaen tutut horamue xil ak lamei visal nou, e munasikoe xol xil ti. Vengan xa Hi be Suv Toto na hisit moletin xil xa langgoni xil tang.” ¹⁵Ma melele xa lamei visali, Iesu miling hen e xil e misa tuxolxatien mi xil. Di, Iesu e moletin nan xil labe reling rute ak.

Tiram Maxoe Tei Pusi xa Nggeih Pupu tangan Vastokovein Mani Nan tangan Vahusil Xat Iesu

¹⁶“Melele xa Iesu minggusil suse ba, moletin tei bemei visali e misisi bit, “Tisa, nipol ni naha xa bos tangan nikila nihur meulien sal?”

¹⁷Iesu bit rilomun ni mini bit, “?Veneh ma di osis nou usil naha xa bos? Hi kestang bos. E xosxa iem bei ovur meulien sal, ma uteong xat rae nan xil vus.”

¹⁸Di, moletin ak misisi bit, “?E rae xave vari e xil tangan nihusili? E Iesu bit rilomun ni mini bit,

“Munahas vin ti moletin.

Munakan ni atou mu tiramue na mosav ti.

Munakan ni ti neta na mosav xil.

Munaluvos ni his mosav xil ti.

¹⁹*Mumerere ni tamemim e ninemim xil.’ (Eks 20:12-16)*

E, ‘Iemim ihei moletin sav xil ixoni ngan taxa xamim vus di iemim bei xamim mun tang.’ (Lev 19:18)”

^w 19:13 Tumulen ak de Mak 10:13-16; e Luk 18:15-17 mun ^x 19:16 Tumulen ak de Mak 10:17-31; e Luk 18:18-30 mun

²⁰E tiram maxoe ak bit rilomun ni mi Iesu bit, “Inou di nanggusil xat rae xil vus ak. ?Naha mun iaxa natapol ni ti?”

²¹Ma Iesu biteni mini bit, “Xosxa xouk iem bei tangan mei omal tevi, ma ha upos ni holesok xil vus nam e usa mani nen mi ngan xil xa holesok nae tovuol. E xosxa upol ni imak, ma holesok nam xil e ut nesao ihe holu. Ti, utilomun e uhusil xat nou.”

²²E melele xa tiram maxoe ak milong sepinien nan, xi milonge misa e be relingi vengang xa holesok nan xil labe holu e en ti tave tangan vastokoveini.

²³Di, Iesu biteni mi moletin nan xil bit, “Reitin li nabiteni mi xamim, nggeih tova tang tangan moletin xa holesok nan holu vamaen Hi mei vahe Suv Toto e meulien nan. ²⁴?Munemi xa kamel tei xa be mahulong mikila vakital vaxo met nidil tei xa hokorong xa hokorong pupu? E-e, misakras. E moletin tei xa holesok nan xil holu, nggeih mak mu mili ngan ak tangan imaen Hi mei ihe Suv Toto e meulien nan.”

²⁵Melele xa moletin xil na Iesu lalonge mak, latemanin pupu e lasisi labit, “?Imak, ma Hi mikila vateh meulien na visi vari?”

²⁶Iesu miketeh kapis e xil e bitene, “!Iaxai vari! Moletin misakras vapol ni, e Hi kestang mikila ipol ni holesok xil vus.”

²⁷Di, Pita biteni mini bit, “?Opusi? Xamem mastokovein holesok xil vus namem tangan mavusiluk. ?Imak, ma Hi isa naha mi xamem?”

²⁸E Iesu biteni mi xil bitene, “Reitin li nabiteni mi xamim, e melele xa Hi ipol pilei ni holesok xil vus te ut etan mei ihe neta hu, inou, Nat Moletin, nitotan e von xeihen navan itel miehen. E melele nen ak, xamim kekes mun ti mutotan itel nou e von xeihen namim xa ihe lu e le tei (12). Ti, mulepis mol-Isrel xil vus xa langgo vatimol lu e le tei (12) xa mahulong nae. ²⁹E moletin xil vus xa di lastokovein tim sae, mu tua nae xil, mu hinexil, mu tamexil, mu ninexil, mu horamue nae xil, mu naho sae xil venou, ma Hi isa rilomun ni mi xil huite teni xa ihe handred tei (100) ili ngan xa latestokovein ni. E xil lihur meulien sal mun. ³⁰E moletin holu xa labe eilep xil xosali ak, xil mei lihe neta sav tang. E holu xa labe movotei xil xosali, xil mei lihe eilep xil sung.

Iesu Dei Vole usil Midep Moletin te Polien Xil Vus na Hortan Tei, Lapin Tang Pe Meten

20 ¹Melele xa Iesu di misepin del moletin nan xil, xi dei vole ak mi xil bit, “Suse xa Hi mei ihe Suv Toto e meulien na moletin xil ixoni hortan tei xa ba makoe roroh tamu tangan valeh viton moletin te polien xil tangan mei lapol e urvatiei san. ²Melele xa ba misepin mi xil, xil lamaen ni tangan lipol mini ve mani tei xa imal ni ve melengien tei. Di, misil xil laba tangan lava lapol e urvatiei san.

³“Melele xa meteneai bemei nesao vuteili, hortan ak dilomun ba, e pus moletin sav xil xa dit laborang votei tang e von posen, e latapol ni ti neta. ⁴Ma xi biteni mi xil bit, ‘Ei, xamim mun ha mupol

e urvatiei savan, e nixal xamim ni naha xa imal.’ ⁵Ma xil mun laba lapol.

“E piniai, xi dilomun ba, e pol ni nggoni ngan taxa tepol ni ngamu. Di, ba pol ni mun e melele xa meteneai da be tan vuteili. ⁶E melele xa meteneai ba sangas tangan vanu, xi dilomun ba e pus rut moletin xil mun dit lasoh votei tang. Ma xi misis xil bit, ‘?Veneh ma di musoh votei mak, e mutapol ni ti neta e makoe mei duxoh mahis xiak?’

⁷“Ma xil labit rilomun ni mini labit, ‘Vengan moletin ti tamei tangan valeh xamem mava mapol mini.’

“Ma hortan ak biteni mi xil bit, ‘Xamim mun muha mupol e urvatiei savan.’

⁸“Melele xa meteneai ba minu, hortan te urvatiei ak ba biteni mi vat na moletin te polien xil bit, ‘Ukes viton moletin xil te polien limei, e usa huit polien nae mi xil. Itiamu, usa ni mi ngan xil xa lamei dutou iha vuma ituxoh ngan xil xa latemei tetiamu.’

⁹“Ma, ngan xil xa lamei e melele xa meteneai ba sangas tangan vanu, vat te polien misa huit polien nae momal ni ngan te melengien tevi tei. ¹⁰Misak ni, melele xa ngan xil xa latemei tetiamu lapusi mak, xil lanemi labit xil lihuri ihe eilep mu. E melele xa lamei, xil mun langgur huit polien nae momal ni ngan te melengien tevi tei tang. ¹¹E melele xa langguri, xil laseputut ba xat hortan ak ¹²labit, ‘Ngan xil xa lamei dutou tang, e melele xa meteneai ba sangas tangan vanu, xil lapol haoa tei takes, e onggal xil nggoni xamem tang xa makon ni polien, mapo vetin, e eai ngga pangas tenbemem.’

¹³“E hortan ak bit rilomun ni mi xil bit, ‘Tua navan xil, inou natapol ti vasa mi xamim. Xamim mumaen ni tangan mupol minou ve huit polien xa momal te melengien tevi tei. ¹⁴Ma muleh mani namim muha. Inou ieok bei tangan nixal ngan xil xa latemei tetutou ipin ni ngan taxa xamim mungguri. ¹⁵Ngan ak be mani navan, e nikila nipol ni ixoni ngan xa ieok bei ni. ?Mu midep? ?Xamim di munem misa ni xil vengan di nasa tutouen mi xil?’

¹⁶“Ma, usil sexien xil ak vari, moletin holu xa labe movotei xil tang xosali ak, xil mei lihe eilep xil. E holu e ngan xil xa labe eilep xil xosali ak, xil mei lihe neta sav tang.”

Iesu Misep usil Maten a Mea Rilomunen Nan Vatei Mun

¹⁷“Melele xa Iesu di mikakao ba tangan vahe Serusalem, xi mileh moletin nan xil xa labe lu e le tei (12) ba laka se xil vuteili e biteni mi xil bit, ¹⁸“?Mupusi? Taxeak di raba ve Serusalem xiak. E rute ak, xil limaen

y **20:17** Tumulen ak de Mak 10:32-34; e Luk 18:31-34 mun

nou, Nat Moletin, ha nihe he vat xil na pris xil e tisa xil te Rae na Mosis. Ivus ti, xil lihur nou nihe kot e limaen rat meulien navan tangan ha nimat. ¹⁹Ti, lisa rat nou ha nihe he moletin xil xa latave Siu ti, e xil lipol pepamen ni nou, limeas pangas nou ni ao te xeih xil xa sanute di en, e liti xat nou e eivave. E melele xa melengien tol mei itavi, inou nimea rilomun ra maten.”

Iesu Pispisi usil Sexien te Tutouen na Moletin Nan Xil

²⁰Di, nine Temes xal Sion, nat Sepeti xalu, del xalu latomei tangan latopus Iesu. Xi mitingeiril pe meten tangan vasis neta ngan mini.

²¹Iesu misisi bit, “?Atou li, iem bei neh?”

Ma xi bit rilomun ni mini bit, “Teok bei li tangan umaen horamue navan xalu ak ha lalitotan sangas visaluk e melele xa mei uhe suv toto. Tei ite rim metu, e tei ite rim meil.”

²²Ma Iesu biles miketeh pus natneli xalu e misis xalu bit, “Xamil mutakil ti naha xa di musis nou ni. ?Midep? ?Xamil mukila tamak mulihur sakpisien xil e longpangasien xil ixoni ngan taxa inou ha nihuri?”

E lubit rilomun ni mini lubit, “!Io, makila!”

²³Di, Iesu biteni mi xalu bit, “Reitin, xamil mulihur longpangasien ixoni ngan xa inou nihuri. E tave ti neta xa imak, nave nou ti iaxa nihosei visi tangan mei itotan e riuk metu mu e riuk meil. Vontoen xalu ak xa tellep xiak be na ngan xalu xa Tata navan bosei xalu ngamu tangan lalihuri.”

²⁴E melele xa moletin sav xil na Iesu xa labe he xalu (10) lalongeong usili, iexil nggat xalu. ²⁵Ma Iesu mikes viton xil vus lamei visali e biteni mi xil bit, “Mukila xa vat na moletin xil xa latave Siu ti iexil bei mak mu tangan lisak ni moletin nae xil lipus kila xa xil mak mu labe tellep lali xil. E suv nae xil mun di lapol ni nggeih mi ngan xil xa ladi pe he xil. ²⁶E xamim, sexien namim namak ti. Xosxa tei e xamim ihit mei ihe eilep mak mu ili xamim, xi mei ipol mi xamim ixoni moletin te polien tei namim. ²⁷E xosxa tei e xamim ien bei tangan vatiamu ni xamim, xi mei ihe moletin te tutouen namim ixoni slev tei. ²⁸Vengan inou mun xa nabe Nat Moletin, natamei ti tangan moletin xil ti latutou ni nou. !E-e! Inou namei tangan nitutou ni mosav xil e nisa meulien navan tangan nixal rat moletin xil holu mei limeluv ra xeihen te tesaen.”

Iesu Pol ni Moletin Lu xa Metealu Bar Mei Luketeh Rilomun

²⁹Iesu del moletin nan xil ba laka pas taon tahal Seriko. E melele xa di laba, vanut moletin tei xa eilep di langgusili. ³⁰E rute ak, moletin lu xa metealu bar

^z 20:20 Tumulen ak de Mak 10:35-45 mun ^a 20:29 Tumulen ak de Mak 10:46-52; e Luk 18:35-43 mun

ludotan ludi seri suse e lulonge xa Iesu mikakao mei mitavi ba. Ma xalu lukei ba ni lubit, “!Suv! !Xouk xa ostal onngo vatimol na suv toto Deved! !Iem isae li e xamel!”

³¹E vanut moletin xil ak labul xat xalu tangan lalotit votei. E tave ti neta xa mak, xalu lukei nggeih pilei sung lubit, “!Suv! !Xouk xa ostal onngo vatimol na suv toto Deved! !Iem isae li e xamel!”

³²Melele xa Iesu milonge, misoh e mikes xalu tangan lalomei visali. Di, misis xalu bit, “?Iemil bei tangan napol ni naha mi xamil?”

³³Ma xalu lubit rilomun ni mini lubit, “Suv li, iemel bei tangan upol ni metemel ihos rilomun.”

³⁴E melele xa Iesu pus xalu, ien polu ni esaeen ve xalu. Ma misasa duxoh meteau, e vatei takes, xalu vus luketeh rilomun e lunggusil Iesu luba.

Iesu Ba Mistal e Serusalem e Moletin Xil Lasa Merereen Mini

21 ^{1b}Melele xa Iesu del moletin nan xil lamei sangas ni Serusalem, xil mei lastal e metimal tahal Betfas xa de sangas ni Vathu te Urvatiei te Olip. E rute ak, Iesu misil moletin nan lu ²del sepinien ak bit, “Mulihe metimal xa da iaxor. E melele xa ha mulistal mulikamet dongki tei xa labar xati del tuten. Mullal rat xalu e mulitel xalu lalimei visal nou. ³E xosxa moletin tei isak pisi tangan vasikoe xol xamil, mulihiteni mini mulihit, ‘Suv iaxa ien bei xalu,’ ma vatei takes, xi imaen xalu mi xamil.”

⁴Ngan ak testal tangan vasak ni naha xa Hi tehiteni texo provet nan mei ihe reitin xa bit,

⁵ “*Uhiteni mi moletin xil xa ladi taon tahal Serusalem uhit,*

!Mupus ti! Suv toto namim bemei tangan valaxat xamim.

Xi be hanmerou tang e di miloh nggo dongki tei tang di bemei.

Reitin, xi dotan de sulut dongki tei tang e di bemei.’ ” (Sak 9:9)

⁶Ma moletin na Iesu xalu ak luba e lupol ni nggoni ngan xa xi tehiteni mi xalu. ⁷Xalu ludel dongki ak del tuten latomei. Di, luden kot nalu da xol tei xalu e Iesu dotan en. ⁸Vanut moletin xil xa mahulong mei lasak mesen suse tangan Iesu mei iloh ixo en. Laden kot nae xil e suse nan, e rute ngan xil ladei anguit liei xil xa ute di en e laling pilei di suse. ⁹Holu e vanut moletin xil ak xa di ladiamu ni Iesu del ngan xil xa di langgusili ladutou ni di lakei nggeih labit,

“!Ripet rat xi xa mistal nggo vatimol na suv toto Deved!

!Tuxolxatien iti mi ngan xa di bemei e his Iahova! (Sam 118:26)

!Ripet rat his Hi xa de ut nesao!”

¹⁰E melele xa Iesu ba duxoh Serusalem, longongen usili ba mikapis e ut xil vus e taon, e mol-Serusalem xil latemanin e di latumul usili labit, “?Visi iaxa bemei xiak?”

^b 21:1 Tumulen ak de Mak 11:1-11; Luk 19:28-40; e Sion 12:12-19 mun

¹¹E vanut moletin xil labit rilomun ni labit, “Ngan ak be Iesu, provet tei tahal Nasaret xa de provins tahal Kaleli.”

Iesu Minggol Rerat Moletin Holu ra Nim Eo xa Latnamerere ni Hi Ti

¹²^cMelele xa laduxoh Serusalem, Iesu be vangit vioh te Nim Eo na Hi. Melele xa pusi xa moletin xil di lapos ni holesok xil holu en, ien mikat e nggol rerat xil. Xi midivin rerat tep na ngan xil xa di laso papas mani e von totanen na ngan xil xa di lapos ni mae xil te sanien eo na Hi. ¹³E melele xa di pol ni mak, xi bul xat xil bit, “E Vanuvei na Hi, latetisi latehit, ‘*Lakes Nim mavan ni Nim te Sisen.*’ (Aes 56:7) E xamim mupol ni sung mei be ‘*Nim ma Vati Kanen Xil.*’ ” (Ser 7:11)

¹⁴E melele xa Iesu da tamu e vangit vioh te Nim Eo, moletin xil xa metexil bar del ngan xil xa lasakras lakakao lamei visali, e xi pol ni xil mei labos rilomun.

¹⁵E melele nen mun tak, tutut horamue xil di lakekei e vangit vioh te Nim Eo labit, “!Ripet rat xi xa mistal onngo vatimol na suv toto Deved!”

E melele xa vat xil na pris xil del tisa xil te Rae na Mosis lapus merekel xil e holesok sav xil xa tellep xa Iesu di pol ni e lalong naha xa horamue xil di lakekei ni, iexil mikat xa mikat. ¹⁶Ma lasis Iesu labit, “?Di olong naha xa tutut horamue xil di lakekei ni iaxai?”

E Iesu bit rilomun ni mi xil bit, “Io, nalonge. ?E midep? Xamim di mutavuli ti e Vanuvei Eo na Hi? Vengan misepin ni bit,

*‘Hi, xouk osak mesen suse tangan uteong ni memesien xil xa ihat visaluk,
ixo tutut horamue xil e tuvava xil mun.’ (Sam 8:2)*

¹⁷Di, Iesu mistokovein xil e be reling taon tahal Serusalem. Xi be taon tahal Betani del moletin nan xil, e ba lapat en.

Iesu Misa Halesil Tei Ba Xat Vatit Fik Tei

¹⁸^dE makoe roroh, melele xa Iesu di mikakao tangan vatilomun vahe Serusalem, mae nggati e suse. ¹⁹Ma miketeh e pus vatit fik tei xa dat seri suse. E melele xa be sangas visali, xi mikameti xa huite tovuol, e be ute xil tang. Misak ni, Iesu biteni mi vatit fik ak bit, “!Onatakao ti mun!” Vatei takes, ut fik xil ak mei meles e vatite mingguxu.

²⁰Melele xa moletin nan xil lapusi, latemanin e lasisi labit, “?Vatit fik ak mei meles e mingguxu vari nga tang midep?”

^c 21:12 Tumulen ak de Mak 11:15-19; Luk 19:45-48; e Sion 2:13-22 mun ^d 21:18 Tumulen ak de Mak 11:12-14,20-24 mun

²¹E Iesu bit rilomun ni mi xil bit, “Reitin li nabiteni mi xamim, xosxa neketen namim di e mutanem male ni ti naha xa di musisi, xamim mun mukila mupol ni naha xa inou napol ni mi vatit fik ak. E tave ngan ak ti kestang, mukila mun musemae ni vathu ak muhit, ‘Umea uhe reling voninom e uha uso xouk uhe tas,’ ma istal ihe reitin. ²²Xosxa uke reitin xa neta tei mei istal, neta xil vus xa usis Hi ven imei istal ihe reitin.”

Vat Xil na Mol-Siu Xil Lasis Iesu xa Xi di Pol ni Holesok xil e His Visi

²³‘Melele xa laduxoh Serusalem, Iesu be vangit vioh te Nim Eo. E melele xa di mipispisi mi moletin xil, vat xil na pris xil del elda xil na Siu xil lamei visali e lasisi labit, “?Xouk di opol ni holesok xil ak e his visi? ?Visi vari maen xouk tangan opol ni?”

²⁴Ma Iesu bit rilomun ni mi xil bit, “Inou mun nisis xamim ni neta tei. Xosxa muhit rilomun ni minou, ma inou mun nihiteni mi xamim xa di napol ni holesok xil ak e his visi. ²⁵?Muhit pisi minou, Sion tebaptaes ni moletin xil e di tepol e his visi? ?Hi mu moletin tova tang?”

Xil ba, di lasopin ni mikapis e xil mun tang labit, “?Rihit naha? Xosxa rihiteni rihit, ‘Sion di tepol e his Hi,’ ma xi ihiteni mi xir ihit, ‘?Xosxa temak, veneh ma mutnake reitin ti e sepinien nan?’ ²⁶E xosxa rihiteni rihit, ‘xi di tepol e his moletin tang,’ ulixir mikan ni vanut moletin xil xa eilep xiak vengan xa xil vus lanemi labit Sion Baptaes tehe provet tei na Hi.” ²⁷Ma xil labit rilomun ni mi Iesu labit, “Xamem matakil ti xa xi di tepol e his visi.”

Ma Iesu biteni mi xil bit, “Xosxa imak, ma inou mun ninaviteni ti xa inou di napol ni holesok xil ak e his visi.”

Iesu Dei Vole Tei usil Longxatien na Horamue Lu

²⁸Di, Iesu dei vole ak mi vat xil na Siu xil bitene, “?Xamim munemi midep? Moletin tei, natneli lube lu. Vatei, moletin ak ba pus ngan xa be muimol e biteni mini bit, ‘Natuxoli, xosali, ha upol e urvatiei saratel.’

²⁹“E horamue ak bit rilomun ni mini bit, ‘teok ti tavei nama.’ E dutou ni, xi biles nenemien nan a ba pol.

³⁰“Di, tamealu ba pus ngan xa dutou e bit sepinien xati xa tehiteni tetiamu mi muimol nan. Ma horamue ak bit rilomun ni mi tamen bit, ‘Bos ngamu tata, niha.’ E xi tava ti.

³¹“?Visi e xalu iaxa pol ni naha xa tamealu ien bei?”

E xil labit, “Ngan xa diamu.”

Ma Iesu biteni mi xil bit, “Reitin nabiteni mi xamim xa ngan xil xa di laleh viton mani te takis e hoeaso xil, Hi mei ihe Suv Toto e meulien nae itiamu ni xamim. ³²Vengan Sion temei vapisen suse xa momal pe met

Hi mi xamim tangan ti muvusili. E xamim mutake reitin ti e sepinien nan. E ngan xil xa laleh mani te takis e hoeaso xil lalonge e lake reitin e sepinien nan. E tave ti neta xa mupus holesok xil xa lapol ni, mutaviles ti ra tesaen namim e mutake reitin ti e sepinien nan.”

Iesu Dei Vole usil Longxatien na Moletin Xil xa Di Lalaxat Urvatiei Tei

³³Di, Iesu dei vole tei mun mi vat xil na Siu xil bit, “Vatei, hortan tei milih urvatiei te grep tei san. Xi pol ni viov mikapis xole, e minggil vul tei da en xa ti lipel kikis huit grep xil en tangan lihur rat sute teni. Di, mikili ni vet tei xa be nesao tangan ti liketeh xole en. Melele xa pol vuol ni holesok xil ak, xi maen moletin sav xil tangan mei lilaxati. E xil labit xati mini xa lisa ti huit grep mini melele xa limen. Di, hortan ak mikakao ba de kantri sav tei.

³⁴“Melengien hao mei mitavi, huit grep xil ak mei men. Ma hortan ak misil rut slev nan xil tangan ha lisis ngan xil xa di lalaxat urvatiei te grep san e lisa ti huite san xil mini. ³⁵E melele xa laduxoh urvatiei ak, moletin xil xa di lalaxati ladal xat slev nan xil ak: labas purun tei; tei mun, lamu vini; e tei mun xatel, langgove. ³⁶Di, hortan ak misil rut slev xil mun xa lali ngan xil xa tesil xil tetiamu. E moletin xil xa lalaxat urvatiei ak lapol ni mi xil nggoni ngan taxa latepol ni tetiamu. ³⁷Ma di, hortan ak misil natneli xati be visal xil vengan minemi bit, ‘Xil limerere ni natuxoli xati.’

³⁸“E melele xa ngan xil xa di lalaxat urvatiei ak lapus natneli bemei, labiteni mi xil mun tang labit, ‘!Ei, nat hortan xati iaxa di bemei iaxor! Xi vari ihur urvatiei ak melele xa tata nan imat. !Mumei, rava ravas vini! !Imak, ma holesok nan xil mei ihe nar sung!’ ³⁹Ma xil laba, ladal xati, lakuvun rati ra urvatiei ak, e labasi mat.”

⁴⁰Di, Iesu misis vat xil na Siu xil xa di lateong ni vole ak bit, “?Ma midep? ?Melele xa hortan te urvatiei itilomun imei, ma ipol ni naha mi moletin xil ak?”

⁴¹Ma xil labit rilomun ni mini labit, “Xi isa rilomun ni maten xa isa pupu mi moletin tesa xil ak. Ti, imaen urvatiei san mi moletin sav xil xa lisa ti huit grep xil mini e melele xa limen kuhi.”

⁴²Di, Iesu biteni mi xil bitene, “?Midep? ?Xamim di mutavuli ti Vanuvei Eo? Vengan xi biteni bit,

‘Pos xa moletin te polien xil di lasin ni,

xi vari iaxa mei be setoman xati te nim e mili sen pos nen xil vus.

Ngan ak, Hi vari pol ni,

e rapusi xa naha xa xi tepol ni bos pupu!’ (Sam 118:22-23)

⁴³“Ma, nabiteni mi xamim, hosien na Hi xa be Suv Toto xa di e xamim taxeak, Hi ileh rerati reling xamim Siu xil. E isa ni sung mi moletin xil te kantri sav xil xa likila lilong xat raen e lipisen huit hosien teni e meulien

^f 21:33 Tumulen ak de Mak 12:1-12; e Luk 20:9-19 mun

nae. ⁴⁴Ngan xil xa lasin seteman ak, xosxa tei e xil imot ita xati, sin xil imavul ivus. E xosxa seteman ak imot ita xat tei e xil, ita xat kikisi.”^g

⁴⁵Melele xa vat xil na pris xil del Farasi xil lalong vole xil xa Iesu dei, lakila sung xa di misep usil xil. ⁴⁶Ma di lalang ni suse tangan lital xati. E ulixil mikan ni vanut moletin xil xa eilep xiak xa di lanemi labit Iesu be provet tei.

Iesu Dei Vole Tei usil Suv Toto Tei xa Misilasil ni Moletin

Xil tangan Lave Anien te Tetelien Tei na Natneli

22 ¹Melele xa Iesu da tamu e vangit vloh te Nim Eo, xi dei vole ak mun mi moletin xil bit, ²“Hi xa be Suv Toto e meulien na moletin nan xil nggoni suv toto tei xa, vatei, misak mesen anien te tetelien tei na natneli. ³Xi misil slev nan xil laba tangan lakes ngan xil xa suv toto ak tesilasil ve xil ngamu tangan limei e anien ak. E moletin xil ak labit linamei ti.

⁴“Ma suv toto ak misil slev sav nan xil e biteni mi xil bit, ‘Ha muhiteni mi ngan xil xa natesilasil ve xil muhit, “!Mumei! Inou nasak mesen anien xil holu ngamu. Labas buluk savan xil e sulut buluk xil mun xa lakaio kuhi be te anien ak. Reitin, holesok xil vus te anien te tetelien ak mese tuei di. Ma mutemanon mumei.”’

⁵“E moletin xil ak lanem male ni raen tang, e laba sung di lapol ni polien nae xil. Tei be naho nan, e tei mun ba pol e stoa nan. ⁶E moletin teisav xil ladal xat slev nan xil ak, labas purun xil e lamu vin xil. ⁷E melele xa suv toto ak milongeong usili, ien mikat xa mikat. Misak ni, misil moletin te vaeen nan xil laba lamu vuol ni ngan xil xa latehas vin slev nan xil, e ladin taon nae.

⁸“Di, suv toto ak biteni mi slev sav nan xil bit, ‘Anien te tetelien meses tuei di. E ngan xil xa natesilasil ve xil, meulien nae tapin ti tangan lamei lava ni. ⁹Ma ha muhe suse xil te taon e musilasil ni moletin xil vus xa mukamet xil tangan mei lia anien te tetelien ak.’ ¹⁰Misak ni xil labe suse xil e lakes viton moletin xil vus xa lakamet xil, ngan xil xa labos e ngan xil xa lasa. E nim xa anien te tetelien da en polu kuhi ni moletin xil.

¹¹“Ngan xil xa lamei e tetelien ak, lasing kuhi ni eising xil te tetelien. E melele xa suv toto bemei tangan vapus ti ngan xil xa lamei, xi miketeh e mikamet moletin tei xa tasing ni ti eising te tetelien. ¹²Ma suv toto ak be visali e misisi bit, ‘?Tuxoli, omei e nim ak midep vari xa otasing ni ti eising te tetelien?’ E moletin ak dat votei, e takil ti naha xa ihiteni.

¹³“Misak ni, suv toto biles e misemaen ni moletin te polien nan xil bit, ‘Muvar viton hen e len xil, e mukuvun rati ihe hale e ha ita nga e

^g 21:44 Dan 2:44-45; Aes 8:14 ^h 22:1 Tumulen ak de Luk 14:15-24 mun

ut te maluxoluk. E rute ak moletin xil ti limuis e ti lingas luhe xil ve longpangasien nae xil.’ ”

¹⁴Di, Iesu misep kor usil vole ak bit, “Reitin, Hi misilasil ve moletin xil holu tangan lamei visali, e xil vahis tang iaxa bosei xil tangan liti visali.”

Farasi Xil Lasis Iesu usil Rin te Takis

¹⁵ⁱMelele xa Farasi xil lalong vole xil xa Iesu di biteni ba xat xil, xil laba di lalang ni mesal tova xa likila lital xati ixo en ve sepinien nan. ¹⁶Misak ni, lasil rut moletin nae xil del rut Siu sav xil mun xa ladi rin na suv toto Herod Antipas laba. Xil labe visal Iesu e labiteni mini labit, “Tisa, xamem makila xa xouk obe hisit moletin tei xa moletin sav xil lakila liling nenesien nae iti en. E makila mun xa xouk di opisipisi mi moletin xil ni suse te reitinen xa Hi ien bei tangan moletin nan xil lihusili. Xouk di osepini mi moletin xil vus nggoni ngan xa xil vus lapin tang, tave ti neta xa labe eilep xil mu movotei xil tang. ¹⁷Ma, usa ti nenemien nam mi xamem usil rin ak. ?Rae na Mosis maen ni tangan Siu xil ti lixal takis iha mi suv toto tahal Rom, mu tamaen ni ti?”

¹⁸E Iesu pus kil nenemien tesa nae e bit rilomun ni mi xil bit, “!Xamim mubos nggo hilibemim tang! ?Veneh ma di musak pis nou? ¹⁹Musa mani tova xa di langgal takis ni.” Melele xa lasa ni mini ²⁰xi misis xil bit, “?Valnao visi vari iaxa da en? ?E his visi iaxa de mani ak?”^j

²¹Xil labit rilomun ni mini labit, “Neta xalu vus xa ladi en be na suv toto tahal Rom.”

Ma Iesu biteni mi xil bit, “Xosxa mak, ma momal tang tangan musa naha xa be na suv toto tahal Rom mini, e naha xa be na Hi, musa ni mini.”

²²E melele xa lalong sepinien nan, latemanin pupu ni. Ma, labe relingi e laba.

Satusi Xil Lasis Iesu usil Melele xa Moletin Xil Limea Rilomun ra Maten

²³^kE melengien xati nen tak, Satusi xil xa labit moletin misakras vamea rilomun ra maten labe visal Iesu, e lasisi labit, ²⁴“Tisa, Mosis tetisi tehit xosxa moletin tei imat reling atou nan e tuvava nalu tovuol, ma tuneli sung iteli itel tunau ak. Imak, ma melele lalihur horamue tei nalu, lipusi ixoni ngan xa be nat tiramue xa mat.^l ²⁵Tetiamu, tua tatei xil latehe lu e he sav (7) lateti vis xamem. Ngan xa tehe muimol teteli tetel atou tei. Di, xi mat e tuvava nalu tehe tovuol. Misak ni, tuneli mei tehur tunau

ⁱ 22:15 Tumulen ak de Mak 12:13-17; e Luk 20:20-26 mun ^j 22:20 Mani ak, valnao suv toto tahal Rom iaxa da en e ladis en labit, ‘Ngan ak be nat Ogastas xa be Hi.’

^k 22:23 Tumulen ak de Mak 12:18-27; e Luk 20:27-40 mun ^l 22:24 Dut 25:5-6

nan. ²⁶Di, sexien nen tak testal mun mi tuneli xa tetutou ni. Ma di, testal mun mi ngan xa tehe tol nen e dit ba mak tang ba vuma ... duxoh ngan xa tehe tasite e tua xil ak. ²⁷E dutou ni holesok xil ak, atou ak mun mat. ²⁸?Misak ni, melele xa moletin xil vus limea rilomun ra maten, ngan xave e tua xil xa labe lu e he sav (7) xiak iaxa ihur atou ak ihe nan xati vengan xil vus lateteli tetela?”

²⁹Iesu bit rilomun ni mi xil bit, “Xamim di mule ras suse namim vengan xa mutakil kuh ti Vanuvei Eo na Hi mu xeihe nan. ³⁰Vengan e melele xa moletin xil limea rilomun ra maten, xil mei lixoni masxaxa xil xa ladi ut nesao, e sexien te tetelien ihe tovuol mun. ³¹?E veneh ma mutake reitin ti xa moletin xil likila limeul rilomun ra maten? ?Mutavuli ti mu naha xa Hi tesepepin ni mi xamim? Vengan xi tehit, ³²*‘Inou nabe Hi na Ebrahim, Hi na Aesak, e Hi na Siekop.’* (Eks 3:6) ?Mulonge? Xi **be** Hi na ngan xil xa lameul tamu ladi, e tave na ngan xil ti xa latovuol tuei.”^m

³³E melele xa vanut moletin xil xa eilep xiak lalong pispisien nan xil, xil latemanin ni.

Iesu Pispisi usil Rae Xave Iaxa Be Eilep Mak Mu Mili Sen Rae Sav Xil

³⁴Melele xa Farasi xil lalongeong ni xa Iesu bas vin upang na Satusi xil, xil mei labe vituei e laba lapus Iesu. ³⁵Tei e xil xa be tisa tei te Rae na Mosis bemei tengan vasak pis Iesu ni sepinien nan xil. ³⁶Misak ni, xi misisi bit, “?Tisa, rae xave vari iaxa be eilep mak mu mili sen rae xil vus?”

³⁷E Iesu bit rilomun ni mini bit, “*Iemim ihei Iahova xa be Hi namim ixo tinemim tevi, ixo meulien tevi namim, e ixo nenemien tevi namim.*’ (Dut 6:5) ³⁸Rae ak iaxa be eilep mak mu mili sen rae sav xil. ³⁹E tei mun xa nggoni tang e be lu nen di biteni bit, *‘Eheien namim iti e moletin sav xil ixoni ngan taxa eheien namim di e xamim mun tang.’* (Lev 19:18) ⁴⁰Holesok xil vus xa di e Rae xil na Mosis e Tisen xil na provet xil tetiamu di ngamu e rae xalu ak.”

Iesu Misep usil Kristo xa Hi Tehosei

⁴¹°E melele xa Farasi xil ladi vituei tamu dela, Iesu misis xil sung bit, ⁴²“?Xamim munemi midep usil Kristo? ?Xi istal ixo vatimol na visi?”

E xil labit rilomun ni mini labit, “Xi istal ixo vatimol na suv toto Deved tetiamu.”

^m **22:32** Neta sav xa Ebrahim, Aesak e Siekop lattemat nousav ngamu e melele xa Hi di tehiteni sepinien ak mi Mosis, Hi tehiteni xa xi be Hi natel. Xi tenaviteni ti xa tehe Hi natel. Ma Iesu bit ngan ak pisen ni xa di latomeul tamu latodi. ⁿ **22:34** Tumulen ak de Mak 12:28-34; e Luk 10:25-28 mun ^o **22:41** Tumulen ak de Mak 12:35-37; e Luk 20:41-44 mun

⁴³Ma Iesu biteni mi xil bit, “?Xosxa ngan ak be reitin, veneh ma Ninin na Hi tesa nenemien mi Deved tangan ikes Kristo ak ni ‘Suv’? Vengan xi biteni bit,

⁴⁴*Tahova biteni mi Suv navan bit,*

“Utotan inggak e riuk metu,

ituxoh melele xa niling elu nam xil e hem.”’ (Sam 110:1)

⁴⁵“Suv toto Deved vari tekes Kristo ni ‘Suv nan’. ?E vengon xa tata tei misakras vakes natneli ni ‘suv’, Kristo istal ixo vatimol na Deved itep?”^p

⁴⁶E moletin xil lasakras lasa rilomun ni sepinien nan. Ma e melele nen ak ba, moletin xil ulixil mikan tangan lasis ti mun neta mini.

Iesu Misel Xat Tisa Xil te Rae Xil na Mosis del Farasi Xil

23 ¹Melele xa Iesu da tamu e vangit vloh te Nim Eo na Hi, misepin mi vanut moletin xil del moletin nan xil mun bit, ²“Tisa xil te Rae xil na Mosis del Farasi xil ladi tangan laxoles Mosis e lavit kil rae xil na Hi mi moletin xil. ³Ma bos xa xamim mulong xat xil e muhusil holesok xil vus xa di labiteni mi xamim tangan mupol ni. E xamim, munapol ni ti sexien xil naxoni ngan xa xil di lapol ni, vengon xil latahusil kuh ti pispisien xil xa di lapispisi ni mi mosav xil. ⁴Xil di laling rae xil hao xa meas da xat mar moletin xil. E xil, iexil ti tavei tangan lasa hexil vatutou ni xil tangan lapoe.

⁵“Ngan xil ak, holesok xil vus xa di lapol ni, lapol ni tangan taxa moletin xil ti lapusi e ti lasa merereen mi xil ven. Xosxa mosav xil di labar xat tutut bokis tei di he xa sepinien na Hi da en, ma xil sung lapol ni nae eilep mak mu mili.’ Xosxa mosav xil di laling ao xil xa tepepiei di murur e kusut eising nae, xil sung di lapol ni ao nae xil latepiei pilei mu mili.’ ⁶E anien xil xa tellep, e nim te pispisien xil mun, xil di lalepis vontoen xil xa bos xa be na ngan xil kestang xa lapo his xil xa latellep. ⁷E von posen xil mun, xil iexil bei pupu tangan moletin xil lisemin xil itel merereen e likes xil ni ‘tisa’.

⁸“E xamim, linakes xamim ni tisa xil ti vengon tisa namim tei takes, e xamim vus mube tua xil tang. ⁹E munakes ti moletin e ut etan ak ni ‘tata’

p 22:45 Reitin xa Kristo ixo vatimol na suv toto Deved, e vengon xa xi ikes Kristo ni suv, di pisen ni xa Kristo ihe eilep mak mu mili, e xos, Kristo ak teta tetiamu ni. **q 23:1** Tumulen ak de Mak 12:38-39; Luk 11:43,46; e 20:45-46 mun **r 23:5** Siu xil vus xa labe malahos di laling sepinien hat (4) xa nggo Vanuvei Eo na Hi di e vangit bokis tei xa hokorong: Eks 13:1-10; 13:11-16; Dut 6:4-9; 11:13-21. Di, labare di vatixil mu hexil melele xa laba tangan lasis. Ngan ak nggusil rae tei na Mosis xa de Dut 6:8. **s 23:5** Siu xil vus xa labe malahos di laso rin ni ao xil xa tepepiei e di lalingi murur e kusut eising nae tangan isak ni xil linem xati xa di langgusil xat Hi kestang ixoni ngan xa rae na Mosis xa de Nam 15:37-41 di misep usili.

vengan Tata namim tei takes tang, ngan xa de ut nesao. ¹⁰E linakes ti mun xamim ni ‘suv’ vengang suv namim tei takes, xi be Kristo. ¹¹Ngan xa di misa tutouen mi xamim nggoni slev namim, xi iaxa mei ihe eilep mak mu ni xamim. ¹²Vengang ngan xil xa di lapol ni nenemien nae be nesao, Hi ipol ni xil lihe tan. E ngan xil xa di lapol ni nenemien nae be tan, Hi ipet rat his xil ihe nesao.

¹³“!Isa pupu mi xamim, tisa xil te Rae xil na Mosis del Farasi xil xa di munggul Hi nggo hilibemim tang! Hi isa pangasien mi xamim vengang xamim iemim ti tavei tengang mupol ni Hi mei vahe Suv Toto e meulien namim. E melele xa mosav xil iexil bei tengang Hi mei vahe Suv Toto nae, xamim di musikoe xol xil. ¹⁴’

¹⁵“!Isa pupu mi xamim, tisa xil te Rae xil na Mosis del Farasi xil xa di munggul Hi nggo hilibemim tang! Hi isa pangasien mi xamim vengang di munggul xoteh tas e tan tengang taxa mukamet moletin ngan e muviles nenemien nan tengang vahusil xamim. E melele xa biles e nggul pispisien xil namim, xamim mupol ni mei misa pilei sung mili xamim. E momal tang tengang xi mun ihur pangasien itel xamim e Upang xa misakras vamat.

¹⁶“!Isa pupu mi xamim xa di musak tengang ti mutiamu ni moletin xil, tave ti neta xa metemim xil bar! Pangasien xa muhuri ihe eilep pupu vengang di mupispisi mi moletin xil mubit, ‘Xosxa moletin tei pol ni hitxatien tei nan e his Nim Eo, hitxatien nan be neta sav tang. E xosxa xi pol ni hitxatien nen e his gol xa di Nim Eo, ma ihur xat hitxatien ak ixeh.’ ¹⁷!Metemim bar e mutalang tova tang! ?Ngan xave be eilep mak mu, gol te Nim Eo, mu Nim Eo na Hi vari xa di misak ni gol ak be eo? ¹⁸E di mupispisi mi moletin xil mun mubit, ‘Xosxa moletin tei pol ni hitxatien tei nan e his hor te sanien, hitxatien nan be neta sav tang. E xosxa xi pol ni e his sanien xa lalingi di xati, ma ihur xat hitxatien ak ixeh.’ ¹⁹!O, metemim li bar tova tang! ?Ngan xave be eilep mak mu, sanien mu hor te sanien xa di misak ni sanien ak mei be eo? ²⁰Ma moletin xa di pol ni hitxatien nan e his hor te sanien di pol ni mun e his holesok xil vus xa di xati. ²¹E moletin xa pol ni hitxatien nan e his Nim Eo, xi di pol ni e his Hi xa da en. ²²E moletin xa di pol ni hitxatien nan e his ut nesao, xi di pol ni e his vontoen te xeihen na Hi e e his ngan xa di dotan da en.

²³“!Isa pupu mi xamim, tisa xil te Rae xil na Mosis del Farasi xil xa di munggul Hi nggo hilibemim tang! Hi isa pangasien mi xamim vengang

^t 23:14 Rut uvei na Matiu lateling sepinien ak mun xa de Luk 20:47 e Mak 12:40 xa bit, “!Isa pupu mi xamim, tisa xil te Rae xil na Mosis del Farasi xil xa di munggul Hi nggo hilibemim tang! Ve hokanen namim, di muleh holesok xil holu ra tunau xil, e pe met moletin xil, di mupol ni sisen xil xa tepiei. !Ve rin ak, Hi isa pangasien xil xa isa pupu iha xat xamim!”

di muteong xat tutut rae xil nggoni sexien xa musa taet ni tutut uvei xil te kuken ba mi Hi. E rae xil xa latellep nggoni ngan xil xa di bit mupisen sexien xil te esaen, te neketen, e mupol naha xa momal pe met Hi, xamim mutateong xati ti. Vahos mak mu vahit muteong xat rae xil xa latellep vatel ngan xil xa labe tereli mun. ²⁴!Tave ti neta xa metemim bar, e di musak tangan mutiamu ni mosav xil! Xamim di musev kuhi ni oei mamim maxani minamu ti tutut anon tova xa tamese ti, e mutamea murom tevi ni kamel tei xa mahulong xa misa mak mu mili.

²⁵“!Isa pupu mi xamim, tisa xil te Rae xil na Mosis del Farasi xil xa di munggul Hi nggo hilibemim tang! Hi isa pangasien mi xamim vengang meulien namim nggoni valoei xil e pelet xil xa mukas kuhi nggo hale tang. E vangite xalu, mube ho mane e musak tangan muhul kes ni naha xa xamim tang di iemim bei. ²⁶!Metemim bar tova tang! Itiamu, mukas moten vangit meulien namim. Imak, ma hale mun imese.

²⁷“!Isa pupu mi xamim, tisa xil te Rae xil na Mosis del Farasi xil xa di munggul Hi nggo hilibemim tang! Xamim munggoni von tehinen xil xa lapol kuhi ni e lapen kuhi ni mieh. Ut xa hale, lapusi bos xa bos. E vangite xil polu ni si moletin xil e neta sav xil mun xa misa xa misa pupu. ²⁸Usil sexien ak, xamim mumal nggo hilibemim tang, e tinemim, mupolu ni luvozen e sexien tesa xil.

²⁹“!Isa pupu mi xamim, tisa xil te Rae xil na Mosis del Farasi xil xa di munggul Hi nggo hilibemim tang! Pangasien namim isa mak mu vengang xa mupol pilei ni von tehinen na provet xil e di mumosan kuhi ni von tehinen na ngan xil xa lamal pe met Hi. ³⁰E di mubiteni mubit, ‘Vahit mateti e melengien na avu namem xil tetiamu, xamem manamos ti natel xil e melele xa latehas vin provet xil ak.’ ³¹!Iaxai vari! Nggo sepinien xati namim, di mubiteni reitin xa mube vatimol xati na ngan xil xa latehas vin provet xil. ³²E melele xil namim sung, xamim ti mupol vuol ni naha xa avu namim xil tetiamu latepol kokot ni.

³³“!Xamim mube tetal tesa xil! !Reitin, mube vanut tetal sosomen xil xa di munggas vin moletin xil ni vulongomim. ?Mulesae reling pangasien te Upang xa misakras vamat itep vari? !Musakras! ³⁴Misak ni, nisil provet xil, ngan xil xa lakilakil kuhi, e tisa xil mun ha lisel xat xamim tangan muhiles ra tesaen xil namim. E xamim, muhas vin rute xil e muti xat xil e eivave xil. E rute ngan xil mun, mumeas purun xil ni ao te xeih xil xa sanute di en e nim te pispisien xil namim. Muhol xil ha mutal xat xil e taon namim xil e e taon sav xil mun. ³⁵Isak ni, pangasien ve maten na moletin xil vus xa lamal pe met Hi iti e hemim. Reitin, maten na Ebel^u xa temal pe met Hi xa avu namim tetiamu tehas rohon ni temat teloh teha tetuxoh maten na provet Sakaraea,^v nat Berekae, xa avu namim xil

^u 23:35 Sen 4:8 ^v 23:35 2Kr 24:20-22

latehov vini e hilaep te Nim Eo e hor te sanien, maten nae xil vus iti xat xamim. ³⁶Reitin li nabiteni mi xamim, Hi isa pangasien ve maten xil ak iha xat xamim te xosali ak.

³⁷“!O moletin xil tahal Serusalem! Xamim iaxa mutehas vin provet xil e mutehov vin eloheoh xil xa Hi tesil xil latemei ve xamim. Melengien xil holu, ieok bei pupu tangan nakes viton xamim e nasikoe xol xamim vaxoni tuatou tei xa mikes viton tuten xil e muhin xol xil ni aveoun. E xamim iemim ti tavei. ³⁸!Ma xamim mupus ti sung! Hi nasikoe xol xamim ti mun, e imaen Nim Eo namim mei ita hon tang, moletin ti mun nava en. ³⁹Nabiteni mi xamim, taxeak iha, munapus ti mun nou ituxoh melele xa muhiteni muhit, *‘!Tuxolxatien iti mi ngan xa di bemei e his Iahova!’ (Sam 118:26)*”

Isu Misep usil Sakpisien Xil e Melengien Xil te Xeih xa Ti Imei

24 ¹“Melele xa Iesu del moletin nan xil da labe reling vangit vioh te Nim Eo, moletin nan xil di lati nim xil xa bos te Nim Eo mini. ²Ma Iesu biteni mi xil bit, “?Xamim di mupus holesok xil vus ak? Reitin li nabiteni mi xamim, melengien tei di bemei xa hat xil ak xa latepol ni Nim Eo ak ni navisten xil ti mun. Moletin xil mei lihu lenen xil vus ihe tan.”

³Di, Iesu be nesao e Vathu te Urvatiei te Olip del moletin nan xil. E melele xa ba dotan, xil kestang lamei visali e lasisi labit, “?Uhiteni mi xamem, holesok xil ak usil Nim Eo istal vilieh vari? ?E naha vari ipisen ni xa xouk umei, e hoxalite te melengien xil xa radi en di bemei sangas?”

⁴Iesu bit rilomun ni mi xil bit, “Muxuxou kuhi ve xamim, e munamaen ti moletin mei naluvos xamim. ⁵Vengan moletin xil holu limei e hisok e lihiteni lihiti, ‘!Inou nabe Kristo!’ Ma liluvos moletin xil holu. ⁶Mulongeong ni xa vaeen xil xa tellep di bemei, e muhur longeongen mun usil vaeen xil xa di rute xil xa be sotin. E munatemanin ti ven. Holesok xil ak iaxa mei istal itiamu, e nave hoxalite te ut etan ti mu. ⁷Ut tei ivae itel ut tei mun, e kantri xil lihas tan ni kantri sav xil. Ut xil hao e ut etan, mae kekaten ihas moletin xil e lul holu ilil. ⁸E tave ti neta xa holesok xil ak mei isa itiamu ni melele xa Hi mei ihe Suv Toto na moletin xil, ngan ak nave hoxalite ti mu. Ixoni melele xa atou tei milong rohon ni mar pangasien xa di pisen ni xa, nave nousav ti, iling tuvava nan.

⁹“Ti, xil mei lital xat xamim e lisa rat xamim muha tangan ha lisa pangasien mi xamim e lihas vin xamim. Moletin xil te kantri xil vus iexil iat pangas xamim vengan di munggusil xat nou. ¹⁰E melele nen ak, moletin xil hao likavitou ra nekaten nae e limaen rat tua nae xil lihe he elu nae xil e iexil ti iat xil mun tang. ¹¹E provet te luvosen xil hao

^w **24:1** Tumulen ak de Mak 13:1-31; e Luk 21:5-33 mun

mei listal e liluvos moletin xil holu. ¹²E vengan sexien te tesaen mei ihe holu mak mu, eheien na moletin xil holu nati ti mun e mosav. ¹³E ngan xil xa lisoh ixeh e neketen nae ituxoh hoxalite te holesok xil vus ak, Hi iteh meulien e xil. ¹⁴E melele xa longeongen usil Hi xa mei ihe Suv Toto na moletin xil ha ituxoh rute xil vus e ut etan tangan moletin xil vus lakilakil ni, e melele nen ak vari, ihe hoxalite te holesok xil vus.

¹⁵Xamim mupus sepinien na Hi xa texo provet Daniel mei istal ihe reitin xa bit, *'Xil liso neta tei xa be muis pupu ite vangit Nim Eo xa isak ni namese ti mun pe met Hi.'* (Dan 11:31) (Xouk xa di obuli sepinien ak, bos tangan ukil kuh koute teni.) ¹⁶E melele xa mupusi, ngan xil xa ladi Sudea litemanon lilesae ha lixus liti e vathu xil. ¹⁷Xosxa moletin tova di mingel e hale, mesal ihe tovuol tangan vatilomun vahe nim e vahur neta tova nan. ¹⁸E xosxa moletin tei di pol e naho, xi nava ti mun tim tangan vahur eising tova nan. ¹⁹E melele nen xil ak, isa pupu mi atou xil xa ladi ni tuvava xil e ngan xil mun xa di latunat ni tuvava xil. ²⁰Musis mi Hi tangan melengien xa ti mulesae en nave an tesa ti mu nave Sabat ti, ²¹vengan longpangasien xil te melengien tesa xil ak isa ili melengien sav xil vus te ut etan: e melele xa Hi tepeas ni ut etan miloh mei duxoh xosali. E hisit melengien xil ak ihe tovuol mun e melengien xil mun xa ti imei itutou. ²²E Hi teta xoteh melengien tesa xil ak mei be tamure mu vengan xi di minem usil ngan xil xa tehosei xil labe nan. Vengan vahit napol ni ti namak, moletin ti mun nameul.

²³"E melele nen ak, xil lihiteni lihit, '!Mupus ti! Ngan ak be Kristo xa Hi tehosei!' Mu lihiteni lihit, '!Mupus ti mu! !Xi iaxa da iaxor!' E xamim, munake reitin ti e sepinien xil ak. ²⁴Vengan Kristo te luvosen xil e provet te luvosen xil mun limei. E melele xa limei, lipol ni merekel xil e holesok xil xa tellep xa isak ni moletin xil limesep pupu ven. Xil lipol ni tangan liluvos moletin xil holu lihusil xil. E lisak tangan, nahe, xil lalihi rerat ngan xil xa Hi tehosei xil labe nan. ²⁵Ma muteong kuhi ni sepinien xil ak, vengan, inou, nabit usil holesok xil hao ngamu mi xamim xa mei istal.

²⁶"Ma xosxa moletin tei mei ihiteni mi xamim ihit, 'Kristo da nga xor e uruvuol,' munaha ti rute ak. E xosxa lihiteni mi xamim lihit, 'Kristo xi tak, dat vangit nim ak,' munake reitin ti en. ²⁷Vengan, melele xa inou, Nat Moletin, nitilomun nimej, moletin xil vus lipus kila ixoni melele xa lapus an milangas e miehen teni nggur vuol ni tilang hat nggo rin tei e ist ba duxoh rin mun e wes. ²⁸Moletin xil vus lipus kila rute xa Nat Moletin itilomun en vengan xa imei itel pangasien holu. Reitin, lipus kila en e hisit sexien xa di lale kil rute xa neta tei mat da en e melele xa lapus vanut angalu xil ladi ut tei.^x

^x 24:28 Sepinien xati teni bit, "voltsa", tuman tei xa mahulong xa di langga lakapis xol neta tei xa mat.

²⁹“E melele xati xa melengien tesa xil ak ivus,
*‘Eai imei imaluxoluk
 e aveti namem ti mun.’ (Aes 13:10)*
*‘Hitu xil likiri ra tilang hat,
 e holesok xil mun xa di nesao,
 Hi imulul ni xil.’ (Aes 34:4)*

³⁰“Reitin, e melele xati nen ak, neta tei istal e tilang hat xa ipisen ni xa inou, Nat Moletin, di namei. E moletin xil vus te ut etan ti lites xil mun tang melele xa lipusi. Xil lipus *‘Nat Moletin imei etan itel momah xil te tilang hat.’ (Dan 7:13)* Xi imei itel xeihen e miehen nan. ³¹Xi ihui amaru nan ixeih tangan vasa rerat masxaxa nan xil. E xil lihe rute xil vus e ut etan, lixo rin tei ha lihe rin tei mun, e lileh viton moletin xil vus xa Hi tehosei xil labe nan.

³²“Xamim muhur pispisien ixo vatit fik. Melele xa lite xil misu rohon ni ute xil xa be neta hu, xamim mukila xa melele te an te tin di bemei. ³³Usil sexien nen tak, melele xa mupus holesok xil ak mei istal, mukila xa mei rilomunen navan di bemei sangas. Reitin, da ngamu e puiteh. ³⁴Reitin li nabiteni mi xamim, holesok xil ak mei istal e melele xa moletin xil te xosali ak limeul tamu liti. ³⁵Nabiteni reitin vengan xa neta sav xa ut etan itel tilang hat mun lalikesae e melengien tei, sepinien navan misakras vakesae vatova.”

Iesu Pispisi xa Moletin Tovuol xa Vakil Melengien xa Nat Moletin Itilomun En

³⁶“Jesu biteni mi moletin nan xil bit, “Moletin tovuol xa vakil melengien xati xa inou, Nat Moletin, nitilomun en. Reitin, masxaxa xil xa ladi ut nesao, e inou mun, Nat Moletin, matakil ti. Hi Tamer kestang mikil haoa xati teni. ³⁷Mei rilomunen navan, Nat Moletin, ixoni melengien xil na Noah tetiamu. ³⁸Vengan, e melele nen xil ak, tetiamu ni ngan xa oei xa mahulong temei, moletin xil di lateanien e di latemun, tiramue xil e atou xil di lateteli ba tetuxoh melele xa Noah tehe vangit tuturil. ³⁹Xil latnakil ti vari naha xa mei istal ba tetuxoh melele xati xa oei xa eilep temei e mei tehas xil vus latelel. Ixo rin tak, moletin xil litemanin ni mei rilomunen navan, Nat Moletin. ⁴⁰E melele nen ak, xosxa moletin lu ti lalipol, Hi mei ihur rat tei ha ite visali e ut nesao, e istokovein tei xalu ita nga. ⁴¹Reitin, xosxa atou lu ti lalisak mesen anien, Hi mei ihur rat tei ha ite visali e ut nesao, e istokovein tei xalu ita nga.

⁴²“Ma, muxuxou kuhi ve xamim, vengan mutakil ti melengien eah iaxa Suv namim itilomun en. ⁴³E mukila xa xosxa moletin tei, xa nim man da, mikil melele xati xa moletin te kanen imei en, xi mikila ita nga e

iketeh xole tangan moletin te kanen namei ti e nim man. ⁴⁴Ma muvue xat xamim. Vengan, usil sexien nen tak, inou, Nat Moletin, nitilomun nimee e melele tei xa moletin xil linakil ti ixoni moletin te kanen.

⁴⁵“?Visi iaxa be moletin te polien xa be metisou kuhi e di miteong xat rae na suv nan? Xi be ngan xa suv nan milingi be vat na moletin te polien sav xil e tim san tangan ti isa anien mi xil e melele xati teni. ⁴⁶Tuxolxatien iti mi moletin te polien xa, melele xa suv nan itilomun imei, ikameti xa xi di pol ni polien nan xil. ⁴⁷Reitin li nabiteni mi xamim xa suv nan ipet rat moletin te polien ak ihe nesao tangan ti ilaxat holesok sav nan xil mun.

⁴⁸“E xosxa moletin te polien ak, vatin isa, ma ti ihiteni mi xi mun tang ihit, ‘Suv navan namei ti mok.’ ⁴⁹Ma iha ti ihas pangas moletin te polien sav xil mun, e ti ianien e ti imun itel vat munien xil. ⁵⁰E suv nan itilomun imei e melele tei xa moletin te polien ak nakil ti. ⁵¹E melele xa suv nan imei, ihas pangasi, e ikuvun rati ha ite von longpangasien itel ngan xil xa di langgusil Hi nggo hilbexil tang. E xil ti limuis e ti lingas luhe xil ve longpangasien nae xil.”

*Iesu Dei Vole Tei usil Atul Maxoe He Xalu (10) xa
Labue Xat Xil ve Meien na Suv Nae*

25 ¹Melele xa Iesu di tamu misepin mi moletin nan xil usil rin xa ti livue xat xil ve meien nan, xi de vole ak mi xil bit, “Melele xa Hi mei ihe Suv Toto na moletin xil imak: Vatei, atul maxoe he xalu (10) laba tangan lapus tetelien tei. E melele xa ut da maluxoluk, laleh laet nae xil e laba tangan lavisu mi tiramue xa iteli e lihusili lihe rute xa tetelien ita en. ²Xil lim (5), vatixil tovuol, e xil lim (5) iaxa langgur vati. ³Ngan xil xa vatixil tovuol laleh laet nae, e latahur ti mun oel vatel xat xil. ⁴E ngan xil xa langgur vatixil, xil vus lapin e valihe xil xa oel di en del xat laet nae xil. ⁵E vengon xa tiramue xa iteli tamei ti vamanon, atul maxoe xil ak, vexil memal, ma lapat.

⁶“Maxani, e hilaep te vongien, xil lalong moletin xil di lakekei ni labit, ‘!Xi bemei! !Ngan xa iteli di bemei! !Mei rava ravisu mini e rihusili riha!

⁷“Melele xa atul maxoe xil ak lalonge, latamea e lapol kuhi ni laet nae xil. ⁸E ngan xil xa vatixil tovuol labiles lasis ngan xil xa langgur vatixil labit, ‘Musa ti oel li mi xamem, vengon laet namem sangas vamat xiak.’

⁹“E ngan xil xa langgur vatixil labit, ‘E-e, masakras li. Vengan xa oel namem tapin ti tangan vahe laet namim, ti, e vahe namem mun. Muha tang e sitoa nen, e ha muxal ti namim.’

¹⁰“E melele xa rut atul maxoe xil ak laba tangan laxal ti oel nae, tiramue xa iteli mei mistal. Ma atul maxoe xil xa labue xat kuh xil langgusili ba labe nim xa anien te tetelien da en. Di, lakoe xol puiteh teni.

¹¹“E dutou ni, atul maxoe sav xil ak mun mei lastal. Xil lamei visal nim te tetelien e lakei be nesao labit, ‘!Suv, suv! !Sah puiteh li mi xamem!’

¹²“E tiramue xa miteli bemei e bit rilomun ni mi xil bit, ‘Nabiteni reitin li, inou natakil ti vari xamim.’”

¹³Di, Jesu misepin kor e vole ak bit, “Ma, muvue xat kuh xamim e munapat ti, vengang mutakil ti melele xati xa inou nitilomun en.”

*Iesu Dei Vole Tei usil Eilep Tei xa Miling Nenesien Nan De
Moletin te Polien Nan Tol (3) Tengan Ti Lilaxat Mani Nan*

¹⁴^zJesu de vole te mun mi moletin nan xil bit, “Melele xa Hi mei ihe Suv Toto na moletin xil imak: Vatei, eilep tei misak xat holesok nan xil tangan vahe rute tei xa be sotin. Di, mikes viton moletin te polien nan tol (3) e miling xatel tangan latilaxat holesok nan xil ¹⁵pipini ni metisouen natel. Mi tei, eilep ak miling gol mani be taosen lim (5,000) di e hen. Mi tei mun, miling gol mani be taosen lu (2,000) di e hen. E mi ngan xa be tol nen, miling gol mani be taosen tei (1,000) di e hen.^a Bus di, eilep ak ba sung.

¹⁶Melele xa eilep ak ba, vatei takes, ngan xa nggur gol mani be taosen lim (5,000) ba pol sorin ni mani ak ba vuma ... bas xoles gol mani taosen lim (5,000) mun mei del xat ngan xa da ngamu. ¹⁷Usil sexien tak, ngan xa tehur gol mani tehe taosen lu (2,000), xi mun ba pol sorin ni e bas xoles gol mani be taosen lu (2,000) mun. ¹⁸E moletin te polien xa tehur gol mani xa tehe taosen tei (1,000), xi ba, minggil vul, e midihin soston mani na suv nan di en.

¹⁹Melengien xil hao mei mitavi, e eilep natel dilomun e mikes viton xatel tangan valong kuhi xa latepol ni naha ni mani xil xa telingi tete heatel. ²⁰Moletin te polien nan xa tehur gol mani tehe taosen lim (5,000) bemei del xat taosen lim (5,000) mun e biteni bit, ‘Suv, oteling gol mani tehe taosen lim (5,000) teti e heok. E taxeak, pus ti. Natepol sorin ni e natehas xoles taosen lim (5,000) mun mei del xati.’

²¹“Melele xa suv nan pusi, biteni mini bit, ‘!Bos pupu! Xouk obe moletin te polien tei xa bos e nenesien navan di e xouk. E vengang xa di olaxat kuh holesok xil xa tereli xa natelingi teti e hem, nilinguk sung mei ulaxat holesok navan xil xa holu. Amei pus hosien itel suv nam.’

²²Di, moletin te polien nan xa tehur gol mani tehe taosen lu (2,000) bemei e biteni bit, ‘Suv, oteling gol mani tehe taosen lu (2,000) teti e heok. E taxeak, pus ti. Natepol sorin ni e natehas xoles taosen lu (2,000) mun mei del xati.’

²³Melele xa suv nan pusi, biteni mini bit, ‘!Bos pupu! Xouk obe moletin te polien tei xa bos e nenesien navan di e xouk. E vengang xa di olaxat kuh holesok xil xa tereli xa natelingi teti e hem, nilinguk sung mei ulaxat holesok navan xil xa holu. Amei pus hosien itel suv nam.’

^z 25:14 Tumulen ak de Luk 19:11-27 mun ^a 25:15 Gol mani ak, tei nggoni 1000 vatu.

24“Di, moletin te polien nan xa tehur gol mani tehe taosen tei bemei visali e biteni mini bit, ‘Suv, inou nakila li xa xouk obe moletin te xeih tei xa di oleh huiei xil ra vatiei xil xa tave xouk ti olihi, e di oleh anien mun xa mosav xil tang latelihi teti e naho sam xil. 25Uluk mikan ni xouk, ma ba nadihin mani nam de vul tei. Pus ti mu, mani xil vus nam xiak.’

26“Melele xa suv nan pusi mak, misepin nggeih mini bit, ‘!Xouk obe moletin te polien tesa tei xa obe mah tova tang! Xouk okil kuhi xa inou nabe moletin te xeih tei xa di naleh huiei xil ra vatiei xil xa tave nou ti nalihi, e di naleh anien mun xa mosav xil tang latelihi teti e naho savan xil. 27Ma, vahit vahos mak mu xa ova oling mani navan vate bangk tova tangan, melele xa nitilomun namei, nikila ma namur rat rilomun ni e vatin vata xati.’

28“Di, eilep ak biles pus moletin te polien sav nan e biteni mini bit, ‘Hur rat gol mani ra moletin te polien xai, e ha ulingi ite he ngan xa nggur gol mani taosen he xalu (10,000) ngamu. 29Vengan ngan xil xa di lapol del xat naha xa de hexil ngamu, lisa ti mun mi xil tangan isak ni hexil mei ipolu mu. E ngan xil xa latapol ni ti neta ni ngan xa de hexil ngamu, tave ti neta xa holesok nae tereli tang, lileh rerati ihe reling xil. 30Ma ha mukuvun rat moletin te polien tesa ak ihe hale, ha ite rute xa maluxoluk itel xat ngan xil xa ti limuis e ti lingas luhe xil ve longpangasien nae xil.’ ”

Iesu Misep usil Melengien te Lepisien

31Iesu biteni mun mi moletin nan xil bit, “Melele xa Nat Moletin^b itilomun en, imei itel xat miehen e masxaxa xil vus. Ti, itotan e voninen te xeihen e ilepis moletin xil. 32E melele nen ak, moletin xil te kantri xil vus mei lihe vituei e rute tei takes. Xil mei lisoh pe meten, e xi iseti xil lihe vanute lu. Xi ipol ni ixoni moletin tei xa di milaxat sipsip xil xa di miseti nani xil reling sipsip san xil. 33Ngan xil xa langgoni sipsip xil, iling xil liti e rin metu. E ngan xil xa langgoni nani xil ha liti e rin meil.

34“Ti, xi isepin mi xil nggoni Suv Toto nae. Ihiteni mi ngan xil xa ladi e rin metu ihit, ‘!Mumei, xamim xa tuxolxatien na Tata navan di e xamim! Mei muleh holesok xil xa xi tesak mesen ni ve xamim melele xa tepeas ni ut etan. 35Vengan xa melele xa mae teat nou, mutesa anien minou; melele xa meruru teat nou, mutesa oei minou namu ni; e melele xa natemei natexoni ngan halesav tei, mutehur pilei nou natemei e tim samim xil. 36Reitin, melele xa eising navan tehe tovuol, xamim mutesing xol nou; melele xa natemesei, xamim mutelaxat kuh nou; e melele xa natete nim te xeih, xamim mei mutesao ni nou.’

37“Ti, ngan xil xa lamal pe met Hi xa liti e rin metu lihit rilomun ni mini lihit, “?Suv, vilieh vari iaxa matepusuk xa mae teatuk e matesa

^b 25:31 Nat Moletin be his tei xa Iesu tehuri tangan vasep usil meien nan.

anien minuk; mu meruru teatuk e matesa oei minuk tangan omu ni?
 38?Vilieh vari iaxa matepusuk otexoni ngan halesav tei e matehur pilei xouk otemei e tim samem; mu eising nam tehe tovuol e matesing xolok?
 39?E vilieh mun iaxa matepusuk otemesei e matelaxatuk; mu otete nim te xeih e mabat matesao ni xouk?’

40“Ma, suv toto ak ihiteni mi xil ihit, ‘Reitin li nabiteni mi xamim, holesok xil vus xa mutepol ni mi tuak xil ak, tave ti neta xa xi tehe movotei tei tang, e pe metok, lehit ngan xa mutepol ni minou vari tang.’

41Ti, ihiteni mi ngan xil xa liti e rin meil ihit, ‘!Xamim, ngan xil xa Hi tesa halesil mi xamim, muhe reling nou! !Ha muhe Upang xa misakras vamat vatova xa Hi tesak mesen ni ngamu tangan ihe vonine Temat itel masxaxa nan xil! 42Vengan melele xa mae teat nou, mutnasa ti anien minou; melele xa meruru teat nou, mutnasa ti oei minou namu ni; 43e melele xa natemei natexoni ngan halesav tei, mutnahur pilei nou ti namat e tim samim xil. E melele xa eising navan tehe tovuol, mutnasing xol nou ti; melele xa natemesei, xamim mutnalaxat kuh nou ti; e melele xa natete nim te xeih, xamim mutnasao ni nou ti.’

44“Ti, moletin xil ak lisisi lihit, “?Suv, vilieh vari iaxa matepusuk xa mae mu meruru teatuk, mu otemei texoni ngan halesav tei, mu eising nam tehe tovuol, mu otemesei, mu otete nim te xeih e matnatutou ni xouk ti?’

45“Ma, xi ihiteni mi xil ihit, ‘Reitin li nabiteni mi xamim, holesok xil vus ak, xosxa mutnapol ni ti mi tuak xil ak, tave ti neta xa xi tehe movotei tei tang, e pe metok, lehit ngan xa mutnapol ni ti minou vari tang.’

46“Ma xil vus xa latamal ti pe meten, Nat Moletin iso rerat xil vus ha liti rute xa longpangasien nae xil misakras vavus vatova. E ngan xil xa lamal pe meten ha lihur meulien sal.”

Vat na Siu Xil Lalang Ves Suse tangan Lavas Vin Iesu Vaxo En

26 ¹cMelele xa Iesu pispisi ni holesok xil ak bus mi moletin nan xil, xi biteni mi xil bit, ²“Nggoni ngan taxa mukila ngamu, melengien lu sutang di, ti, ripol ni Anien te Tavien. E melele nen ak vari, limaen nou, Nat Moletin, nihe he elu navan xil tangan ha liti xat nou e eivave.”

³E melele taxa Iesu di misepin, e tim xa eilep sa Kaiafas xa be Vatixar na pris xil, vat xil na pris xil del elda na Siu xil lamei vituei. ⁴Xil di lalang ni suse tangan latal xat xuxus ni Iesu e lavasi vamat vaxo en. ⁵Ma labiteni labit, “Rinapol ni ti e melengien te Anien te Tavien vengan, maxani, moletin xil linavae mi xil mun tang.”

c 26:1 Tumulen ak de Mak 14:1-2; Luk 22:1-2; e Sion 11:45-53 mun

Iesu Ba ni Anien Tei e Atou Tei Pisen Merereen Mini

⁶ ^dE melele xa Iesu da tamu e metimal tahal Betani, xi ba di ngganien e tim sa Saemon xa, tetiamu, meseien lepori tea tenben. ⁷Di, atou tei bemei nim e nggur valit vokon tei xa lapol ni valite ni hat hos tei xa lakesi ni alabasta. Vokon ak, von bos xa bos e mani teni mun nggeih. E xi bemei visal Iesu e rute xa dotan da en, e mideh vokon ak ba xat vatin tangan vapisen merereen nan mini.

⁸E melele xa moletin na Iesu xil lapusi, iexil nggati e laseputut ni labit, “?!Veneh ma di purun vokon ak mak!? ⁹Vahos mak mu vahit ha vapos ni ni mani tova xa eilep. Ti, mani nen mikila vatutou ni hoeo xil.”

¹⁰E Iesu mikil naha xa di lasep usili, ma biteni mi xil bit, “?Xamim di mubul xat atou ak veneh? Xi pol ni neta tei xa bos pupu minou. ¹¹Vengan hoeo xil liti visal xamim vehakut, e inou, nasakras nate visal xamim vahehi. ¹²Melele xa mideh vokon ak ba xat tiei navan, xi di misak mesen nou ve tehinen navan. ¹³Reitin li nabiteni mi xamim, e rute xil vus xa lihithiten longeongen hos usil nou en, xil lihit usil naha xa atou ak tepol ni minou. E isak ni moletin xil linem xati ven.”

Sudas Maen ni tangan Isa Rat Iesu mi Vat Xil na Pris Xil

¹⁴^eDi, Sudas Eskariot, xa be tei e xil xa labe lu e le tei (12) na Iesu, ba pus vat xil na pris xil. ¹⁵Xi misis xil bit, “?Xosxa nisa rat Iesu mei ite hemim, ma musa naha minou?” Ma xil labuli silva mani ba duxoh hanutap tei e he xalu mun (30)^f tangan lisa ni mini. ¹⁶Ma Sudas maen ni. Di, e melele nen ak ba, xi milang ni suse tangan isa rat Iesu ha ite hexil ixo en.

Iesu Nggga Anien te Tavien Del Moletin Nan Xil

¹⁷^gE melengien kokot te ‘Melengien xil te Beret xa Is Tovuol En,’^h moletin na Iesu xil lamei visali e lasisi labit, “?Rute xave iaxa iem bei tangan masak mesen Anien te Tavien en?”ⁱ

^d **26:6** Tumulen ak de Mak 14:3-9; e Sion 12:1-8 mun ^e **26:14** Tumulen ak de Mak 14:10-11; e Luk 22:3-6 mun ^f **26:15** Sak 11:12-13 di tesep usil 30 silva mani ak xa texoni 30,000 vt. ^g **26:17** Tumulen ak de Mak 14:12-21; Luk 22:7-13,21-23; e Sion 13:21-30 mun ^h **26:17** Melengien xil te Beret xa Is Tovuol En: E haram xil ngasen, melengien tol e he sav (8) Siu xil di langga beret xa is tovuol en tangan lanem rilomun ni melele xa latemanon latehe reling hal Isip (Eks 12:1-14). ⁱ **26:17** Anien te Tavien: Siu xil lapol ni Anien ak tangan lanem rilomun ni melele xa masxaxa xil na Hi lathas muimol xil ngasen tahal Isip. E muimol na Siu xil, re sipsip xa lakas puitech mae xil ni tesak ni Hi tetavi e xil (Eks 12:15-20).

¹⁸Iesu bit rilomun ni mi xil bit, “Muhe taon tahal Serusalem xa da iaxor, e mukamet moletin tei e rute ak. Muhiteni mini muhit, ‘Tisa bit, ‘Melengien navan bemei sangas. E inou mei nia Anien te Tavien e tim sam itel moletin navan xil.’ ” ¹⁹Ma moletin nan xil laba e lapol ni nggoni ngan xa Iesu tehiteni mi xil. E rute ak, xil lasak mesen Anien te Tavien.

²⁰E melele xa meteneai ba minu, Iesu bemei e dotan e von anienen del moletin nan xil xa labe lu e le tei (12). ²¹E melele xa di langganien, Iesu bit lelen ni mi xil bit, “Reitin li nabiteni mi xamim, tei e xamim iaxa isa rat nou nihe he elu navan xil.”

²²Melele xa lalonge mak, xil lalonge misa pupu, ma xil kekes di lasis Iesu labit, “?Suv midep li, onemi obit inou?”

²³Iesu bit rilomun ni mi xil bit, “Reitin, tei e xamim vari xa di mungganien vituei del nou iaxa isa rat nou niha.^j ²⁴E be reitin xa inou, Nat Moletin, nimat ixoni ngan xa Vanuvei Eo di misepin ni. !E isa pupu mi ngan xa isa rat nou! Moletin ak, vahos mak mu vahit linapesi ti vengang pangasien xa Hi isa ni mini ihe eilep pupu.”

²⁵Di, Sudas xa isa rati iha misisi bit, “Tisa midep, onemi obit inou?”

Ma Iesu bit rilomun ni mini bit, “Ixonni ngan taxa xouk obiteni.”

²⁶E melele xa di langganien, Iesu nggur beret e memes Hi ven. Di, bul pasi, e melele xa di miseti mi moletin nan xil, xi biteni bit, “Muhuri mua ni. Ngan ak be tiei navan.”

²⁷Di, minggur kap xa uae ba en, memes Hi ven, e melele xa misa ni mi xil, xi biteni bit, “Xamim vus mumu ni. ²⁸Uae ak be ra navan xa isak ni hitxatien hu te xeih na Hi mei istal e ihe reitin.^k Reok xa ileh ve moletin xil holu ihe sanien tei iha mi Hi tangan naketeh ti mun nasa mi xil ve tesaen nae xil. ²⁹Nabiteni mi xamim, ninamu ti mun uae ak ituxoh melele xa nimu uae hu itel xamim e rute xa Tata navan be Suv Toto en.”

³⁰Melele xa langganien e lakikei ni sisien tei bus, xil lastal e ba labe Vathu te Urvatiei te Olip.

Iesu Bit Lelen ni xa Moletin Nan Xil Lilesae Relingi

³¹^lMelele xa laduxoh Vathu te Urvatiei te Olip, Iesu biteni mi moletin nan xil bit, “E vongien tak, xamim vus mulesae reling nou ixoni ngan xa Hi tesepin ni e Vanuvei Eo xa bit,

^j 26:23 Ngan ak isak ni naha xa Sam 41:9 tehiteni tangan istal mei ihe reitin. ^k 26:28 E Eks 24:6-8, Mosis miteh re buluk e hor te sanien tangan vasak ni hitxatien matu te xeih xa Hi tepol ni tetel mol-Isrel xil mei istal e ihe reitin. Usil sexien nen tak, re Iesu pol ni hitxatien hu te xeih mei istal e ihe reitin xa Hi iteh meulien na moletin xil te ut etan.

^l 26:31 Tumulen ak de Mak 14:27-31; Luk 22:31-34; e Sion 13:36-38 mun

*'Inou nihas moletin xa di milaxat sipsip xil,
e sipsip san xil liletasil relingi.'* (Sak 13:7)

32“E melele xa nimeul rilomun ra maten, inou nitiamu ni xamim ha nite Kaleli.”

33 E Pita mitamea e biteni mini bit, “!Tave ti neta xa moletin sav xil lilesae relinguk, inou ninave relinguk ti vatova!”

34 Ma Iesu bit rilomun ni mini bit, “Reitin li nabiteni minuk, e vongien tak, melele xa ut nalan ti mu e tuto xil linakorat ti mu, e xouk uhiteni ihe vatol ngamu xa otakil ti nou.”

35 E Pita biteni nggeih pilei sung bit, “!E-e, namak ti! !Tave ti neta xa nimat itelak, inou nisakras namiteni xa natakil ti xouk!” E ngan teisav xil mun labiteni nggoni tang.

Iesu Misis e Ut Ketsemani e Miling Meulien Nan pe He Hi

36^mDi, Iesu be rute tei xa lakesi ni Ketsemani del moletin nan xil. Melele xa laduxoh rute ak, xi biteni mi xil bit, “Mutotan muti tak e ti mutatil nou. Inou nitiamu niha nisis inggaxor.” 37Xi minggur Pita del nat Sepeti xalu latonggusili. E melele xa latoba, nenemien na Iesu basi holu e milonge misa pupu. 38Ma xi biteni mi xatel bit, “Tinok li polu ni nenexoen, e nalonge lehit ngan xa bit vahas vin nou. Muti tak, e ti mutiketeh itel nou.”

39Di, Iesu mikakao reling xatel vuteili tang, mitingeiril be tan e misis mi Hi bit, “Tata li, xosxa suse sav tova mun da tamu, uhur rat longpangasien ak ihe reling nou li. E onapol ni ti naxoni ngan xa ieok bei, e upol ni ixoni ngan kestang xa xouk iem bei.”

40Di, xi dilomun be visal xatel e mikameti xa di latopat. Ma xi biteni mi Pita bit, “?Midep xiak? ?Mutsakras mutoketeh vatel nou vahe haoa tei takes? 41Mutiketeh e ti mutisis tangan mutnamot ti e melele xa sakpisien xil imei e xamitel. E tinemitel, iemitel bei tangan mutopol ni neta tei xa momal, e tenbemitel memel.”

42Di, Iesu dilomun ba e misis bit, “Tata li, xosxa suse sav tovuol e be tangan xa nihur vuol ni longpangasien xil ak, ma upol ni ixoni ngan kestang xa xouk iem bei.”

43 E melele xa Iesu dilomun, mikameti xa termali latopat mun vengan lasakras latohur xat metenoh natel. 44Ma xi be reling termali mun, e ba misis be vatol nen ni sisen nan xati tang.

45 E melele xa Iesu dilomun bemei visal termali, biteni mi xatel bit, “?Di tamu mutopat? ?Di tamu mutongel? !Topus ti! Taxeak be melele xati xa lisa rat nou, Nat Moletin, nihe he moletin tesa xil. 46!Tomea, ratoha! Moletin xa isa rat nou, xi tu xa bemei iaxor.”

^m 26:36 Tumulen ak de Mak 14:32-42; e Luk 22:39-46 mun

Ladal Xat Iesu

⁴⁷ⁿMelele xa Iesu di tamu misepin, Sudas, tei e xil xa labe lu e le tei (12) nan, mistal. Xi bemei del xat vanut moletin xil xa di laleh xat tiei del homenda xil te vaeen. Xil lamei langgusil nenemien na vat xil na pris xil del elda xil na Siu xil. ⁴⁸Sudas xa tehit xati tangan isa rat Iesu teling xati tehit, “Moletin xa nipesum ni vin, xi vari iaxa be ngan xa iemim bei. Mumei mutal xati.” ⁴⁹Ma Sudas mika mal visal Iesu, pesum ni vin e bit, “Tisa, bos vongien li.”

⁵⁰E Iesu bit rilomun ni mini bit, “Tuxoli, pol ni tang vaxoni ngan xa xouk omei ven.”

Di, vanut moletin xil ak lamei ladal xat Iesu. ⁵¹E moletin tei na Iesu milih rat tiei te vaeen nan e da xoteh vurang slev tei na Vatixar na pris xil.

⁵²E Iesu misel mini bit, “Singin xat tiei nam mun vate voninen, vengang ngan xil xa di labae del tiei, limat itel tiei. ⁵³Vahit ngan xa ieok vahei, inou natak kes Tata navan, ma vatei takes, vasa vanut masxaxa xil te vaeen lili lu e le tei (12) xa mahulong tangan mei livae e rin navan. ⁵⁴?E vahit napol ni, ma Vanuvei Eo xa bit xati xa holesok xil ak istal imak mei ihe reitin itep?”

⁵⁵Di, Iesu biles pus vanut moletin xil ak e biteni mi xil bit, “?Veneh ma di muleh tiei e homenda xil te vaeen tangan mei mutal xat nou? ?Munemi mubit inou di nadiamu ni moletin xil tangan mavae vaha xat kavmen nar? !E-e! Melengien xil ngasen natotan nade vangit vloh te Nim Eo e di napispisi mi moletin xil e mutamei ti tangan mutal xat nou. ⁵⁶E holesok xil vus ak mei mistal tangan vasak ni naha xa provet tetis usil e Vanuvei Eo mei vastal vahe reitin.” E melele xa ladal xati, moletin nan xil vus lalesae relingi.

Langgur Iesu be Kot na Vat Xil na Siu Xil

^{57p}Ngan xil xa ladal xat Iesu ladela labe tim sa Kaiafas, xa be Vatixar na pris xil. E rute ak, tisa xil te Rae na Mosis del elda xil na Siu xil labe vituei ngamu ladi. ⁵⁸E Pita di mika xus e di nggusil vanut moletin xil xa di ladel Iesu laba vuma ... laduxoh vloh te tim sa Vatixar ak. E rute ak, Pita be vangit vloh e ba dotan del mereketeh xil te nim ak tangan vapus ti xa lipol ni naha mi Iesu.

⁵⁹Vat xil na pris xil del eilep sav xil mun na Siu xil di lalang ni moletin tova xa mei iluvos xa Iesu pol ni tesaen tei xa likila lihasi imat ven. ⁶⁰E

ⁿ 26:47 Tumulen ak de Mak 14:43-50; Luk 22:47-53; e Sion 18:3-12 mun ^o 26:53 E melele nen ak, moletin te vaeen xil tahal Rom labe 6,000 xa ladi e vanute tei. Ma Iesu bit masxaxa xil te vaeen ak lili 72,000 xa mikila vakes xil. ^p 26:57 Tumulen ak de Mak 14:53-65; Luk 22:54-55,63-71; e Sion 18:13-14,19-24 mun

tave ti neta xa moletin holu lapol ni luvosen ba xat Iesu, latakamet ti neta xa lakila lasa rati ha vamat ven.

Di, moletin lu mei lusoh ⁶¹e lusepin mi kaonsel ak lubit, “Xamel matelonge xa moletin ak tehit, ‘Inou nikila nihi len Nim Eo na Hi. Ti, nikili ni mun e melengien tol tang.’ ”

⁶²Ma Vatixar mitamea e misis Iesu bit, “?Ma midep? Xouk di olong sepinien di xa di lasepin ni ba xatuk. ?Neta tovuol xa obit ovitieni?” ⁶³E Iesu dat votei tang.

Ma Vatixar misisi mun bit, “E pe met Hi xa meul, inou nasemae ni xouk tangan usepin ni naha xa be reitin. ?Reitin xa xouk obe Kristo, Nat Hi?”

⁶⁴Iesu bit rilomun ni mini bitene, “Ngoni ngan xa di obiteni. E nabiteni mi xamim, taxeak iha, mupus ...

‘Nat Moletin itotan

ite rin metu na Hi Suv te Xeihen.

E mupusi imei e ut etan

ixo momah xil te tilang hat!’ ” (Sam 110:1; Dan 7:13)

⁶⁵Melele xa Vatixar milong sepinien nan, ien mikat xa mikat, dal papas eising nan e miki nggeih bit, “?!Mulonge!? !Xi misep purun his Hi vari! ?Veneh ma di ralang ni sepinien tova mun tangan vaha xati? !Xamim vus mulonge xa di misep purun his Hi! ⁶⁶?Munemi midep vari?”

Xil vus labit rilomun ni labit, “!Momal tang tangan imat!”

⁶⁷Di, xil lakusah ba xat valnaon e ladi. E rute ngan xil mun lalevesi ⁶⁸e labit, “?!Xosxa obit obe Kristo xati, uhit pisi, visi iaxa diuk!?”

Pita Biteni be Vatol xa Takil Ti Iesu

⁶⁹Melele xa Pita di tamu dotan e vangit vloh te nim ma Vatixar na pris xil, atuli tei te polien bemei visali e biteni mini bit, “Xouk mun di otehusil Iesu tahal Kaleli.”

⁷⁰E Pita muun xole pe met moletin xil bit, “!Tave reitin ti! Inou natakil ti naha xa di obiteni iaxai.”

⁷¹Di, Pita mitamea e mikakao ba ve puiteh te vloh. E rute ak, atuli te polien tei mun pusi, ma biteni mi moletin xil bit, “!Moletin ak mun be tei e xil xa di latehusil Iesu tahal Nasaret!”

⁷²Ma vatei mun, Pita muun xole e bit, “!Pe met Hi, nabiteni reitin xa natakil ti moletin ak vari!”

⁷³Tavehi, moletin xil xa lasoh ladi lamei visal Pita e labiteni mini labit, “Xouk vari obe moletin tei nan vengan sepinien nam nggoni ngan Kaleli xil tang.”

⁷⁴E Pita misepin nggeih bit, “!Natakil ti moletin xai vari xa di musep usili iaxai! !Hi isa halesil iha xat nou xosxa sepinien navan be luvosen!”

¶ 26:69 Tumulen ak de Mak 14:66-72; Luk 22:56-62; e Sion 18:15-18,25-27 mun

Vatei takes, tuto tei mikorat. ⁷⁵E melele xa milonge, Pita minem rilomun ni naha xa Iesu tehiteni mini tehit, “Ut nalan ti mu e tuto xil nakorat ti mu, e xouk uhiteni ihe vatol ngamu xa xouk otakil ti nou.” Ma tinen pangas e be reling vangit vioh ak, ba di muis nggeih.

**Sudas Ba Misaxolen Hiraen vengan xa Milonge
Misa ve Naha xa Tepol ni mi Iesu**

27 ¹E makoe roroh, vat xil na pris xil del elda xil na Siu xil lamae e nenemien tei takes tangan lihas Iesu imat. ²Ma labar xati e ladela be visal Paelet xa be vat te kavmen te rute ak tangan lasa rati vaha mini.^s

³Melele xa Sudas xa tesa rat Iesu pusi xa lamaen ni tangan Iesu ha imat, xi biles nenemien nan e misak tangan vasa rilomun ni silva mani xa be hanutap tei e he xalu mun (30) vaha mi vat xil na pris xil del elda xil. ⁴Xi bit rati bit, “Inou napol misa pupu, vengan natesa rat moletin ak xa tenapol ni ti neta vasa tangan ha vamat ven.”

E xil labit rilomun ni mini labit, “Xamem mabit manakil ti. Ngan xai be nam sung.”

⁵Ma Sudas mirang lelen mani ak be tan e vangit vioh te Nim Eo, e miloh milesae. Di, ba bar xat hiraen ni ao tei e misaxolen xi.

⁶Melele xa ba, vat xil na pris xil ba lale viton silva mani xil ak e labiteni labit, “Mani ak texal rat meulien na moletin tei. Ma usil rae nar xil, tamal ti tangan raso ni vahe ateli te Nim Eo vengan mani ak tamese ti.” ⁷Lasep usili, ma lamae e nenemien tei. Ma laleh mani xil ak e ba lapus moletin tei xa di pol ni holesok xil ni tan te pili. Del mani ak, xil langgal rat mavulut tan tei rani tangan mei ihe von tehinen tova xa ti litihin ngan halesav xil en. ⁸Ve rin ak, lakes rute ak ni ‘Tan te Ra’ duxoh xosali. ⁹Ma naha xa Hi tesepin ni texo provet Seremaea bemei be reitin xa bit, “Xil laleh silva mani hanutap tei e he xalu mun (30), xa momal ni mani xa mol-Isrel xil lateling xati tangan lixal rat meulien nan ni. ¹⁰E del mani ak, xil langgal rat mavult tan tei ra moletin tei xa di pol ni holesok xil ni tan te pili, nggoni ngan xa Hi Suv tesemae ni minou.” (Sak 11:12-13; Ser 19:1-13; 32:6-9)

Ladel Iesu Ba Misoh Pe Met Suv Paelet tangan lihas vini

¹¹E melele xati xa ngan ak di mistal, Iesu ba misoh pe met suv Paelet xa be he kavmen tahal Rom xa di milaxat provins tahal Sudea. Di, Paelet misisi bit, “?Midep? ?Be reitin xa xouk obe suv toto na Siu xil?”

Iesu bit rilomun ni mini bit, “Nggoni ngan taxa xouk obiteni.”

^r **27:1** Tumulen ak de Mak 15:1; Luk 23:1-2; e Sion 18:28-32 mun ^s **27:2** Ngan ak misak ni naha xa Aes 53:8 tehiteni mei mistal be reitin. ^t **27:11** Tumulen ak de Mak 15:2-5; Luk 23:3-5; e Sion 18:33-38 mun

¹²E melele xa vat xil na pris xil del elda xil na Siu xil lasepin ba xati, xi tavit ti neta tangan vatutou ni rin xa nan.^u ¹³Ma Paelet misisi bit, “?Otalong ti sepinien xil xa di labiteni ba xatuk iaxai?” ¹⁴E Iesu dat votei tang, e tavit rilomun ni ti sepinien nae. Melele xa suv Paelet pus sexien nan, mesep pupu ven.

¹⁵Be sexien matu tei na suv Paelet xa, e melengien xati te Anien te Tavien, xi di maen moletin tei xa moletin xil labosei tangan ha ven imase ra nim te xeih. ¹⁶E melele nen ak, vatxeih tei tete nim te xeih, hisen Barabas xa moletin xil lakil kuhi mak ve sexien tesa xil xa di tepol ni. ¹⁷Ma melele xa suv Paelet pusi xa vanut moletin xil ak mei ladi vituei, misis xil bit, “?Ngan xave iaxa iemim bei tangan nimaen ni ha ven imase: Barabas mu Iesu xa lakesi ni Kristo?” ¹⁸Xi misis xil mak vengan xa pus kila xa vat xil na pris xil latesa rat Iesu mini vengan di lanem misa ni tang.

¹⁹E melele xa suv Paelet di tamu dotan e von koten nan, atou nan misa sepinien tei mini bit, “Onapol ni ti neta naha xat moletin xai, vengan xi momal tevi. Xosali, nanexo pupu ve metuveen tei xa natepusi usil moletin xai.”

²⁰E vat xil na pris xil del elda xil na Siu xil lasi petine vanut moletin xil ak tangan lasis Paelet e imaen Barabas ha ven imase, e ihas Iesu imat.

²¹Paelet ba misis vanut moletin xil ak vatei mun bit, “?Ngan xave e xalu iaxa iemim bei tangan nimaen ni ha ven imase?”

Ma xil vus lakei ba ni labit, “!Barabas!”

²²Ma Paelet misis xil mun bit, “?Xosxa imaxai, ma nipol ni naha mi Iesu xa lakesi ni Kristo?”

E xil vus lakei be nesao labit, “!Ti xati e eivave!”

²³Di, Paelet misis xil mun bit, “?Veneh? ?Xi pol ni naha misa?”

E lakei nggeih pilei sung labit, “!Ti xati e eivave!”

²⁴Melele xa Paelet pusi xa misakras vahiles nenemien nae e sangas lapol ni vaeen, xi po oei e mikas hen pe met moletin xil vus. E melele xa di pol ni, xi biteni mi xil bit, “Taxeak, nakas rat ra te maten na moletin ak ra heok, vengan napusi xa tapol ni ti neta vasa tangan ha vamat ven. !Ma xosxa imat, ren iti hemim sung!”

²⁵E vanut moletin xil ak labit rilomun ni mini labit, “!Bos tang, ren iti e hemem itel horamue namem xil mun!”

²⁶Ma, nggusil eheien nae, Paelet maen Barabas ba ven mase. E mi Iesu, xi misemae ni tangan moletin te vaeen nan xil ha limeas pangasi ni ao te xeih xa sanute di en, ti, litela ha liti xati e eivave.

^u 27:12 Ngan ak misak ni naha xa Aes 53:7 tehiteni mei mistal be reitin.

Moletin te Vaeen Xil Lapol Pepamen ni Iesu

27^vMelele xa lameas pangas Iesu bus, moletin te vaeen xil na Paelet ladela labe vangit vloh te nim mae xa eilep e lakes viton moletin te vaeen sav xil vus xa ladi vituei^w tangan lamei. 28^xXil ladal rat eising na Iesu e lasing xole ni kaliko tei xa pili nggoni ngan na suv toto xil. 29^yDi, lapol pepamen ni nggoni ngan xa be suv toto tei. Langgil xat vatluvoluv tei ni ao tei xa sanute xil tepiei di en, e lalingi da xat vatin. Laling liei tei de hen metu, e di latingeiril pepamen pe meten nggoni ngan xa di lasa merereen nae mini. E melele xa di lapol ni, labiteni mini labit, “!O suv toto na Siu xil, xamem di mamerere ni xouk!” 30^zDi, lakusah ba xati, lalihi rat eitingil ak rani, e labas vatin ni.^x 31^aMelele xa lapol pepamen ni bus, langgur rat kaliko te pili ak be relingi, e lasing xole ni eising nan mun. Di, ladela ba tangan ha liti xati e eivave.

Ladi Xat Iesu e Eivave

32^bMelele xa moletin te vaeen xil ladel Iesu laba, xil labisu ni moletin tei e suse, hisen Saemon tahal Saerin. Lamei visali e langgeih xati tangan vapo eivave na Iesu. 33^cDi, ladel Iesu ba labe nesao e Vathu Kolkota, xa koute teni be ‘Valvat Moletin’. 34^dE rute ak, lasa uae mi Iesu xa labilesi del neta tei xa mikon.^z E melele xa Iesu mu pisi, misin ni. 35^eDi, moletin te vaeen xil ak ladi xati e eivave. E melele xa murur da en, xil di laso daes tangan vapisen ni xa visi e xil iaxa ileh mavulut eising xil na Iesu.^a 36^fE rute ak, xil ladotan e di laketeh xole. 37^gE eivave nan, ladi xat tisen tei de nesao ni vatin xa bit mesen rin xa ladi xati ven. Tisen ak ladisi labit, ‘Ngan ak be Iesu, Suv Toto na Siu xil.’ 38^hE melele nen ak, lateti xat moletin lu xa lutepol tesa luteti eivave lu mun. Tei tete rin metu, e tei tete rin meil.^b

39ⁱMelele xa Iesu murur de eivave, moletin xil xa di lakakao langgo visali di lakuvun vati xil e di langue xati 40^jlabit, “!Ei, xouk xa otehiteni otehit uhulen Nim Eo na Hi, ti, ukili ni mun e melengien tol tang, bos mak mu tangan uteh meulien e xouk mun tang! !Xosxa obe Nat Hi reitin, amei etan reling eivave xai!”^c

41^kUsil sexien nen xil tak, vat xil na pris xil, tisa xil te rae na Mosis, del elda na Siu xil mun lapol pepamen ni Iesu. 42^lXil labiteni mini labit, “!Mupus ti mu! Xi di teteh meulien e moletin sav xil, e misaras vateh meulien e xi mun tang. !Xosxa be reitin xa xi be suv toto na mol-Isrel

^v 27:27 Tumulen de ak Mak 15:16-20; e Sion 19:2-3 mun ^w 27:27 vanut moletin tavaeen xil ak sangas latehe handred tei e he sav (600). ^x 27:30 Ngan ak misak ni naha xa Aes 50:6 tehiteni mei mistal be reitin. ^y 27:32 Tumulen ak de Mak 15:21-32; Luk 23:26-43; e Sion 19:17-27 mun ^z 27:34 Ngan ak misak ni naha xa Sam 69:21 tehiteni mei mistal be reitin. ^a 27:35 Ngan ak misak ni naha xa Sam 22:14-18 tehiteni mei mistal be reitin. ^b 27:38 Ngan ak misak ni naha xa Aes 53:12 tehiteni mei mistal be reitin. ^c 27:40 Ngan ak misak ni naha xa Sam 22:7-8 tehiteni mei mistal be reitin.

xil, bos xa, taxeak tang, imei etan ra eivave ak! Xosxa imak, ma xamem muke reitin en sung. ⁴³Xi miling nenesien nan e Hi e tehiteni tehit, 'Inou nabe Nat Hi.' Ma bos, xosxa Hi ien bei moletin xai, ma mei ihur rati." ⁴⁴E usil sexien nen tak, moletin tesa xalu xa lateti xat xalu luteti rin, xalu mun lusep pepamen ni.

Maten na Iesu

⁴⁵E piniae, maluxoluken mei da xol ut xil ngasen e dat mak duxoh haoa tol (3). ⁴⁶E melele xa haoa xatel ak mei latavi, Iesu miki nggeih nggo sepinien xati nan xa be Arameak bit, "*!Ilae! !Ilae! ?!Lama sabaktani!?*" (*Sam 22:1*) Koute te sepinien ak be, '!Hi navan! !Hi navan! ?!Veneh ma ostokovein nou!?'

⁴⁷Melele xa rut moletin xil xa lasoh ladi lalonge, xil labit, "?Mulonge? Xi di mikes provet Ilaetsa iaxai."

⁴⁸Vatei takes, tei e xil miloh ba, minggur mavulut kaliko tei, e mitarir ni be uae na mikon. Di, milingi de kusut liei tei e mei misa ni be nesao tangan Iesu vavisi. ⁴⁹E rute ngan xil mun labiteni labit, "Veter mu, ratiluvoluv tamu e rapus ti. ?Ilaetsa imei etan mei iteh meulien en, mu namei ti?"

⁵⁰Di, Iesu miki nggeih vatei mun, milih kor ni votiang, di, mat.

⁵¹E melele nen tak vari, kaliko xa metel xa lalihi dakoe xol ut eo tei e Nim Eo, mesel be rin lu, nggo kusute nesao bemei duxoh kusute etan. E lul tei milul, hat xil mahoi ⁵²e misak ni von tehinen xil mahoi e mangang dit mak. E moletin na Hi xil holu xa latelel lateti en, xil latemeul rilomun ra maten. ⁵³Xil latehe reling von tehinen nae xil e latekakao. E melele xa Iesu temeul rilomun ra maten, moletin xil holu latepus moletin xil ak e hal Serusalem xa be taon eo na Hi.

⁵⁴Melele xa vat na moletin xil te vaeen del moletin nan xil xa di lateketeh xol Iesu lalong lul ak e lapus holesok xil ak xa testal, ulixil mikan pupu. Xil labiteni labit, "!Reitin li, ngan ak tehe Nat Hi vari tang!"

⁵⁵E tatit atou vutei xil lasoh ladi nga sotin vuteili ra eivave, e di lapus holesok xil xa di mistal. Tatit atou xil ak di latetutou ni Iesu e Kaleli e latehusili mun latemei e Serusalem. ⁵⁶E xatel tol xa latemos e atou xil ak tehe Meri tahal Makdela; Meri, nine Temes xal Siosep; e nine horamue na Sepeti xalu.

Laling Tiei na Iesu de Vangihat te Tehinen Tei

⁵⁷E Sangas ut te vamauxoluk e Sabat mun da bemei sangas. Ma moletin tei be visal suv Paelet, hisen Siosep. Xi be te metimal tahal Aramatea e

^d 27:45 Tumulen ak de Mak 15:33-41; Luk 23:44-49; e Sion 19:28-30 mun

e 27:57 Tumulen ak de Mak 15:42-47; Luk 23:50-56; e Sion 19:38-42 mun

holesok nan holu. Xi mun be tei e xil xa di tehusil xat Iesu. ⁵⁸Melele xa ba misoh pe met Paelet, xi misisi tangan vamaen tiei na Iesu mini. Ma Paelet misemae ni moletin nan xil te vaeen tangan ha lipo rati e lisa ni mini. ⁵⁹Ma Siosepe ba poe e pis xole ni kaliko te mieh tei xa memese. ⁶⁰Di, poe e ba milingi de vangihat te tehinen nan xati xa latesah moten rohon ni tang.^f Di, midivin hat tei xa eilep mei dakoe xol puiteh te vangihat ak e be relingi ba. ⁶¹Meri tahal Makdela del Meri tei mun ludotan ludi nga sotin vuteili ra rute ak, momal ni puiteh te vangihat ak.

Moletin te Vaeen Xil Laketeh Xol Vangihat te Tehinen xa Tiei na Iesu Da En

⁶²Melele xa ut milan e Sabat, vat xil na pris xil del Farasi xil ba lapus suv Paelet. ⁶³Xil lamei visali e labiteni mini labit, “Suv, manem xati xa melele xa vat luvozen ak temeul tamu teta, xi tehiteni tehit, ‘Melengien tol mei itavi, e inou nimeul rilomun ra maten.’^g ⁶⁴Ma usemae ni moletin te vaeen nam xil ha liketeh xol kuh vangihat te tehinen nan ha ituxoh melele xa melengien tol xatel ak mei itavi. Vengan xosxa onapol ni ti, moletin nan xil likila ha likan ni tiei nan. Ti, likila lihithiteni xa xi meul rilomun ra maten. E xosxa holesok xil ak mei istal, ma luvozen kor ak mei isa pilei sung ili luvozen xa tetiamu melele xa xi tehit xi be Kristo na Hi.’

⁶⁵Melele xa Paelet milonge mak, xi maen ni e biteni bit, “Bos ngamu. Muleh tatit moletin tova te vaeen, e ha liketeh xol vangihat ak ihusil sexien xa xamim iemim bei.” ⁶⁶Ma laba vituei del moletin te vaeen xil ak, e labilit xol hat xa mahulong xa dakoe xol puiteh teni. Di, laling tatit moletin te vaeen xil ak laketeh xole.

Iesu Meul Rilomun ra Maten

28 ^{1h}Sabat bus. Di, ut milan e Sande, Meri tahal Makdela del Meri sav mun luba tangan ha lalosao ni vangihat te tehinen na Iesu.

²Vatei takes, lul tei milil nggeih vengan masxaxa tei na Hi Suv nggo ut nesao bemei etan. Xi mei midivin rat hat xa tetakoe xol puiteh, e dotan da en. ³Masxaxa ak, tenben minehin pupu nggoni an xa milangas, e eising nan xil mieh xa mieh. ⁴Melele xa moletin te vaeen xil lapusi, ulixil mikan pupu e lexil malili. Lakiri lamot labe tan e iexil bon pupu, lasakras mun lapol ni ti neta.

⁵E masxaxa ak biteni mi atou xalu ak bit, “!Ulimil nakan ti! Nakila xa di mullang ni Iesu xa lateti xati e eivave. ⁶E xi tara ti mun inggak. Reitin, xi meul rilomun ngamu ra maten nggoni ngan taxa tehiteni. Lumei ha lupus ti rute xa lateling tiei nan teta en. ⁷Taxeak tang, multemanon ha

^f 27:60 Ngan ak misak ni naha xa Aes 53:9 tehiteni mei mistal be reitin.

^g 27:63 Mat 16:21 ^h 28:1 Tumulen ak de Mak 16:1-10; Luk 24:1-12; e Sion 20:1-10 mun

milhiteni mi moletin nan xil mulhit, 'Iesu meul rilomun tuei ra maten e xi itiamu ni xamim ha ite Kaleli. Xamim ha mupusi e rute ak.' Ngan ak be sepinien xa Hi misil nou tangan mei nihiteni mi xamil."

⁸Ma rumali lube reling vangihat e luloh temanon luba tangan luhithiteni mi moletin xil na Iesu. Ulixalu mikan, e tave ti neta xa mak, iexalu polu ni sien. ⁹Melele xa di tamu luba, vatakes, Iesu bisu mi xalu e biteni mi xalu bit, "!'Bos makoe! Tomat na Hi iti mi xamil." Melele xa lupusi, lumei visali, lumot ludal xat len xalu, e lusa merereen nalu mini. ¹⁰Di, Iesu biteni mi xalu bit, "Ulimil nakan ti. Ha mulhiteni mi tuak xil e neketen tangan lihe Kaleli, e ha lipus nou en."

Moletin te Vaeen Xil Laluvos Labit Moletin na Iesu Xil Mei Lakan ni Tiei Nan

¹¹Melele xa atou xalu ak di tamu luba, rut moletin te vaeen xil xa di lateketeh xol vangihat ak ladilomun labe Serusalem e ba labit vuol ni holesok xil xa testal mi vat xil na pris xil. ¹²Ma vat xil na pris xil lasepin del elda xil na Siu xil e laling xat nenemien tei. Xil langgal moletin te vaeen xil ak ni mani tei xa eilep ¹³e labiteni mi xil labit, "Xamim ha muhithiteni muhit, 'Melele xa matepor vovong, moletin na Iesu xil latemei e hilaep te vongien, e mei latekan ni tiei nan.' ¹⁴Ma xosxa longeongen teni ituxoh suv Paelet, xamem iaxa musepin e rin xa namim tangan musikoe xol xamim e xi nasa ti longpangasien mi xamim ven." ¹⁵Ma moletin te vaeen xil ak laleh mani e ba lapol ni nggoni ngan xa xil latehiteni mi xil. Ma longeongen ak mikapis e rute xil vus xa Siu xil ladi en e miloh bemei duxoh xosali.

Iesu Mei Mistal mi Moletin Nan Xilⁱ

¹⁶Ma moletin na Iesu xil xa labe tei e le tei (11) xa lateti, xil labe Kaleli e ba labe vathu tei xa Iesu tepisen ni ngamu mi xil. ¹⁷E rute ak, xil lapus Iesu. E melele xa lapusi, lamot mini. E rute ngan xil latake reitin kuhi ti mu en. ¹⁸Di, Iesu bemei visal xil e biteni mi xil bit, "Tata navan miling holesok xil vus xa di ut nesao e ut etan di e heok. ¹⁹Ma muha ve moletin xil te kantri xil vus e mupol ni xil mun mei lihe moletin navan xil. E melele xa mei lihusil nou, xamim mubaptaes ni xil e his Hi Tamer, e his Hi Natneli, e his Hi Ninin Eo. ²⁰E mupispisi mi xil tangan lilong xat holesok xil vus xa natesemae ni mi xamim. E inou, nite visal xamim vehakut ha ituxoh hoxalite te melengien xil xa radi en."

ⁱ **28:15** Tumulen ak de Mak 16:14-18; Luk 24:36-49; Sion 20:19-23; e Polien 1:6-8 mun